

WANTOK

NUSEPAPA BILONG YUMI OL PAPUA NIUGINI STRETI 27 YIA NAU

32 pes

Namba 1,429

Wik i stat long Fonde Novemba 15, 2001

70t

INSAIT

**Pangu lida laikim
PNG bisnis i
baim PNGBC**

- pes 2

**Lukim ol spots
stori na piksa**

6-pela pes olgeta

- pes 27-32

**Moa nius
bilong
Amerika i
pait na ol
ovasis nius**

- pes 16-17

**Ol ripot bilong
Hailans**

- pes 7

**200 Saina
man i kam long
painim bisnis**

- pes 3

Gavman laik kamapim fri edukesen

EDUKESAN minista Muki Taranupi i tokaut long dispela wik olsem kabinet i redim wanpela sabmisen bilong kamapim gen fri edukesen polisi long kantri stat long neks yia.

Em i tok em i gat olgeta sapot i kam long Pipel's Demokratik Muvmen (PDM) pati memba husat i tok orait long gavman i mas peim skul fi bilong olgeta edukesen instituisen insait long kantri.

Dispela bai kamapim gen fri edukesen long kantri.

"Planti hevi bilong mani i kamap long kantri na tu prais bilong ol samting i go antap tru na we bilong mekim mani long ol rural eria i hat tru na ol pipel

i kisim taim tru long mekim mani," Mista Taranupi i tok.

Em i tok dispela i mekim na planti ol pikinini i no go long skul bikos ol i no inap peim skul fi.

Mista Taranupi i tok olgeta PDM memba i bin bung long wanpela miting na ol i wanbel long tingting bilong bipo praim minista Paias Wingti long kamapim fri edukesen long kantri gen.

"Em gutpela tingting long bringim bek fri edukesen long kantri bikos mama lo i tok edukesen em i rait bilong olgeta pikinini long kantri," em i tok.

Mista Taranupi i tok Mekere gavman i gat tingting tru long ol

pipel olsem na ol laikim fri edukesen long kamap bek long kantri.

Em i tok sabmisen bilong em i go long gavman i no bikpela samting na em i laikim bai ol painim hat tru long baim skul fi bilong ol pikinini bilong ol olsem na mi gat bilip olsem kabinet bai tok orait long sabmisen na putim mani bilong pravitaisesen i go insait long sapatim dispela," Mista Taranupi i tok.

"Ekonomi bilong kantri i nogutpela na ol papamama i painim hat tru long baim skul fi bilong ol pikinini bilong ol olsem na mi gat bilip olsem kabinet bai tok orait long sabmisen na putim mani bilong pravitaisesen i go insait long sapatim dispela," Mista Taranupi i tok.

Em i tokaut long olgeta papamama long kantri olsem bai

gavman i tok orait long dispela bai dipatmen i no inap isi na ol bai stat long brukim ol gutpela tingting bilong kamapim gut fri edukesen long kantri.

Mista Taranupi i tok fri edukesen bai stap olsem inap ekonom i bilong kantri i kamap gutpela liklik na ol papamama i ken mekim mani bilong lukautim ol pikinini long peim skul fi.

Em i tok bai nogat toksave long amas mani bai go insait long kamap fri edukesen tasol em i tok bai em i wetim 2002 baset bilong nesenel baset long kamap pastaim.

Mista Taranupi i tok em bai tokaut long dispela samting taim baset i kamap klostu taim.

Pait surukim Osama bin Laden na Taliban gavman i go ausait

AMERIKA NA TERORIS WOA

OL Noten alaens soldia husat i bung wantaim ami bilong Amerika long pait wantaim ol teroris birua lain bilong Osama bin Laden na ol ami bilong Taliban i pait strong na i go insait long kapitil siti Kabul long las wik Fraide. Dispela i soim olsem ol i rausim gavman bilong Kabul na tekova long siti. Ol i gat olsem 6,000 ami i stap insait nau long Kabul.

Ol Noten alaens i laik hariap kamapim gavman bilong lukautim kantri tasol presiden bilong Amerika George Bush i tok ol i no ken hariap inap olgeta lain we i kam long wanwan grup insait long Afghanistan i kamap long kamapim gavman we i ken makim olgeta lain gut.

Amerika i pait tu egen-sim ol ami bilong Taliban bikos Amerika i tok



• Paitman bilong Noten Alaiens i amamas taim ol i winim kapitil siti Kabul. Raithan: Osama bin Laden.

Taliban i mas kisim sas tu long haitim na sapatim ol teroris grup we i wok long kamapim birua na hevi long ol gutpela manmeri. Na tu Taliban i kisim hevi tu long lukautim birua man, Osama bin Laden.

Ripot i tok taim ol ami bilong Noten alaens i go insait long siti long Mande, i nogat wanpela ami bilong Taliban i stap na i soim olsem nogat gavman bilong Taliban i stap long lukluk long hevi

bilong ol pipel. Moa long 8,000 soldia bilong Taliban i lusim siti na go aut taim ol lain ya i kam insait na tekova long siti.

Tasol birua man Osama bin Laden i bin tokaut pinis olsem maski ol ami i kam na surukim ol i go aut long Taliban, ol bai go long maunten na pait i kam.

Bin Laden i tok em i save olsem Amerika i laik holim em o kilim em tasol em i no inap givim em yet isi na em bai pait inap long dai bilong em.

Bin Laden i givim tok lukaut tu olsem grup bilong em i gat ol strongpela samting bilong pait olsem marasin bom (kemikol wepon) we inap bagarapim planti lain tru. Na ol bai yusim sapo Amerika i yusim marasin bom pastaim lokng ol.

Ripot i kamap i tok Amerika presiden George Bush i amamas long



wanem samting i bin kamap tasol em i askim ol ami bilong Noten alaens long noken mekim nabaut na i mas gat rispek long laip na sindaun bilong ol gutpela manmeri. Olsem na ol i mas wet inap olgeta lain i kamap gut long ol i ken go het na makim gavman we i stret na makim interes bilong olgeta lain insait long Afghanistan.

Dispela pait egensim ol teroris birua em Amerika, Britis na Australia i stap insait na sapat wantaim. Ol asples lain bilong Noten Alaens i go pas long soim ol rot na ol samting long hap we ol i bungim strong wantaim na pusim ami bilong Taliban i go aut long Fraide las wik.

Ripot i tok ol i kilim pinis sampela 600 ami we planti bilong ol em ol Pakistan na Kashmiri pait man husat i joinim Taliban ami long Afghanistan. Ol i tok ol i holim 100 lain na putim long kalabus i stap.

Ripot i tok tu olsem sampela 100 soldia we ol i yangpela rikrut em ol i kilim tu we ol i wok long hait insait long ol skul eria i stap.

I bin gat bikpela amamas long siti taim ol Noten alaens fos i go insait na surukim Taliban soldia i go aut long Fraide.



• Ol Noten Alaiens ami tekova long Kabul taim ol Taliban i ronawe.

PLIS RIPOT

MOSBI: Plis i wok long painim yet husat man tru i bin paitim Siti Edministreta bilong Mosbi, Bernard Kipit las wiken. Ripot i tokaut olsem wanpela man i bin paitim Mista Kipit nogut tru na em i wok long kisim marasin i stap long dispela samting.

Plis i tok ol i kisim wanpela ripot i kam long Mista Kipit na ol i wet i stap long save husat tru i bin givim bagarap long Mista Kipit.

* Plis i wok long traim painim yet husat tru i bin pulim foapela wokmeri bilong Air Niugini las wik na repim ol. Planti raskol tru i bin hansapim ol woklain bilong Air Niugini na pulim foapela meri ya.

Ol plis i wok strong yet long painim husat tru i mekim dispela rong.

KIMBE: Raskol i brukim haus bilong wanpela volentia bilong Australia na stilim olgeta samting bilong haus na ranawe i go. Ol raskol i holimpas hausmeri bilong man ya na ol i paitim man tu long het bilong em. Plis i holimpas sampela yut long klostu setelmen na askim long painimaut na mekim save long husat i mekim rong.

WAU: Plis i holimpas 6-pela man husat i bin brukim sel na ranawe long Wau plis stesen las wik. 12-pela man olgeta i bin brukim sel tasol plis i holim 6-pela bihain long ol i bin mekim wanpela spesol operesen las wik.

Plis i askim husat of manmeri long tokaut long wanem hap'ol narapela raskol i stap bai ol i ken kamap long han bilong lo.

MENDI: Ol plis long Sauten Hailans i paul long husat lidaman tru bai ol i harim toktok bilong em long wanem Anderson Agiru i tok edministreta em i makim em rait man na i no narapela. Tasol Philemon Embel i tok em i no tru. Ol Task Fos bilong Hagen i go long Mendi long lukluk long dispela samting na stapim trabel namel long ol sapota.

Wok bung long daunim hevi, Kupo i tok



• Wanpela opisa i soim Mista Kupo (namel) i lukim welkamim mas bilong em long Bomana Plis Koles wantaim namba tu bilong em Sam Inguba (raithan) las wik. Foto: PEKU PILIMBO.

PEKU PILIMBO i raitim

WOKBUNG wantaim komyuniti bai daunim raskal pasin insait long kantri.

Nupela Komisina bilong Plis Joseph Kupo i bin mekim dispela toktok taim em givim namba wan pablik toksave bilong m i go long olgeta plis manmeri bilong Bomana Plis Koles las wik.

Em i tok olgeta hevi bilong raskal pasin i bikpela long komyuniti na olgeta plis manmeri i mas wok bung wantaim olgeta pipel bilong komyuniti long rausim dispela hevi.

Mista Kupo i tok amamas olsem gavman i luksave long em na makim em Komisina na em bai i no inap larimdispela bilip i lus nating. Plis i mekim gutpela wok i kam tasol raskal pasin i wok long go bikpela yet na em askim olgeta plis manmeri long ol bai stretim dispela hevi.

Em i tok planti stil pasin i save kamap na bagarapim gutpela nem bilong kantri na planti bisnis manmeri husat tingting long putim mani i kam insait i no save pret na dispela i stapim developmen i kamap.

Taim bilong em olsem komisin, em i laik lukim olgeta manmeri long komyuniti na plis i wok bung wantaim na daunim hevi bilong raskal na kamapim bisnis bilong bringim developmen long kantri.

Mista Kupo i askim ol plis long askim ol yet olsem ol i mekim wok bilong ol gut.

Em i tok ol plisman i noken mekim ol samting we i rong long ai bilong ol pablik na

kisim sapot bilong pablik long mekim wok bilong ol.

Em i tok plis i gat bikpela wok long mekim insait long ileksen bilong neks yia.

Bikpela laik bilong em long luksave olsem wok bilong plis i mas stap ples kliia na plis husat mekim wok nogut i mas kisim mekimsave.

"Olsem nupela komisina bilong plis, planti bilong yupela tude i ting mi bai mekim wanem samting tru. Mi laik tokim yupela olsem mi bai strongim lidasip bilong plis fos na mi laikim narapela ol opisa i mas bihainim mi," Mista Kupo i tok.

Long stat em bai sanap strong long bringim gutnem bilong plis i kam bek na laikim olgeta plis manmeri long pilaim pat bilong ol na wok bung wantaim ol komyuniti.

Mista Kupo tok bikpela amamas bilong em i go long famili bilong em husat sapotim em inap em kamap komisina bilong plis long Papua Niugini.

Planti pipel bung long lukim ol plis manmeri mas na amamas wantaim nupela komisina bilong ol. Namel long ol manmeri em tupela papamama bilong Mista Kupo.

Planti senis long Sauten Hailans i no gutpela long provins

JACKSON SIKU i raitim

SAUTEN Hailans provins em i kamap olsem wanpela paul meri bilong politiks insait long lokol levul gavman Tukupangi long lalibu distrik, i tok.

Paise Wallis mekim dispela tok bihain long Nesenel Memba bilong provins, Anderson Agiru na Milerin Philemon Embel tupela i laik haphap na wok long pulim ol kaunsila bilong provins i go kam na sensim ol edministreta klostu klostu long provins.

Taim Nesenel Eksekutiv Kaunsil makim Pila Niningi, em i no stap longpela taim na narapela edministreta ya kamapim kisim ples bilong Niningi bihainim disisen bilong Nesenel Eksekutiv Kaunsil gen taim ol i bin bung long Hagen, Westen Hailans provins long Jun 2001.

Em wanpela Edministreta bilong Nipa kot i givim pawa gen long Anderson Agiru, ol nem long Sauten Hailans provins i toktok, planti olsem Edministreta tu bai senis nau, na wok long senisim i go kam gut.

Mista Wallis i tok, sapos kain senis olsem i kamap klostu klostu long Edministreta posisen, ol pipel bilong Sauten Hailans bai kisim taim stret long planti sevis bilong ol. Em i tok tu olsem planti manmeri bilong provins i no laikim dispela kain pasin bilong senis.

Mista Wallis i tok, las yia long mun Oktoba 2000, Nesenel Gavman bin rausim pawa bilong Gavana Agiru na makim Pila Niningi olsem Edministreta bilong Sauten Hailans provins tasol planti moa long provins i no laikim Mista Niningi long long wanem, ol i tok i no wanpela pablik sevan insait long provins."

Pangu presiden tok larim PNG bisnis baim PNGBC

WANPELA bisnisman bilong hailans Pate Wamp i tok gavman mas larim ol supa fand na ol narapela bisnis bilong Papua Niugini yet i baim Papua Niugini Benking Kopopresen (PNGBC).

Mista Wamp i bilip olsem sapos gavman i tingting strong long daunim ol dinau orait dispela we tasol bai helpim gavman.

"Dispela bai helpim kantri long planti we bikos ol lain insait long kantri yet bai kamap papa long bisnis na ol yet bai save gut long we bilong helpim bisnis i ran gut," Mista Wamp i tok.

Em i tok ol sevis benk i laik givim bai ol nupela papa long bisnis i lukluk gut na givim ol kastoma bai ol i ken kisim gutpela sevis.

Mista Wamp i tok planti ol bisnis bilong gavman em benk bai kisim olgeta



• Pate Wamp.

ol i baim bai PNGBC i ken kamap bisnis bilong ol pipel yet," em i tok.

Mista Wamp i tok yet olsem taim ol pipel bilong PNG yet i kamap papa long ol bisnis em gavman i laik salim orait mani bai stap insait long kantri yet na bai nogat ausait bisnis i kisim mani taim ol ovasis bisnis i baim benk.

Em i tok sapos praive-taisesen i kamap orait politiks i noken kam insait long ol bisnis na husat ol politisen i mekim olsem bai lo i mas mekim save long ol.

Mista Wamp i tok ol bod memba bilong ol bisnis i mas kamap long ol lain husat i kontribut long baim bisnis na nogat politisen i ken makim ol memba.

Em i tok larim ol supa fand yet i makim ol edministreta na menesa bai bisnis i ran gut long helpim ol pipel.

WANTOK
 All departments, Phone: 325 2500 - Fax: 325 2579
 P. O. Box 1982, Boroko, NCD, Papua New Guinea

Publishing Weekly, Thursday, for
 Word Publishing Company Ltd.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Company Ltd.

General Manager and Group Editor in Chief: Anna Solomon
 Advertising Manager: [Name]
 Editor of Wantok: Yakam Kelo

Papers distributed by air throughout PNG. Available by air mail subscription within Papua New Guinea and overseas.
 Email address: word@global.net.pg

Advertising deadlines, Display bookings: Tuesday midday. Camera ready copy: Wednesday midday. Classified Advertising: Wednesday 5pm.

Word Publishing Company Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Ltd. and are set out in full on the reverse side of its official display Advertising Bookings form.

TORO

OL MAN LONG PLES I LAIK GO PAINIM PIG LONG BUS NA TORO BIHAINIM OL...

TORO GO LONG PLES... EM FES TAIM TRU NA EM I NO SAVE LONG STAIL BILONG PLES... MANGI MOSBI...

TORO, YU STAP!! NOGUT, YU LIS.

YU SINDAUN LONG HIA NA HARIM NOIS, OKE?

SMOL TINGS!

TORO SINDAUN LONG TUDAK NA EM PRET NOGUT TRU...

AIVOO! NOGAT NOIS YAH...

EM TING EM YET I SINDAUN NA OLGETA IGO PINKS... BAGA EM KALAP NA SINGAUT...

SWASS!

RATOL!

BIARY KANAKA! MERIM NA OL DIK I RONAWA PINKS!

Ol Maikro Fainens resolusen bilong Bogenvil

MAIKRO Fainens woksop bilong ol Bogenvil meri long Arawa i bin kamap wantaim 10-pela resolusen.

Dispela em bihain ol i glasim na skelim gut olgeta samting i sut long dispela skim bilong ol.

Orait, ol i bin wanbel na kamap wantaim 10-pela mak o ol samting we ol lain i aplai long kisim Makro Fainens skim dinau mani bai i mas inapim pastaim long en. Dispela em:

- Ol apliken i mas afiliet memba bilong Bogenvil Provinsel Kaunsil bilong ol Meri;
- Ol i mas yusim dispela dinau mani ol i ksim lojg kirapim nupela bisnis o long skruim i go dispela bisnis o projek ol i kirapim pinis na wok long en;
- Wanpela meri o wanpela meri grup i mas papa long dispela bisnis;
- Bisnis we ol i laik kirapim i noken mas wok egen-sim o kamapim hevi long sosel, politikel, rilijes na gutpela pasin bilong ol asples lain;
- Bilong kirapim nupela bisnis, meri i aplai long kisim dinau long Maikro Fainens skim i mas kisim trening pastaim;
- Wanpela Kredit opisa i mas helpim long redim ol pepa wok long wokim bisnis proposel;
- Bisnis we ol meri i ksim dinau long en i mas operet yet long Bogenvil na i no long ausait;
- Aplike i mas memba bilong ol meri grup we bai i gat faipela (meri) memba tasol long en;
- I mas gat bekgraun infomesen long meri i aplai long kisim lonmani; na
- Aplikesen fi em long K10.

Mak bilong kisim dinau mani long kirapim nupela bisnis em long K3,000. I nogat mak long daunbilo mak long en.

Mak long aplikesen long kisim dinau mani long go hetim bisnis we i bin statim pinis em long K5,000.

Ol bai givim wanpela mun long greis o trail piriet na 12-pela mun long peim bek dinau mani. Bai i gat 10 pesen intres reit long dinau mani long en.

Stan Basiou i makim Yuropien Yunien i tok Rurel Developmen Beng bai lukautim dispela makro Kredit Skim mani bilong em.

Arawa hostim meri woksop na AGM

SAMTING olsem 30 meri lida i bin bung long Arawa las wik bilong holim wanpela wik woksop na Anuel Jenerel miting (AGM) bilong ol.

Dispela em ol meri i makim ol 12-pela distrik insait long Bogenvil na ol i eksekutiv memba bilong Bogenvil Provinsel Kaunsil bilong ol Meri (BPCW).

Woksop ol bin holim em i

bilong Maikro Fainens skim o ol liklik bisnis projek skim bilong ol meri long provins. Woksop i bin skulim ol meri tu long "Good Governance" o rot bilong lukautim gut ol samting, gavman, ogenaisesen, opis o ol samting we yumi i kirapim.

Dispela woksop i bin ron long tripela de stat lojng Mande inap long Trinde. Long laspela tupela de em long Fonde na

Fraide, AGM i bin kamap.

Bikpela tingting bilong holim dispela Maikro Fainens woksop em long strongim ol meri na ol i ken skruim wok long stap insait long ol wok mani na developmen bilong ol yet, famili, komyniti na provins.

Woksop i bin lukim olsem ol Bogenvil meri i laik kirapim ol liklik projek na helpim ol long go ehtim laip na sindaun bilong ol

bihain long hevi i bin bagarapim olgeta rot long kisim mani long en.

Long dispela woksop, ol meri i no bin isi long autim toktok na tingtign bilong ol long dispela skim we ol i lukim olsem bai givim sans long kam long stap insait long wok developmen bilong provins.

Yuropien Yunien (EU) i bin fandim dispela woksop na AGM wantaim K25,000. Dispela mani i bin karamapim trenspot bilong kisim ol meri long olgeta hap bilong ailan i kam long Arawa, ples bilong slip long en na ol samting we ol bin yusim long woksop.

Stan Basiou husat i makim EU long woksop i bin tok EU i luksave long kontribusen bilong ol meri na ol mama inait long wok builong painim gutpela sindaun long Bogenvil na em i givim dispela helpim mani long ol. Em bin tok dispela Maikro Fainens Skim bilong ol Bogenvil meri em EU bai fandim tu.

Woksop i bin paitim toktok i go na i kam long mak bilong dinau mani we ol meri i inap kisim insait long wanpela yia na ol i bin putim mak olsem Kol lain i laik kirapim nupela bisnis inap long putim aplikesen long kisim K3,000 meksimum na ol lain i laik skruim projek inap long kisim K5,000.



• Ol Bogenvil meri long Arawa woksop. Foto: VERONICA HATUTASI

Bogenvil kirapim Maikro Fainens skim

BOGENVIL i kirapim wanpela dinau mani skim o rot we ol liklik pipel bilong ples i nap long kisim helpim long en.

Ol i kolim dispelas long Bogenvil Maikro Fainens Skim (BMFS).

Provinsel Komes Divisen i kodinetim dispela skim na ol dona ejensi olsem AusAID i putim mani long en.

Provins i kirapim na go hetim dispela skim bikos long hevi we ol grasrut pipel i bungim taim ol komesel beng i no larim ol long kisim dinau mani long ol.

Na long taim Bogenvil i wok long kamap gutpela, ol lidaman i mas helpim ol manmeri long kamapim na ranim ol liklik wok bisnis na stretim sindaun bilong ol.

Wanem ol kain helpim i kam long gavman na ol NGO i mas skelim long ol gutpela rot na strongim ol manmeri long ples long kirapim ol liklik beng bilong ol insait long ples.

Bogenvil maikro fainens skim em i wanpela long ol dispela rot pipel i wok bung wantaim na sevim mani long stretim sindaun bilong ol yet long ples. Dispela em i olsem wanpela haus mani we bai larim ol manmeri long ples i putim mani na givim sevis long ol grasrut pipel long Bogenvil.

BMFS i bilong helpim ol pipel bilong ples long kamapim mani ol yet. BMFS i givim sevis long sevim mani na givim dinau mani o lon long ol manmeri long ples husat i no inap long kisim dispela

kain sevis long ol komesel beng.

Long Bogenvil i gat bikpela luksave olsem BMFS i gutpela tru na i helpim gut ol grasrut pipel long ples long kirapim ol wok kamap na go hetim sindaun.

Sampela ol projek, rot na wok we BMFS i helpim ol pipel long en em, bilong rerim ol manmeri long senis bilong tude, strongim ol ol long kirapim ol wok kamap na ol wok mani bilong ol yet, rausim pasin bilong wantok sistem na wan sait, helpim ol wok kamap na ol liklik wok bisnis insait long ples, bihainim laik bilong ol manmeri long ples long wanem kain wok kamap ol i laik kirapim long ples, painim ol nupela rot na wok bilong ol grasrut pipel na lukautim gut ol samting i stap long asples.

Ol meri grup karimaut aweanes na literesi edukesen

LITERESI Program long Bogenvil i wok long go het wantaim ol wan wan grup i skruim dispela wok long olgeta hap bilong ailan.

Bogenvil Intesios Wimens Forum (BIWF) i wanpela long ol namba wan grup long ailan we i bin stat long karimaut dispela wok long yia 1994 yet.

Kodineta bilong BIWF Sister Lorraien Garasu i tok literesi program em i wanpela long ol tripela program we grup bilong em i karimaut long ailan. Narapela tupela program em long Smol Bisnis program na Sosel Jastis program.

Sister Lorraine i tok long ol dispela program, ol i no lukluk tasol long ol samting i sut long tripela R. Dispela em long R Restoresen, Rikonsiliesen na Rihabilitesen, nogat.

Em i tok long ol program ya, ol i save karimaut planti aweanes long politikel, developmen, envaironmen na sosel isu.

Em i tok grup bilong em i no save go insait nating long ol ples bilong karimaut ol wok. Ol i save kisim singaut long ol komyniti bipo ol i go insait long karimaut ol program bilong ol.

Em i tok tu olsem ol dispela program we ol i save karimaut em ol i save skelim na glasim laik bilong ol pipel insait long wan wan komyniti na wokim ol program bihainim dispela laik yet bilong ol.

Em bin tok bikpela samting we ol i laikim aweanes long kamapim em long ol pipel i klia long ol samting i sut long politiks, ol wok long painim gutpela sindaun, envaironmen, helt na ikonmik isu na ol bai glasim na skelim ol samting na ol i ken kamap olsem ol gutpela manmeri insait long ples, komyniti, skul na kantri.

Sister Lorraien i bin tok i gutpela long givim pawa i go long ol pipel insait long ol program tasol wanpela samting i kamap long dispela

taim em i nogat gutpela kodinesen o wok bung wantaim namel long ol wan wan grup.

Em bin tok long dispela taim, Bogenvil i wok long laik kamap wantaim wanpela histri edukesen program bilong provins na ol pikinini i ken lainim ol samting i sut long provins. Dispel sut long provins bilong ol yet.

Em bin tok wanpela saveman bai kam long London Ingran na wok wantaim grup bilong developim dispela Edukesen plen bilong Bogenvil.



Sospen projek • Ol meri long Buka i gat wanpela sospen projek.



• **Wewak komyuniti pulim UNDP deliget i go long opim UNDP projek.**

Wanpela nius man i dai

MATHEW Paiyau, wanpela nius riptoa wantaim Daiosis bilong Aitape i dai long Tunde dispela wik long Raihu Rurel Helt Senta long Aitape.

Mathew i save salim planti nius stori i kam long Wantok na Independent Niuspepa tu.

Em i bin painim sik malaria long wiken na i go long haus sik tasol dai long Tunde bihainim sampela hevi.

Em i bilong ples Ulau long Is Kos bilong Aitape.

Long 1980 em i bin kisim trening olsem wanpela nius ripota long Communication Institute na wok sotpela taim wantaim NBC radio. Bihain em lusim na wok long taim liklik wantaim Telair bipo long em i lusim wok na i go bek long Ulau long i

stap wantaim famili bilong em.

Long mas 2000 Mathew i bin stat wok wantaim komyunikesen opis long Daiosis bilong Aitape.

Mathew i wanpela gutpela ripota wantaim



• **Mathew save i bin wanpela strongpela memba bilong Aitape Communication tim.**

gutpela presen bilong raitim ol stori na save wok wantaim bikpela tingting bilong helpim ol pipel bilong em.

Em i bin helpim long kisim piksa, raitim stori na stretim Nius leta bilong Aitape Asdaiosis ol i kolim Aitape Star.

"Long planti krismas mi wok olsem wanpela niusripota, mi no save lukim planti kain man olsem em husat hariap tru kisim save bilong rit na raitim niuspepa na kliaim tingting bilong ol pipel long rurel eria," wanpela wanwok bilong em Adam Elliott i tok.

Olgeta taim em i save raitim stori ol stori na mi ting olsem yumi lusim wanpela man husat save kisim tingting bilong ol lain long ples stret na putim aut long ol manmeri bilong kantri i ken lukim," em i tok.

Ol i kisim bodi bilong

Paiyau i go aste long plesUlau bilogn planim. Em i lusim bihain meri na famili bilong em.

Yut de long Wewak

LONG Yut De 2001 long Wewak, Antioch Yut Movmen i go pas long wanpela wiken wantaim ol yut long Sen Mary's Skul long Wewak.

Ol 180 skul yut wantaim Antioch Yut grup ol i kam bung na slip long skul graun long 3pela de. Ol i harim ol toktok i save kamap long Antioch wikend na ol i bung na wok wantaim ol 22 papamama bilong Antioch. I gat tupela lain i givim toktok na ol lain i mekim musik.

Ol i stat wantaim Fr Cornelius, bipo em i stap insait long ol Antioch Grup, long Fride apinun. Long Misa long Sande Bisop Tony i tokim ol yut i mas redi long karim kruse insait long laip bilong ol na bihainim Jisas. Olgeta de ol i mas redi long mekim ofa long God long olgeta samting bilong amamas, ol samting bilong wok na long olgeta hevi i kamap olgeta de. Ol i

mas redi long mekim wok bilong God olgeta de. Dispela em i bun long moning ofa.

Bihain long Misa ol i mekim kendel lait prosesio i go antap long Wirui saun sel. Ol papamama na famili bilong ol yut i wet i stap bai ol i kam antap bihain long dispela wikend ol i mekim wantaim Jisas insait long Antioch. Ol lain i amamas tru long lukim ol pikinini i kam na prosesio

Olgeta i givim witness insait long saun sel na sing na danis long ai bilong ol inap long wan aua.

Samting olsem 1000 papamama na ol arapela lain i kam bung long amamas long ol. Ol yut long Boram Paris i mekim musik long saun sel.

Dean long Wewak, Fr Liam Dunne i pasim bung bilong ol wantaim Bisop Tony wantaim pre na blessing.

Vanimo i sambai stap

VANIMO nau i stap long bikpela was bihainim nius long dai bilong Wes Papua lidaman, Theys Eluay long las Sarere.

Ol ripot i kam long Vanimo i tok sampela toktok i kamap long Vanimo plis olsemol sampela ejensi olsem Katolik Sios i mas stap redi tasol long sampela samting i kamap bihainim dai bilong bikman.

Ol ripot i tok ol atoriti i no tok orait yet long ol wok bilong imejensi redi tasol ol i luksave long hevi bai i kapsait i kam long PNG sait bilong boda long Indonesia.

Ol ples long PNG/Indonesia boda i save bungim hevi taim trabel i kamap namel long Indonesia na Wes Irian.

Ol gavman atoriti long

Vanimo nau i wok long monitaim situesen bikos olsem ol arapela taim, oo Wes Papua lain i save ronawe i kam long hap sait bilong PNG taim hevi long sait bilong ol i go nogut.

Long wankain taim, planti pipel long Wes Papua i singaut long wanpela niutrel komisn ov inkwairi i karimaut ol wok painimaut long kilim

dai bilong leit lidaman Mista Eluay.

Katolik Bisops Konfrens long wanpela stetmen i tok ol i kirap nogut tru na sori long harim nius bilong dai bilong bikman lida Mista Eluay. Na ol i askim Indonesia long kisim i kam aut ol dispela lain i kilim dai bikman ya na kot i ekn wokim disisen long ol.

Kirapim bek Boda developmen fan

ASKIM i go nau long Nesanel Gavman bilong kirapim bek boda developmen fan long helpim ol pipel i stap long PNG /Indonesia boda.

Vais Minista bilong Tred na Industri na Vanimo/Grin Micah Wes i tok gavman i mas glasim gen disisen bilong em long rausim dispela boda developmen fan.

Em i tok namel long ol yia long 1970 na 1980, ol boda pipel i save kisim gutpela helpim long long ol projek we dispela boda developmen fan i save kamapim long en.

Mista wes i tok bikos long nogat mani bilong ol boda developmen projek, ol wok long ol rot samting long ol boda distrik i no kamap.

Em i tok ol Indonesia lain i bildim pinis trens boda haiwe i joinim Jayapura wantaim Merauke long saut na tu, Indonesia i sanapim ol skul na helt senta long ol boda ples tasol PNG gavman i no wokim tumas samting.

Em i tok dispela trens boda haiwe long Vanimo i go long Grin Riva i no pinis yet. Em i tok em i abrusim pinis 30 krismas taim ol bin stat long wok long dispela rot long Vanimo tasol rot i no kamap yet long Grin Riva. Em i stop tasol long Bewani.

Mista Wes i tok em i luk olsem gavman i no bisi long nesanel sekjurit bilong kantri.

Em i tok planti taim ol pipel i stap long ol boda eria i save kisim hevi long independens pait bilong ol Melanisen pipel bilong Wes Papua.

Long wanpela wokabaut bilong Mista Wes i go long Jayapura i no long taim i go pinis, em bin autim wari bilong em long deputi gavan bilong provins. Na askim gavman biolong Indonesia long luksave olsem PNG em i wanpela independen kantri na olsem Indonesia i mas stapim ol pipel long no ken abrusim bodamak na kam insait long PNG long painim pis o wokim ol arapela kain samting.

Em bin tok bikos i nogat inap mani, nogat gutpela trenspot na komyunikesen sistem, ol gavman opisa i no inap long karimaut gut wok long was long boda eria.

Olsem na em i singaut strong long gavman long givim mani helpim i go long ol provins olsem sandaun, Westen na Bogenvil husat i save serim ol intenesenel boda na ol i ken karimaut gutpela wok long was.

Em i tok strong tu long Nesanel Gavman i kirapim bek boda developmen fan i go long ol boda peovins.

FM Central

-89.9 MAORO

PURA SIVARAI

9 am every Saturday

with

Baeau Tai

on 89.9 FM Central

P. O. Box 333

Port Moresby, NCD 111

PAPUA NEW GUINEA

Phone: (675) 321 0533

Fax: (675) 321 0375

Email: fmcentral@global.net.pg

Anike Gart kamap siameri bilong wok lotu

YAKAM KELO i raitim

GAVANA bilong Morobe Luther Wenge i makim Anike Gart olsem siameri bilong wok lotu insait long kabinet bilong em long las wik Fraide.

Misis Anike Gart em wanpis meri husat i makim ol meri insait long Morobe provinsal asembli. Em i bin kisim dispela luksave long kamap siameri bilong wok lotu bihain long Gavana Wenge i rausim kaunsil presiden bilong Aseki, Jacaraia Kapise long dispela wok bilong em long las wik.

Ripot i kam long Morobe administresen olsem Mista Kapise i no

bin mekim gut wok olsem siameri bilong wok lotu olsem na dispela senis i kamap. Wantok i hat long toktok wantaim Mista Kapise long Tutumang Haus.

Misis Gart i gat 6-pela mun i stap long mekim wok bilong em olsem siameri bilong wok lotu insait long Morobe provins. Dispela 6-pela mun bai pinis long mun Julai long neks yia we nesanel ileksen bai kamap na bihain long en em kaunsil ileksen bai kamap.

Ripot i tok Misis Gart i wanpela meri husat i save wok klostu tru wantaim ol meri long wok bung bilong sios rta ol arapela komyuniti wok bilong ol meri insait long Lae siti na Morobe provins tu wantaim.



• Anike Gart nupela siameri bilong wok sios insait long Morobe Provinsal Gavman.

Hevi bilong lo na oda long Wau Bulolo i stapim bia

EGAREKA GREG NOINE i raitim

HEVI bilong lo na oda long Wau na Bulolo taun i mekim na Morobe Edministreta Manasupe Zurenuoc i sapot long stopim bia insait long tupela taun wantaim stat long Oktoba 30 na bai i go inap sampela taim bihain.

Mista Zurenuoc i tokaut long bung wantaim ol komyuniti lida long Wau olsem dispela eksen em namba wan step bilong wok i go insait long hevi bilong lo na oda insait long tupela taun ya. Long dispela taim tu, ol i wanbel long kamapim wanpela yut sevis we Wau Bulolo taun lod meya Bruno Pambel i go pas long en.

Ol komyuniti lida i autim bel hevi bilong ol long hevi bilong lo na oda, hevi long wok bilong helt, edukesen na plis fos.

Long dispela taim tu sampela haus slip bilong ol plisman i pas pinis bikos helt opis i rausim ol long wanem i nogat gupela toilet eria na tu ol haus i olupela na bruk nabaut pinis. Wankain tu long plis sel we i bagarap olgeta tasol nau ol wok mentenens i wok long kamap long plis sel. Haus bilong ol plisman tasol i wok long wetim tenda i kam long Provinsal Tendas Bod long op long ol kontrak i kisim na go stretim ol dispela haus bilong ol plisman.

Ol skul tisa tu long Wau i bin salim strongpela pas i go long gavman atoriti long lukluk insait hevi ol i stap long we i bagarapim wok bilong ol long givim edukesen long ol pikinini. Ol i komplek long hevi bilong lo na oda i mas kamap orait, pasin

bilong hensapim ol pablik sevans na kisim mani na ol samting bilong ol na tu holim na bagarapim ol wokmeri.

Wankain tu ol helt woka i mekim wankain strongpela singaut i go long Deputi Provinsal Edministreta na Provinsal Helt Program Edvaisa long stretim hevi bilong ol long sait bilong gupela haus, sekyuriti sevis long-gol helt divisen long Wau taun na ol arapela wari na komplek moa. Ol helt woka i tok strong olsem sapos ol dispela wari bilong ol i nogat gupela bekim long en, orait ol bai tingting long trensefa i go nabaut long arapela provins o risan long wok.


Long dispela taimtu plis long Wau i holim pinis 6-pela kalabus lain namel long 12-pela lain husat ibin brukim Wau rum gad na ronawe.

Mausman bilong plis i tok tupela bilong ol kalabus em ol pipel i holim na givim na foapela em ol plisman i holim bihain long ol i kisim sampela ripot long dispela. Plis i holim na sasim ol dispela lain bihain long spesel plis operesen long las wik.

Morobe pipel i isi tumas long rejistaim nem long ileksen buk

Ol pipel i stap long Lae siti i kisim tok long ol i mas putim nem bilong ol long komon rol bai ol i ken vot isi tasol long nesanel ileksen long neks yia.

Lae Distrik Edministreta Patilias Gamato i mekim dispela toktok bihain long ripot bilong dispela wok i soim olsem ol manmeri i no smat long putim nem long komon rol buk.



• Planti lapun bilong Kabwum i stap long bikbus bilong Kabwum na i no witesim pikinini bilong ol i kisim namba bilong Minista tasol lapun Qangengke Kawop i kamap long Mosbi na i bungim stret dispela samting.

Morobe Gavana Luther Wenge tu i bin mekim bikpela toktok long dispela pasin bikos planti manmeri tru long Morobe provins i no bin putim nem bilong ol long Komor. Rol buk.

Dispela hevi i kamap ples klia long Makam na Finsafen we ol bikpela ples na komyuniti we i gat namba olsem 300,000 i gat 2,000 manmeri tasol i putim nem long

Plis i holim tupela man long kilim waitmeri

PLIS i holim pinis tupela man we plis i ting i bin kilim wanpela waitmeri long Lae las yia.

Tupela man ya em Peter Kaupa Kerowa bilong Boki viles long Gumini long Simbu provins. Plis i holim em gen bihain long em i ronawe long Buimo haus kalabus na plis i holim em gen bihain dispela sas bilong kilim waitmeri ya tu wantaim sas bilong stil.

Em i kisim sas nau long ronawe long haus kalabus we i go antap long tupela sas em i gat pinis. Em i no sanap long kot yet.

Narapela man ol plis i ting em i mekim dispela trabel tu Beno tumunbilong Beon long Yangoru long Is Sepik provins.

Plis i tok ol i bin holim Beno long Ogas dispela yia na em i wok long sevim sas long 10-pela mun long holim ol samting bilong pait, kilim

man i dai na stil.

Plis i bilip ol i gat moa luksave long narapela tupela trabel lain husat tu i bin stap insait long dispela birua we ol i kilim dai dispela waitmeri long las yia.

Waitmeri ya em Helen Suzanne Nish bilong Australia na em i save wok wantaim Brian Bell kampani long Lae.

Ol raskol i bin kilim em long Novemba 6 las yia taim em i bin draiv long ka i kamap long wok long moning. Ol raskol i sutim em long naip long beksait bilong em na naip i kisim em long lewa bilong em we i kilim em stret. Ol i bin sutim em long sotgan tu.

Ol raskol lain ya i pulim han bek bilong em na kisim moa long K4,000 wantaim sampela sek mani na ronawe.

Pipols First Pati askim ol pipel long makim gut lida

PRESIDEN bilong Pipols First Pati, Mesekere Ambunzinga i askim ol pipel long skelim gut ol lida na makim ol insait long 2002 nesanel ileksen.

Em i salensim ol manmeri husat bai vot long noken votim ol wantok na famili bilong ol yet nating o kisim ol gris mani long

taim bilong ileksen. Mista Ambunzinga i tok long taim kantri i wok long go insait long kainkain hevi bilong mani na bisnis, ol pipel i mas makim gutpea lida husat i mas tingting long helpim kantri long dispela hevi nau yumi bungim tude.

Long wankain taim tu em i tokaut long ol

kendidet bilong Isten Hailan, Westen Hailans, Oro, Simbu, Madang na Russel Theo long sanap long Finsafen Open hia long Morobe provins.

Pipols First Pati em pati we Morobe Gavana Luther Wenge i go pas long en na i bin opim dispela pati long Lae long las mun tasol.

komom rol buk na asples we i gat olsem 300 manmeri i gat tasol 10-pela lain i putim nem.

Wankain samting tu i kamap long Lae siti we Ahi Lokol Level Gavman i gat namba olsem 40,000 manmeri insait long 10-pela wod tasol 7,000 tasol i putim nem na wok bilong kisim nem i pinis nau. Olgeta pepa bai ol i bungim na

salim i go long Mosbi long stretim long bikpela buk bilong ileksen.

Tasol ol manmeri i ken putim nem yet bihain long ol dispela ripot i kamap long na lilektorel Komisin i tokaut long en.

I tru olsem ol manmeri i isi tumas long putim nem long Komon Rol tasol i nogat wanpela bikpela hevi i kamap, Mista Gamato i tok.

Spak brus aweanes kamap gut

PIUS IKUMA i raitim

WOK pait egensim spak-brus long Madang i go het gut tru long ol komyuniti, lotu grup na skul long provins.

I no long taim i go pinis ol lotu grup bilong Jomba Peris i bin kamapim wanpela aweanes kempein wantaim ol studen na tisa bilong Malala Sekendari Hai Skul.

Kodineta bilong aweanes program Andrew Tuka i tok ol i bin go raun mekim aweanes long skul bikos hetman bilong Malala Mista Patrick Silata i bin askim ol long go long skul long mekim aweanes namel long ol gred 10 na 12 studen. Mista Silata i bin askim ol inap ol toktok long nogut bilong spak brus na bia tu.

Mista Tuka i tok ol Jomba peris lain i amamas tasol long harim dispela askim na ol i go long skul na toktok long ol studen na soim piksa tokaut long wanem kain nogut samting i ken kamap long bagarapim laip bilong ol yangpela taim ol i no tingting gut.

Mista Tuka i tok ol gred 10 na 12 bai lusim skul klostu long pinis bilong yia na ol i mas kisim kain skul bai spak brus na bia i noken bagarapim laip bilong ol.

"Planti bilong ol bai pinisim skul na go bek long komyuniti na taim ol i go aut lusim skul sampela bai kisim tingting long traime simok spak brus na dring bia," Mista Tuka i tok.

Em i tok i gutpela tru sapos ol dispela yangpela manmeri i save gut long wanem ol bagarap i ken kamap long ol taim ol i kisim dispela kain samting olsem spak brus na dring bia.

Mista Tuka i tok pasin bilong kisim spak brus na dring bia namel long ol yangpela em i wanpela bikpela samting na bai Jomba Peris i wok strong yet long kamapim aweanes long husat skul i laikim gutpela edvais long we bilong abrusim nogut bilong dispela samting.

Nesenel Pati bung long Madang

NESENEL Pati i bin kamapim wanpela opis o brems bilong em long Madang tupela wik i go pinis na moa long 1,000 manmeri i bin kam bung long dispela lonsing.

Planti singsing grup na Wail Hits ben tu i bin amamasim ol manmeri long dispela taim.

Pati presiden John Munul i tokim ol pipel olsem Nesenel Pati i no bin kamap bikpela na ol i no mekim planti wok bikos pati i bin lusim gut-

pela lida bilong ol let lambaky Okuk na ol i bin stap sori tasol.

Kodineta bilong pati Joe Mek Teine i tok taim bilong pati long silip na stap sori i pinis nau na em bai kirap bek gen stat long 2002.

Nesenel Pati em i stat wantaim ol narapela pati olsem Pangu na em i olpela pati tasol nau memba na lida bilong pati Mista Paul Pora tasol i sanap strong yet long dispela pati.

Maski planti narapela memba i

wok long kalap lusim wanpela pati na i go i kam tasol Mista Pora i bin gat bikpela bilip long ol polisi bilong pati em Mista Okuk i bin kamapim na em i stap yet.

Long hailans yet em Mista Pora i save gat planti sapota i stap na em i save isi isi tasol long winim ol ileksen. Kain lidasip bilong em ol manmeri i save amamas tru long em bikos em i no lida bilong suruk long toktok na em i save gat bikpela

tingting long let lambaky Okuk.

Mista Teine i tok pati i lukluk long fomim gavman long neks yia bikos em i pati bilong ol grasruts lain na em i laik helpim ol pipel.

Pati lida Mista Pora i no stap long dispela bung tasol planti memba long olgeta hap long Morobe, Madang, Isten Hailans, Sauten Hailans na Westen Hailans tu i bin bung long dispela taim long opim brems bilong pati long Madang.



• Hia ol skul pikinini bilong Ted Diro komyuniti skul long Mosbi i soim amamas long skul. Long Madang ripot long wanpela skul i tokaut olsem planti i les long skul.

Koles helpim ol yut

MADANG Teknikel Koles i bin kamapim wanpela open de long salim ol kainkain samting bilong ol em ol i save mekim long skul.

Prinsipel bilong skul Ephraim Yale i tok bipo em ol i save mekim dispela i kamap long wanpela taim tasol long olgeta yia tasol nau em ol i mekim tupela taim.

"Pes open de em mipela i bin holim long Jun na nau em i namba tu taim mipela i mekim," Mista Yale i tok las wik.

Em i tok dispela em i pes taim bilong koles long holim tupela open de long wanpela yia bikos ol i mas salim planti samting em ol studen yet i bin mekim.

"Ol studen i mekim planti gutpela samting tru na mipela i mas salim i go aut bikos nogat spes bilong putim ol gutpela samting," Mista Yale i tok.

Planti bilong ol saplai ol i wok long yusim bilong mekim ol samting em ol i no laik tromoi i go na rabisim.

Ol i save mekim ol tebol, sia, penim ol piksa, mekim ol kapot na planti moa samting.

Em i tok dispela em i taim bilong ol pipel long Madang i ken kam bung na baim ol gutpela samting we bai ol i lusim bikpela mani tru taim ol i baim long stoa. Mista Yale i tok mani ol i save kisim long dispela open de em ol i save bungim na baim saplai bilong ol studen husat i save kam skul long ol yia bihain bai ol tu i ken lainim ol gutpela skul.

Em i singaut long ol pipel bilong Madang long baim ol samting ol studen i mekim long soim sapot long wok bilong ol.

Mista Yale i tok ol studen bilong koles em ol pipel bilong bihain na em i laikim bai ol i mas helpim ol yangpela husat i laik wok long helpim komyuniti.

"Koles i mekim mani long trenim ol pipel bilong PNG bikos mani bai go bek long helpim ol studen husat i kam bihain," Mista Yale i tok.

Madang Teknikel Koles i bin stat 30 yia i go pinis na i wok strong yet long helpim planti ol yut long save long kainkain skil bilong helpim ol yet long mekim mani.

Ol studen i nogat tingting long skul gut

MIRIAM MANTU
i raitim

SAMPELA tisa bilong Luteran De Praimari Skul long Madang i gat wari olsem ol studen long skul i no tingting strong tumas long skul bilong ol.

Ol tisa i tok ol studen i tingting olsem pasin bilong go long skul em samting ol i mas mekim na ol i no tingting long skul gut.

Sinia tisa Maggun Kautin i bin toktok long dispela samting na em i makim maus bilong olgeta tisa long skul wantaim dispela wari. Misis Kautin i tok bipo ol studen i gat amamas long skul tasol nau em ol i wok long les na ting-

ting bilong ol i no strong tumas long skul.

"Sampela i save kam long skul long moning na bihain ol i save lusim get i go ausait na wokabaut i go long haus na ol i no save pret long pasin ol i save mekim," em i tok.

"Mipela i traime toktok long ol tasol i luk olsem ol i no kisim tingting bilong mipela taim mipela i laik givim gutpela tingting long ol," Misis Kautin i tok.

Em i tok ol papamama tu i mas toktok long ol pikinini bilong ol na givim gutpela tingting long ol pikinini i mas go long skul.

"Dispela hevi i save mekim na mipela ol tisa long skul i save givim kanda long ol long traime mekim ol i harim toktok

tasol ol i no save harim," Misis Kautin i tok.

Em i tok long klasrum tu ol studen i save les long raitim ol wok bilong ol olsem na ol tisa i mas sanap baksait long ol studen long givim toktok long ol long wanem kain save ol i laik givim ol.

Misis Kautin i tok ol tisa i no komplem long wok bilong ol tasol ol i pilim olsem pasin ol studen i mekim i no inap helpim ol na ol i laikim gutpela senis i mas kamap long givim helpim long edukesen bilong ol studen.

Em i tok bipo ol studen i save helpim ol tisa na i gat gutpela wokbung i save kamap namel long ol tisa na studen.

Nau em dispela pasin i no i stap.

Ol Madang memba slek long wok

PIUS IKUMA i raitim

BIPO deputi premia bilong Madang Florian Bahin i tok Madang provins i nogat strongpela na gutpela politikel lidasip long ranim provins long gutpela we.

Em i tok ol sevenpela nesenel palamen memba nau i no save tingting long hevi bilong ol pipel na ilektoret bilong ol bikos ol i save tingting long stap long Mosbi tumas na i no save givim gutpela edvais na komyuniti

sevis long ol pipel.

Mista Bahin i mekim dispela toktok taim Nesenel Pati i bin bung long makim ol kenidet long resis long 2002 Jenerel ileksen.

"Planti gutpela wok long givim sevis long edukesen, helt, ekonomik na sosol sevis inap kamap i luk olsem ol memba i sav bisi tumas o nogut ating ol i no save wanem kain wok ol i mas mekim," Mista Bahin i tok.

Em i tok taim em yet i bin stap deputi premia em i bin wok long planti ol bod long

haus sik, taun plening na lens na em i bin mekim planti disisen taim em i lukim tingting bilong ol pipel i laikim wanem kain sevis na em i helpim ol long kisim sevis.

Planti bilong ol dispela disisen em olgeta eria long taun i go long ol rural eria i bin kisim helpim long dispela.

"Maski em ol liklik oganaisesen mipela i bin wok strong long helpim ol pipel na ol i kisim sevis," em i tok.

Mista Bahin i tok i gat planti man tru bai sanap long dispela ileksen nau na ol pipel i

mas tingting gut na makim husat man em ol i laikim i ken go long palamen na makim maus bilong ol.

Nesenel Pati em pati bilong ol gutpela lida kain olsem lambaky Okuk na Malipu Balakau husat i dai pinis na nau em Paul Pora tasol i strong yet long holim pati strong tru.

Mista Bahin i tok piksa bilong olgeta lida em ol pipel yet i save pinis na ol noken harim ol gris toktok na ol i mas tingting gut na makim lida long neks yia ileksen.

Bogenvil na Wes Galp i gat nupela bisop

OL BIN makim nupela bisop bilong Bogenvil na Wes galp rijen insait long wanpela bung bilong Yunaitet Sios long Kavieng, Nu Ailan provins.

Bung ya i bin kamap long ples Ligga Misin stesen na i bin pulim ol Yunaitet Sios Asembli Edministretiv komiti long olgeta hap bilong kantri.

Nupela bisop bilong Bogenvil em Reveren Joseph Nopei na nupela bisop bilong Wes Galp rijen em Reveren Wari Eho.

Ligga Misin stesen we ol bin holim Asembli bung em i hetkota bilong Yunaitet Sios PNG Nu Ailan rijen. Na dispela em namba wan taim Nu Ailan rijen i hostim wanpela bikpela bung olsem bilong Asembli.

Ol arapela apoinmen we i bin kamap em long tripela bisop i bin kisim bek sia bilong ol. Em long Reveren Gerson Kapman bilong Nu Ailan rijen, Reveren Laka Renagi bilong Is Papua Meinlen rijen na Reveren Henry Tawaigu bilong Papua Ailan rijen. Ol bai skruim wok long narapela tupela yia moa, stat long neks yia.

Asembli i bin tok oraitim tu Reveren Timo Anikila olsem Jenerel Seketeri bilong Asembli long 2002 inap long 2004. Long dispela yia, em bin stap long probesen.

Long ol arapela apoinmen tu, ol bin makim Reveren Edilita Kato em wanpela yangpela meri bilong Misima Ailan olsem seketeri bilong Wimens Wok. Em i kisk ples bilong Jessie Lowa husat i bin holim posisen stat yet long 1999.

Long dispela bung tu, ol bin luksave long ol wok na sevis bilong Bisop bitong Wes Galp rijen Reveren Hasu Lokoloko na Marama Margaret Himata em wido bilong lei Bisop Tutmouna Himata bilong Bogenvil. Wankain tu i bin go long leit Bogenvil bisop.



• Modereta Reveren Samson Lowa (raithan) wantaim Reveren Kidu i stap insait long wanpela lotu bung bilong ol Yunaitet Sios.

Angliken Madas Yunien bung long Madang

MADAS Yunien eksekutiv bilong Angliken Sios i bin holim wanpela wik bung bilong ol long Madang las wik.

Wanpela long ol samting we ol bin toktok long en em glasim gen mamalo bilong Yunien Haus kantri.

Wanpela opisel bilong Mary Sama Haus long Inglan em faunda bilong Madas Yunien long wol i bin kamap tu long dispela bung. i bin stat long Novemba 5 na pinis long de namba 10.

Ol bin holim dispela bung long toktok long riogenaism o stretim gut MU long PNG.

narapela samting we ol bin lukluk long en em long traeniel konfrens we bai kamap long Lae neks yia.

Long ol arapela sios nius bilong Angliken Sios, nupela bisop bilong Pot Mosbi Daiosis Peter Fox bai kisim blesing long kisim wok long Februeri 2002 neks yia. Seremoni bai kamap long Sen John's Angliken Katitrel long Pot Mosbi.

Asbisop James Ayong i tok Pater Peter bai kamap long kantri long namba wan wik bilong Janueri neks yia. Em bai stap na lukautim Sen Martin's Peris long Boroko.

K10 milien redvelopmen plen bilong Rarongo

YUNAITET Sios i gat plen long wokim K10 milien redvelopmen plen bilong Rarongo Tiolojikel Kolis (RTC) long Is Nu Briten provins.

Dispela plen bai lukim olsem ol i ribildim fakalti na kisim i go insait ol nupela digri program. Wanpela bilong ol em Masta digri program.

Long Asembli Edministretiv bung long Kavieng, ol bin makim bek gen ol bos bilong ol wan wan dipatmen long RTC bilong neks yia. Senis i bin kamap tasol long Deputi Prinsipel bilong Kolis em Reveren Joseph Nopei husat ol i makim em nau long kamap olsem Bisop bilong Bogenvil rijen.

Kolis yet bai makim nupela deputi bilong em. Long ol arapela insti-

tusen we UCPNG i papa long en olsem Gaulim Tisas Kolis, ol bin tok oraitim trai semesta o tripela semesta diuplopa program bilong kolis.

Edukesen Dipatmen i bin oraitim dispela program na skul bai go insait long em neks yia.

Gaulim TC bai kirapim bek gen tisa inesevis program we Edukesen Dipatmen i laik kirapim bek.

Ol UCPNG lida i tok orait long ol dispela program na tok ol samting we gavman i laik kirapim em ol bikpela samting long sios i sapatim tu.

Tasol ol i tok gavman i mas givim fainensel o mani sapat long ol i ken kirapim ol program long taim yet na i no leit long ol.

CBC wari long dai bilong Wes Papua lidaman

KATOLIK Bisops Konfrens (CBC) bilong PNG na Solomon Ailan i askim ol atoriti long Indonesia bilong painim man o ol lain husat i kilim dai lida bilong ol pipel bilong Irian Jaya husat i laik kisim independens long Indonesia.

They's Eluay em lidaman bilong Fri Papua Muvmen na em i dai long las wik bihain long sampela lain i kilim em.

Opis bilong CBC long Pot Mosbi i tok ol atoriti long Indonesia i mas painim ol lain husat i kilim dai Mista Eluay, as bilong kilim em na putim dispela birua long han bilong lo bai stretim.

CBC taim i kirap nogut na sori long harim nius long dai bilong bikman ya i tok wanpela taim gen na man husat i go pas long ol wok bilong painim ansa long ol hevi we neiba bilong yumi Wes Papua i bungim long planti kribmas nau.

"Long PNG na

Solomon Ailan, ol Katolik pipel i wok long beten long Mista Eluay na ol arapela gutpela man we dispela hevi i karamapim ol long Wes Papua.

"Katolik komyuniti i salim bikpela tok sori tru i go long famili, ol pren, wantok na hauslain bilong leit Mista Eluay. Sori bilong ol em mipela i serim wantaim ol tu. Mipela i no laikim stret pasin bilong kilim dai bikman ya tasol mipela i pre long leit lida na ol famili na pipel bilong em long dispela taim bilong sori," CBC i tok.

CBC i tok olsem ol neiba na bilipman long wanpela God, yumi strongim olgeta manmeri long Wes Papua bilong painim jastis long gutpela rot na i no long pasin bilong pait.

Ol ripot long dai bilong lida Eluay i tok bikman ya bin dai long las Sande. Ol bin painim bodi insait long ka bilong em i kres na slip long

arere bilong rot klostu long PNG na Wes irian bodamak.

Famili na ol sapota bilong em i sutim tok long ami bilong Indonesia i kilim dai lida Eluay na dispela em as we ol trabel long kukim wanpela hotel, maket na beng klostu long Sentani, ples bilong Mista Eluay i bin kamap bihain tasol long nius long dai bilong em.

Nau tok strong i go

long gavman bilong Australia long singautim toktok namel long Indonesia na ol bruk lus lida bilong Wes Papua.

Presiden bilong Papua Presidium Kaunsil i tok dai bilong lida Eluay inap kirapim bel bilong Wes Papua na ol i tanim long strongim pait long inapim laik bilong ol long kisim independens. Na ol bai i no inap long bihainim pasin bilong stap isi na toktok long stretim hevi.

Em i tok i moabeta sapos gavman bilong Mista Howard husat i kisim bek sia olsem Praim Minista bilong Australia long nupela ileksen ol bin holim long wiken i wokim samting hariap long helpim Indonesia i stretim dispela hevi bikos hevi ya i stap klostu long em tasol. Na sapos Australia i no wokim samting hariap, samting bai go nogut na i karamapim em tu.

Wol Misin helpim Yunaitet Sios



• Wanpela kwaia grup i singsing long taim bilong asembli bung. Fail foto.

YUNAITET Sios long PNG (UCPNG) i bekim bek bikpela dinau bilong em we i abrusim milien kina.

Dinau ya i bin kamap insait long las 10-pela kribmas. Em i kamap bikos menomen i no lukautim gut mani bilong sios.

Nius bilong dispela samting i bin kamap long Asembli Edministretiv Komiti bung long Nu Ailan las wik.

Ol ripot i bin kamap long bung i tokaut

olsem long stretim dispela bikpela dinau mani we UC i gat, sios i bin salim planti ol haus bilong em long Mosbi na ol plante-sen insait long Milen Be an is Nu Briten. PNGBC beng i bin salim ol diapela samting long stretim dinau mani long en.

Modereta Samson Lowa long bung i bin tok long Julai 2001: sios i peim bek na stretim olgeta dinau bilong em wantaim PNGBC beng.

Em i tok long nau, UCPNG na ol memba sios bai go hetim ol wok na yia 2002 bai i narakain bikos ol bai-go eht long karimaut gut wok bilong antapim nem bilong Bikpela.

Em bin tok 32 memba bilong Kaunsil bilong Wol Misin (CWM) i bin helpim UCPNG long stretim dinau mani bilong em.

Triplē lida bilong Presbiterien Sios long taiwan i bin stap long AAC bung long Kavieng.

Jenerel seketeri Reveren Anikila i tok wokabaut bilong dispela grup bilong Taiwan em i nupela link wantaim ol CWM patna na Presbiterien Sios long taiwan.

Bihain long ol i wokim ful peimen bilong ol dinau na i gat hap mani i stap, ol bai yusim long ol developmen projek bilong sios, stat long neks yia inap long 2004.

Ol eria we fanding bai helpim ol em long yut, praimerit helt, praimerit na sekonderi edukesen, ol meri na pikinini, trening, menesmen na edministresen eria.

AAC i bin wanbel olsem wantaim ful sapat bilong UCPNG memba; ol dona na gavman bilong PNG, ol inap yusim dispela mani long karimaut moa wok long en.

Reveren Lowa na ol arapela bisop i bin autim tok amamas bilong ol long CWM long bikpela helpim na sapat ol i givim long taim nogut stret bilong sios long histri bilong en.

Em i gat bilip olse nupela yia 2002 bai gutpela yia moa na ol ministri bai karimaut gat ol wok bilong ol.



Stori bilong maniman wantaim Lazarus

Jisas i tok moa olsem, Bipo wanpela maniman i stap, na oltaim em i save putim naispela naispepa siot na gutpela retpela klos. Na olgeta de em i save kisim gutpela gutpela kaikai. Na klostu long dua bilong haus bilong dispela maniman, wanpela rabisman i save slip i stap. Nem bilong dispela rabisman em Lazarus. Bihain dispela rabisman i dai, na ol ensel i karim em i go na putim em i stap wantaim Abraham. Na dispela maniman em tu i dai, na ol i planim em. Em i stap long ples bilong ol man i dai pinis na em i gat bikpela pen. Luk 16: 19, 20, 22, 23a

Don Bosco skul kisim ol nupela kompyuta

OL SUMATIN bilong Don Bosco skul insait long Pot Mosbi siti i laki nau bikos ol i kisim ol nupela kompyuta long herpim ol long skul bilong ol.

AusAID i makim gavman bilong Australia long dispela wik i bin givkim 25 kompyuta na tupela UPS long helpim trenim na redim ol sumatin long kisim wok bihain ol i pinisim skul long Don Bosco.

Don Bosco i gat gupela Kompyuta Edukesen projek. Ol tisa long Don Bosco i tok taim ol i luksave olsem ol sumatin long skul bilong ol i kisim gupela trening long kompyuta, ol i mas lainim tu Infomesen Teknoloji na ol bai klia gut long yusim kompyuta long sait bilong ol wan wan wok eria bilong ol. Ol i tok long putim kompyuta projek long eksen, skul i bin laikim moa kompyuta na nau ol i amamas tru long AusAID i helpim ol long dispela.

Deputi Hai Komisina Nicholas Coppel i tok AusAID i amamas long helpim Don Bosco wantaim ol kompyuta ya bikos dispela bai helpim long trening bilong ol long kisim wok bihin long en.

Ol bin kirapim Don Bosco skul long 1885 long givim trening long planti yangpela pipel husat i no bin inap long go hetim skul bilong ol long nomol edukesen sistem, na planti long ol sumatin husat i skul long Don Bosco nau i kisim ol gupela wok wan-

taimmol praivet kampani o gavman.

Helpim we AusAID i givim i kam aninit long AusAID Smol Ektiviti Skim na mani em i tmoim long baim ol kompyuta inap long K54,000.

Smol Ektiviti Skim em i wanpelaskim we i save helpim ol komyniti beis na NGO grup wantaim ol komyniti developmen nits. As tingting em long hau bai yusim gut mani long helpim komyniti i helpim ol yet.

Mista Coppel i bin tok em

i bikpela samting long gat gupela ples bilong ol sumatin i lainim ol samting long en.

Na em i amamas long wok wantaim Don Bosco we i wok strong long helpim ol yangpela pipel long sait bilong ol long en.

Rekta bilong skul Pater Alfred Mariavilla taim em i tenkim AusAID long dosenen i bin tok ol sumatin bai yusim gut ol masin long inapim visen na driman bilong ol.

Milen Be gavman helpim ol kopra groa

MILEN Be Provinsel Gavman i helpim Kopra bisnis long provins bihainim hevi we ol kopra groas i bungim taim prais long wol maket i go nogut tru.

Provinsel gavman i katim K300,000 long baset bilong em long helpim ol groas long sait bilong ol long kisim ol kopra bilong ol i kam long maket.

Aninit long helpim, ol groa husat i stap 300 kilomita longwe long Alotau i no inap long peim trenspot bikos dispela helpim mani bai karamapim dispela.

Ol i kolim fan we Provinsel Gavman i kirapim long helpim ol

kopra groa long Kopra Friet insentiv fan (CFIF).

Provinsel Eksekutiv Kaunsil i bin tok oraitim CFIF long Mei 20 na katim dispela hap mani inap long K50,000 long 2001 baset bilong kirapim komiti we bai lukautim na menesim fan.

Kopra Maketing Bod (CMB) i amamas tru long Milen Be gavman i laik helpim ol kopra groas long provins na tok pasin we provinsel gavman i wokim i gupela tru.

Long wankain taim tu, Deputi Gavana na siaman bilong Agrikalsa Clive Romulars na Siaman

bilong CMB Jerry nalu i bin sainim wanpela agriemna pepa (MOU) long go hetim plen bilong fan ya.

"Agrimen ya em i wanpela bikpela samting bikos em bai opim rot long bihain taim longa gupela wok patna namel long provinsel gavman na CMB bilong strongim bisnis na gupela wok developmen insait long rurel eria," bosman bilong CMB Michael Varapik i tok long wanpela pas i go long Mista Romulars.

Ol bai go hetim ol samting i stap insait long agrimen long dispela mun. Dispela bai larim CMB long kirapim ol administretiv wok bilong karimaut wok long kopra na mekim ol ripot bilong givim i go long Milen Be Provinsel gavman.

Ol i givim aut pinis namba wan hap mani mak inap long K75,000 bilong pim ol freit kos long ol groa i stap 300 kilomita longwe long Alotau.

Bai kostim K1 long wan wan bek long ol produsa i stap klostu long Alotau na K6 long ol lain i stap 300 kilomita longwe.

Aninit long MOA agrimen, CMB bai menesim na yusim mani long wok ol i makim long en na ol yusim ol woklain na ol fasiliti fri.

Long wankain taim, CMB i givim permit o tok orait pepa i go long Milen Be Kopra Ejensi long baim kopra long provins. I kam inap nau, ejensi tasol i save wokim dispela na em i ejen bilong CMB tu long provins. CMB bai i stap olsmé bodi long salim i go aut o eksptom kopra i go aut long provins.

Mista Romulars i tok kra i bilong ol groa i strongim Provinsel gavman long hariap wokim politikel disisen wantaim visen bai stap longpela taim long helpim kopra bisnis na CMB.

Em i tok ol i abrusim ol nogut piksa long bisnis na bihainim gupela rot na komitmen we bai helpim ol.

Mista Romulars i tok wok long kamapim moa kopra i mas kamap wantaim kontrol long kamapim gupela kwaliti kontrol.

"Yumi i no inap long kamapim moa kopra sapos yumi no klinim na karimaut gupela wok long ol kopra plantesen.

Em i wok bilong yumi long menesim gut ol fam na karimaut ol trening program na gupela rot samting," Mista Romulars i tok.

Em bin tok Milen Be em i namba wan provinsel gavman long sapatim tru CMB long kamapim gupela koporet wok plen na ol groa husat i les pinis long wokim kopra bikos prais bilong em i go daun stret.



Presentesen bilong komputa long Don Bosco • Deputi Hai Komisina bilong Australia Nicholas Coppel i sanap wantaim tupela sumatin bilong Don Bosco.

Kamea Distrik kisim taim

KAMEA Distrik long Galp provins i bungim hevi bihain long tupela tet level balus i stapim ron bilong ol long eria.

Dispela distrik i nogat rot na balus tasol em rot we ol sevis i save i go na i kam long ol pipel.

Katolik Bisop bilong Kerema Daisosis Paul Marx i tok Airline PNG Ltd na Not Kos Aviesen i stapim operesen long hap bikos prais bilong piul na ol spea pat i go antap tru. Na tu i nogat inap eksperiens pilot long ranim balus.

Bisop Marx i tok Kamea i gat mox long 300,000 pipel na faivpela pers long hap bai pasim haus sik, foapela helt senta, wanpela hai skul, tupela CODE senta, siksipela komyniti skul na 50 elementeri na literesi skul we sios i papa long ol bikos long trenspot hevi.

Bisop Marx i tok ol i bungim hevi nau long salim ol saplais i go long ol skul na ol helt senta.

Em i tok long planti yia nau, nogat gupela samting i kamap, maski askim i go planti taim long gavman na ol nesanel memba bilong Galp long wokim rot long dispela eria we ol piepl i ken yusim long i go na i kam long kisim sevis long en.

Milen Be painim tupela man Samoa i lus long solwara

OL bin painim tupela man Samoa long Milen Be provins long dispela wik bihain ol i drip long bikpela solwara long dingi klostu long faivpela mun.

Tupela man em Lapapehele Sopi i gst 36 krismas na Telea Pa'a i gat 27 krismas em ol i painim ol klostu long Bolubolu na lukautim ol long hap inap ol i ksim ol i go long Alotau.

Narapela tupela poroman bilong ol i bin dai long solwara taim ol i drip i stap. Samoa i stap 4,000 kilomita longwe long Normanby Ailan long Milen Be, we tupela man i bin drip

long solwara i kam long en.

Ol ripot i tok foapela man i bin stat lonf drip long Jun 28 taim dingi bilong ol i bungim hevi. Foapela man em ol fisamen. Mista Sopi i tok ol bin save kaikai pis, kokonas na dringim wara ol i bungim taim ren i pondau. Em i tok narapela tupela poroman bilong ol i bin dai long taim kaikai i sot. Bikpela san tu i bin save kukim ol taim ol i drip long foa na haf mun long bikpela solwara.

Mista Sopi i tok ol bin traim bes bilong ol long ol sip i lukim ol tasol ol i save stap longwe tumas long ol (sip) i lukim hap

laplap we ol i taitim antap na win i bloim.

Tasol long las wik, sip MV Hiwi i save wok long wara bilong Milen Be provins i bin lukim hap laplap bilong ol na go klostu long ol na sevim ol.

Wanpela man bilong ples Bolubolu em Lai Luwaina i bin pul i go long kanu bilong em na kisim tupela man.

Ol i amamas nogut tru na nau ol i lukim Mista Luwaina na famili bilong em olsem famili tru bilong ol.

Bihain long ol i stretim ol pepana ol arapela samting bilong tupela man, ol bai salim ol i go bek long Samoa.



Kanage i raun long Kimbe na pilai wantaim ol lain long hap long taim bilong klinim nambis long las mun.

Karkar ailan bai meknais long skul so

FUZO PAUL i raitim

KARKAR Ailan bai holim amamas de bilong em long dispela wiken Fraide na Sarere 16 na 17, Novemba, 2001 taim Miak Komyuniti Skul i holim skul so.

Miak Komyuniti Skul em i wanpela bilong ol bikpela gavman skul insait long Karkar ailan na i stap klostu tasol long Miak helt Senta na Karkar Hai Skul.

Astingting we skul i laik kamapim dispela amamas de em long kamapim mani bilong wokim wanpela nupela haus tisa. Stat long las wik i kam inap nau em ol papamama, ol sumatin wantaim ol pipel bilong skul i bin wok hat tru long redim ples na ol samting bilong dispela bikpela de.

Ol i sanapim bikpela bahis bilong ol manmeri i ken baim geit na i go insait na tu ol kainkain pilai na amamas i ken kamap insait long dispela banis.

I gat bikpela bilip olsem dispela amamas de bilong Maik Komyuniti Skul bai pulim planit manmeri tumas long kamap na lukim. Ples bai pas bilong wanem ol bkpela musikman bilong Madang olsem ol Junior Wali Hits na tu Edwin Bafe bai pulim na slekim ol pawa string ben Madang musik stret bai hotim na kukim dispela de. Na long nait tu bai i gat 6 tu 6 we dispela tupela pawa ben bai pasim mun lait bilong Karkar ailan.

O lapun bilong Karkar tu bai brukim kundu na samsam long dispela taim tu. Ol lain husat bai kamap long amamasim dispela de em skul i bilip bai i kam long taun na ol ples klostu long Karkar ailan.



• Ol gret 4 skul sumatin bilong East Goroka Primeri Skul.

Ol meri i gat bikpela wok long stretim Bogenvil

OL MERI Bogenvil i gat bikpela wok long pilaim long mekim ol paitgrup long ailan i lusim ol samting bilong pait na tu, long kamapim bel isi pasin na gutpela sindaun lojg Bogenvil.

Kodineta bilong Bogenvil Intasios Wimens grup Sister Lorraine Garasu i bin tok bikos ol meri na ol mama i laikim bai gutpela sindaun na fridom i kamap, ol i wok strong long lukim olsem ol gan i mas go.

"Ol meri long ol wan wan level i karimaut ol wok bilong ol long dispela samting. Bilong lusim ol samting bilong pait, i mas gat sekan na bel isi pasin i kamap long olgeta lain husat i bin wokim birua long ol arapela insait long famili, komyuniti na provins.

"Ol meri long Bana eria i wok hat long dis-

pela wantaim tu ol meri long Tinputz, wakunai, Selau na ol arapela eria moa.

"Yumi kisim bek ol gan long ol yangpela man tasol i mas gat samting kain rot we bai yumi putim olk ynagpela man long en. Long dispela eria, AusAID na Yunaitet Nesens i gat mani na plen long en," Sister Lorraine i tok.

Long dispela taim, plen bilong lusim ol samting bilong pait i kamap na bai stat pas-taim long dispela mun long Bana na Torokina eria.

Long ol ripot long ol meri i bin kamap long Bogenvil Provinsel Kaunsil bilong ol meri bung, ol pipel long Torokina i laik hariapim tasol ol samting na ol i no wari long wetim ol wan wan step o plen long ol samting i kamap.

Kraft wok i nupela projek long provins long Finsafen

DAPSY MINGKA i raitim

WANPELA ples insait long Finsafen distrik Fido viles em ol i kamapim nupela projek. Insait long Fido em i pes taim we ol i no bin wokim dispela samting bipo.

Mista Geweri Kouno i tok nau insait long Fido viles i pulap long kainkain kraft we mipela i kamapim.

Mista Kouno i tok mipela save kisim dispela rop insait long bus we em i spesol rop bilong wokim kain ol samting.

Em i tok nau mipela i wokim ai bilong basket trei bilong putim ol kap na plet na spesol basket bilong putim ol pek bilong hangamapim kolos na ol bikpela bikpela basket long putim ol samting olsem deti samting.

Em i tok nau mipela wokim yet na i nogat wanpela bikman olsem memba o gavana i luksave bikos dispela samting i save kamap long ol Sauten Hailans provins olsem Pangia lalibu na sampela hap bilong provins.

Mista Geweri i bin tokim wantok olsem i no gat wanpela nius man o wanem savaman i go lukim dispela yet, em nau we gutpela taim mi bungim yu na mi givim stori long yu long putim aut long nius olsem insait long Fido viles long Finsafen, mipela i wok long kamapim dispela samting olsem kraft wok projek bilong mipela.

Can't leave work to get to the Bank ?

DISCOVER THE CONVENIENCE OF...



TOLL FREE HOTLINE 180 2333

REGISTERED CUSTOMER, I CAN NOW SAVE TIME AND MONEY WITH PNGBC'S NEW TELEPHONE BANKING SERVICE.

IT'S SO CONVENIENT.

AND WHAT'S MORE IT'S ABSOLUTELY FREE... TOLL FREE IN FACT.

I SIMPLY DIAL 180 2333 TO DO ALL MY BANKING ENQUIRIES AND MONETARY TRANSACTIONS."



Visit us @ www.pngbank.com.pg

Register Now!

And you could be in the running to win 10 lucky K100 cash prizes... and other high quality PNGBC promotional items.

HOW TO ENTER:

1. Personal customers that bank with PNGBC can enter this competition
2. Registered FonBank Customers: Cut out the entry coupon, fill it in, and send it to FonBank Competition, P O Box 78, Port Moresby.
3. Customers Not Registered with FonBank: Obtain an application form from your branch or by calling 180 2333. Complete the application form and the entry coupon, attach them together, and drop them off at a designated area in your branch. The area will be clearly marked.

4. Every Friday, commencing the 26th October 2001, 12 lucky winners from all four regions will have their names published in daily news papers. There are three levels of prizes, each attracting a variety of high quality PNGBC promotional items.
5. Winners will be contacted and their prizes sent to them.
6. On November 16, ten lucky winners will each win K100.00.
7. PNGBC staff and their immediate families are not eligible to enter.
8. All decisions on any aspect of the competition are final.

Name: _____
 Address: _____
 Tel: _____
 Signature: _____

Studen helpim pait egensim AIDS



• Sampela yut bilong Friends Foundation husat i save go pas long helpim ol lain gat AIDS.

OL STUDEN bilong Yunivesiti ov Papua Niugini i gat bikpela wok long yusim save bilong ol long tokim ol pipel long kantri long dispela sik nogut long kantri yumi i kolim HIV/AIDS.

Dispela toktok em Dairekta bilong Nesenel Aids Kaunsil Dokta Clement Malau i bin tokim ol yuni studen las wik taim em i bin go long skul bilong ol long wanpela woksop we i bin kamap.

Dokta Malau i tok ol planti yangpela manmeri nau long dispela taim i wok long kisim sik ya

hariap tru na em i amamas olsem ol yuni studen i bin mekim dispela wok bilong kamapim dispela woksop.

Ol studen i bin penim ol bikpela piksa na raitim ol buklet bilong toktok long AIDS na dispela em i gutpela we bilong soim ol pipel olsem sik em i ken bagarapim olgeta manmeri long kantri.

Dokta Malau i tokim ol studen olsem ol i ken mekim bikpela senis tru sapos ol i bringim wanem samting ol i lainim na go

bek gen long ples na soim ol komyuniti long sik AIDS em i wanem kain samting.

Em i tok i gutpela olsem ol lida bilong tumoro, em ol yuni studen i lainim we bilong abrusim dispela sik nogut nau bai ol i ken mekim gutpela disisen long bihain taim.

Dokta Malau i tok bihain taim ol i go wok o kamap lida bilong komyuniti bilong ol bai ol i ken save long wanem kain ol disisen long mekim na helpim kantri long pait egenisim dispela sik nogut.

Volentia tisa lusim PNG

IAN KAKARERE i raitim

WANPELA waitman bilong Inglan i bin stap tisa long tupela yia wantaim Kiunga Sekendari Skul na nau dispela tisa i lusim skul bihain long kontrak bilong em i pinis.

Man ya nem bilong em Marc Scott na taim em i bin stap long Kiunga olgeta lain long komyuniti i save gut tru long em na niknem bilong em ol i save kolim Maru.

Mista Scott i bin kam olsem wanpela volentia wantaim Volentia Sevis Oganaisesen (VSO) na em i wok long tisim ol studen long Saiens na kompiyuta long skul.

I no ol studen tasol. Mista Scott i bin tisim ol tisa tu long we bilong yusim kompiyuta tu.

Gavman bilong Australia i givim 21-pela kompiyuta olgeta long skul na nogat man long lainim ol long we bilong yusim olsem na em i wok strong long lainim ol.

Mista Scott i gat planti pren tru long skul na taun na Kiunga komyuniti wantaim.

Em i tok em i amamas olsem em i gat nupela famili long Kiunga tasol em i sori tru long ol famili bilong em i bin lusim long taim tru long Inglan na em i laik go bek long lukim ol.

Ol papamama na bratasusa bilong em i wet long lukim em long longpela taim em i bin lusim ol.

I nogat moa volentia bai kam long kisim ples bilong em taim em i lusim Kiunga bikos ol volentia bilong VSO nau i wok long go long Momase na Hailans Rijen tasol.

Goroka yuni gat hevi long mani

JOE KANEKANE i raitim

I GAT sampela ripot olsem Goroka Yunivesiti i sot long mani na edministresen bilong yunivesiti i painim sampela we long stretim dispela.

Ol hetman bilong yunivesiti i bin bung long wanpela miting na kamap wantaim wan-

pela komiti long lukluk i go insait long dispela samting long helpim dispela bikpela skul long go het yet.

Yunivesiti kaunsil i painim we bilong stapim dispela mani wari bilong em na redi long bringim ol nupela studen i kam insait long Lara progrem em yunivesiti bai kamapim long taim bilong krismas holide.

Planti memba bilong kaunsil em ol sinia memba bilong yunivesiti yet na ol i gat wok long traim lukim ol we bai ol i ken stapim ol hevi na traim pulim mani i kam long skul.

Vais Sensela bilong yunivesiti Mark Solon i no laik toktok long dispela samting na em i kisim toksave tu long planti askim tasol em i no laik toktok.

Taim bilong skul i no pinis yet na sampela ripot i tokaut olsem baset bilong yunivesiti i sot na ol i laikim moa mani long mekim wok bilong ol.

Ol bai lukluk gut long wanem ol eria we yunivesiti i nidim tru helpim na katim sampela wok we i no givim planti helpim long skul.

I gat toktok olsem komiti bai helpim yunivesiti long wok insait long baset bilong yunivesiti yet na noken tingting bikpela.

Ol baset pepa bilong yunivesiti bilong dispela yia i soim olsem skul i kisim mak long K8 milien. Las yia em i kisim K7 milien.

Em i gat 216 wok lain na tisa nabaut long dispela bikpela skul.

Skul inspekta mas helpim tisa

OLGETA tisa long kantri bai kisim mak long kain wok ol i save mekim na dispela mak em ol skul inspekta bilong ol bai givim ol.

Ol inspekta bilong ol skul bai go raun lukluk long ol skul long kantri na bihain long dispela bai ol i kisim toksave na tingting long wanem kain wok ol i laik mekim na bai ol i toktok long we bilong makim ol tisa.

Edukesen Minista Muki Taranupi i tok ol edukesen rifom we i wok long kamap long kantri nau na taim ol i mekim gutpela wok bai rifom i kamap gut.

Em i tok wok bilong ol inspekta nau em long lukluk gut na toktok wantaim ol tisa na givim edvais long wan kain samting ol i mas mekim long helpim ol tisa.

Mista Taranupi i tokim ol inspekta long bung bilong ol long Mosbi las wik olsem ol i mas tok tru long taim ol i makim ol tisa.

Em i tok wanem kain disisen ol inspekta i mekim long ripot bilong ol tisa bilong ol bai tokaut long wok bilong ol tisa i gutpela o nogut na dispela em i bikpela samting tru.

Long dispela we em ol edukesen rifom i mas wok gut long helpim ol pikinini long kantri.

Mista Taranupi i tok planti i no save gut long wok bilong edukesen rifom na em i laikin bai ol inspekta i ken tingting gut long wanem kain wok ol i mas mekim.

Em i tok ol tisa i mas kisim gutpela tingting long ol inspekta long we ol i laik lainim ol studen long klasrum na wok strong long helpim rifom wok long olgeta hap long kantri.

Ol inspekta i gat bikpela wok tru long mekim long wanwan yia na dispela em long givim gutpela edvais long ol tisa bai ol pikinini i ken lainim samting gut taim ol i bihainim rifom.



Bikpela wok mas kamap long daunim sik AIDS • Ol volentia na komyuniti helt wokas bung long lainim we bilong stapim sik Aids.

Nes long WHP laikim gutpela luksave

PLANTI nes long Hagen Jenerel Haus sik i gat bikpela komplek olsem provinsal gavman na haus sik edministresen i no givim gutpela luksave long wok ol i save mekim.

Ol i tok provinsal gavman i bin tok promis long olgeta nes long haus sik olsem ol bai gat ol awod mani long wok bilong ol tasol i kam inap nau em dispelal samting i no bin kamap yet.

Presiden bilong Westen Hailans Nes Asosiesen Mary Culligan i tok planti ol nes i bin bung wantaim edministresen na toktok wantaim ol long dispela samting pinis.

"Sampela memba bilong mipela i wok long toktok wantaim ol atoriti tasol provin-

sal gavman i strong yet," Mis Culligan i tok.

Em i tok ol i bin kamapim wanpela miting long na ol i laik bung wantaim ekting provinsal edministreta Micheal Wandil tasol Mista Wandil i no bin kamap long toktok wantaim ol nes.

Mis Culligan i tok ol i laikim olsem ol nes i mas kisim ol awod em i promis bilong yia 2000.

Em i tok planti ol nes i bin lukim olsem ol i mas aplai long ol posisen em ol i stap nau long em. Ol nupela awod i min olsem ol nes i gat rait long aplai long posisen em i antap liklik long we ol i stap nau.

Mis Culligan i tok ol i mekim ol awod i kamap samting nating na dispela i no stret.

Em i tok ol edministresen bilong haus sik i tok yet olsem dispela ol awod em ol i no bin stap long baset bilong dispela yia olsem na bai ol i mekim dispela samting long neks yia.

Presiden bilong olgeta nes long PNG Susan Haroi i tok em i no save olsem ol miting i bin kamap namel long ol dispela lain long Hagen tasol em i tok i gutpela ol i ken bringim dispela samting i kamap taim ol wanwan mausman bilong ol helt wokas long provins i bung long Mosbi long miting bilong ol neks mun.

Fri edukesen bai i wok o nogat?

WANTOK

NIUSPEPA BILONG YUMI OL PAPA NIUGINI STRET

TAIM nogut na planti papamama bai painim hat long peim skul fi bilong pikini. Ating dispela em gutpela taim bilong gavman long givim Fri Edukesen?

Planti papa mama bai ting fri edukesen i wanpela blesing i kam long God. Ol i painim hat taim i stap na husat man bai tok nogat.

Tasol dispela Fri Edukesen polisi i no nupela. Dispela polisi i bin stap wantaim Pipels Demokretik Muvmen (PDM) taim Paias Wingti i bin stap praim minista.

Long wanpela tok, Paias Wingti i kamaut na laik askim PDM long givim fri edukesen long ol sumatin long baset bilong neks yia.

Long taim bilong Mista Wingti yet olsem Praim Minista em i bin givim Fri edkesen Tasol planti skul i bin ron sot long mani. Gavman olgeta taim i bin tok sot long mani na planti skul i bin pas.

Edukesen Minista Muki Taranupi tok aut dispela wik olsem gavman bai givim K120 milien bilong edukesen.

Ating 2002 Nesenel ileksen bai kamap neks yia na dispela em wanpela gutpela rot bilong grisim ol manmeri long votim PDM i go bek long gavman.

Long sait bilong helpim ol papamama i gutpela tasol em bai wok o nogat em narapela samting. Planti taim gavman i save mekim planti giaman toktok na i

no save kamapim samting tru.

Planti skul i bin pas na sampela i bin kisim moa dinau mani bilong skul i noken pas. Narapela yia i kam na ol skul askim moa skul fi long bekim ol dinau na planti papamama i bin kisim taim.

Fri edukesen i no gutpela bikos ol sumatin bai i no mekim gut long skul wok. Papamama bilong ol i no lusim wanpela mani. Ol i yusim pablik mani na ol bai westim taim nating, taim papamama i peim, ol i gat wok bilong mekim na kamapim gutpela skul wok tu.

Ating gavman i gat inap mani long taim nogut bilong givim fri edukesen. Sapos nogat mani, wankain hevi bilong bipo inap kamap gen.

Planti taim gavman i save sot long mani na noken bilip tumas long fri edukesen polisi.



Hailans haiwe kisim mani

GAVMAN i kamap wantaim K15.5 milien bilong stretim Hailans Haiwe.

Dispela haiwe i bin bagarap sampela yia nau na dispela mani inap helpim long bringim gutpela sevis.

AusAID i bin givim K6 milien pinis bilong stretim Hailans haiwe namel long Kassam Pass na i go Kainantu we wok i stat pinis.

Mani bilong gavman bai karim wok i go lusim Kainantu na i go long narapela hap bilong ol hailans provins.

Skate les long kamap NCDC gavana

OPOSISEN lida Bill Skate, husat i rijinel memba bilong NCDC i gat rait long kamap gavana tasol em i laik Philip Taku long holim sia bilong gavana.

Taku i bin stap aninit long saspensen inap 2 na hap yia olgeta na em i kisim bek opis dispela wik tasol.

Mista Skate i tok emi bilip Mista Taku bai inap mekim wok olsem gavana bilong NCDC.

Mista Skate i tok em i laik givim lida bilong oposisen i go long Sir Michael Somare bai em i ken ronim gavman.

Gavman mas luksave long Wes Papua refuji

KATOLIK sios bilong Vanimo i askim PNG gavman long luksave long 313 refuji bilong Wes Papua husat stap moa long wanpela yia nau.

OL pipel i bin pret taim ol Wes Papua husat laik kisim Independens na ol opisal bilong Indonesia i kros pait na bagarapim sindaun bilong ol.

Gavman i mas luksave na givim helpim bai ol pipel i noken go bek long Indonesia. Dispela wik tasol ol i bilip olsem wanpela lida bilong Wes papua husat save patit strong long kisim Independens i lusim laip bilong em. Planti sapota i kros, na bagarap ol samting nabaut.

OL HAP HAP nius

Australia laik salim moa bot pipel long PNG

John Howard, husat winim bek sit bilong em olsem Praim Minista long Sarere i tingting long salim moa refuji i kam long PNG.

Australia les na salim pinis moa long 800 pipel i go long Nauru na PNG. Nau em i tingting long salim narapela 1,000 pipel i kam.

Wes Papua lida i dai

Theys Eluay, wanpela strongpela lida husat pait strong long kisim independens bilong Wes Papua i dai long ka birua displa wik.

Planti manmeri i sutim toktok long ami na plis bilong Indonesia bikos birua i no mas kamap nating.

Planti sapatim i paitim na brukim ol samting long Jayapura. Meri bilong em i tok lida ya i bin stap long wanpela miting wantaim opisal bilong Indonesia bipo long ol i kilim em.

Ripot i tok olsem i bin gat blut long nus bilong em na ka bilong em i luk olsem i bam tasol ol pipel bilong Wes Papua i suitm tok yet long Indonesia.

Fri edukesen long taim nogut

Edukesen Minista Muki Taranupi i tok olsem em bai askim Gavman long givim fri Edukesen taim em askim K120 milien long gavman baset bilong neks yia.

Mista taranupi i bihianim tingting bilong Paia Wingti husat i tok em bai askim gavman long givim fri edukesen long taim nogut.

Fri edukesen bai givim helpim long komyniti skul i go mak long sekonderi skul tasol. Ol koles na yunivesiti bai peim fi yet.

TOK SORI

Ol wokman nameri bilong Wantok Niuspepa i sori tru long dai bilong

MATHEW PAYAU.

Em i wanwok na pren bilong mipela.

God i ken givim bel isi long famili bilong em na givim gutpela malolo oltaim oltaim long em.



WANTOK

Gavman i no helpim rot bilong oil pam growa

PLANTI liklik oil pam growa long Oro provins nogat gutpela rot bilong salim oil pam bilong ol long bikplea fektori olsem Higaturu bikos rot bilong karim i kam i bagarap nogut tru.

Hai Komisina bilong Britain Simon Scadden mekim tok olsem taim em opim selebresen bilong makim 25 ya kampani i wok.

wantaim blok na tupela sait wantaim i no save mekim mani." Mista Scadden i tok.

Kampani i stretim rot bilong bringim developmen na mani i go long ol pipel na tasol nogat helpim bilong gavman long stretim ol rot we i wok long bagarap.

"Mi laik askim husat manmeri bilong fiksion ol

dispela rot long putim dispela ol rot olsem namba wan samting na stretim hariap." Mista Scadden i askim.

Higaturu Oil Pam kampani i kamapim wok bilong planti manmeri na kisim mani i kam insait long kantri. Kampani i save givim trening long ol wok manmeri na sampela taim salim ol ovasis

long kisim skol. Higaturu Oil Pam kampani em Comonealth Development Koporesen (CDC) na Papua Niugini Gavman i papa long en. CDC em wanpela bisnis bilong Britain wantaim ol narapela kampani olsem Steamships, Courts na British American Tobacco.

Morobe Seavings na Lon Sosaiti tok long rausim tubel

DAPSY MINGKA i raitim

MENESMEN bilong Morobe Seavings na Lon Sosaiti i stap long han bilong tupela ekperiens opisa husat i bin wok long Benk ov Papua Niugini bipo, na tu long

Federesen ov Seavings na Lon Sosaiti.

Mista Basanu i tok, em interim menesa na Mista Passingan em i maketing na pablik rilesen opisa. Gavman i bin luksave long tupela na makim ol long lukautim wok bilong sosaiti we em i nupela projek aninit long Komes Divisen long gavman bilong Morobe provins.

Tupela opisa Basanu na Passingan i no bin menesim olpela sosaiti long Morobe husat nau i slip dai pinis.

Mista Basanu i bin traim long helpim Lae Industriel Seavings na Lon Sosaiti long kamap gut gen tasol sik bilong dinau nogut i bin kilim olgeta wok long traim long kirapim gen Lae Industriel Seavings na Lon Sosaiti.

Wok bilong Passingan na Mista Basanu long Federesen ov Seavings na Lon Sosaiti i kam inap long 1984 na 1985, em long glasim wok bilong sosaiti long Papua Niugini. Mista Basanu i tok wok bilong wanwan sosaiti inap long PNG em i bin stap long menesmen bilong wanwan sosaiti yet wantaim ol bod dairekta bilong ol yet.

Provins na PNG i bin stap long han bilong ol menesmen bilong ol yet.

Mista Basanu i tok em i bin askim Benk ov Papua Niugini long pasim olgeta sosaiti long Morobe provins long yia 1986, long wanem, dinau nogut i bin kilim pinis wok bilong olgeta sosaiti long provins.

Mista Scadden i tok kampani i bin wokim ol rot wantaim helpim bilong Wol Beng tasol nau rot i go bagarap tru. Dispela i mekim hat long ol pipel i kam salim oil pam ol kamapim long liklik blok bilong ol.

Em i wok bilong gavman long lukluk long dispela kain hevi tasol gavman i no mekim wanpela samting. Oil pam i wanpela samting helpim planti manmeri bilong Oro provins long gat gutpela laip na taim rot i bagarap, planti pipel i nogat mani na wok.

Mista Scadden i tok: "Mi klia olsem klostu olgeta rot bilong ol liklik fama i bagarap tru na i hat long kisim oil pam i kam.

"Dispela i save kamapim hevi bilong kampani na ol mameri



Krismas i kam klostu! • Chemcare Pharmacy long Goroka i bilasim stua long soim bilas bilong krismas.

Goroka bai kisim moa wara saplai

PEKU PILIMBO i raitim

GOROKA taun bai kisim moa wanpela saplai bihain long Japanis Intanesenel Kopresen Ejensi (JICA) i promis long putim mani long wara saplai sistem long kamap gut long sevim ol manmeri bilong taun.

Provinsal Woks Mensa Paul Ambane i tok Goroka i lukluk long kisim K20 milien insait long K29 milien we JICA i tok long givim. Dispela K29 milien em bilong Lorengau na Goroka taun wara saplai projek.

Gavman bilong Japan i bin kamapim dispela wanbel pinis wantaim gavman bilong Papua Niugini long dispela yia long kamapim na stretim gut ol wara saplai insait long kantri.

Mista Ambane i tok wara saplai sistem long Goroka tude i inap long sevim 250,000 pipel bilong Goroka tude tasol taim ol setelmen na ol asples arere long taun i wok long pulim wara i go nabaut, dispela i kamapim hevi long saplai bilong wara insait long taun.

Em i tok tu olsem taun i nogat gutpela rot bilong makim mita na sasim ol dispela setelmen na ol ples lain long pulim wara i go na yusim.

Olsem na Mista Ambane i tok taim nupela sistem i kamap bai kaunsil i kamapim ol mita na bil sistem bai ol i ken kisim mani bilong lukautim ol dispela sevis i stap gut long Goroka taun.

Taim dispela projek i stat sampela taim long dispela yia, bai senis i karamapim nupela wara tenk arere long ol olpela tenk we i sanap pinis Joki Joi wara ausait tasol long taun.

JICA i givim konsaltensi wok i go long Pacific International Consultancy long lukautim ol wok i kamap long projek.

Tohian stretim rot bilong timba bisnis long ples

OL pipel bilong Anir Ailan long Nu Ailan provins bai go insait long wanpela bikpela wok bilong timba projek we Gavana Paul Tohian i go pas long en.

Long Fraide Novemba 9, 2001, Gavana Tohian i givim K34,000 sek mani i go long Mili Giage husat em brens menesa bilong Farmset kampani long Rabaul long kisim wokabaut somil na K6,000 i go long Daniel Vavar sels

menesa bilong UMW kampani long kisim 090 model senso wantaim frem. Tupela masin wantaim i bilong ol pipel bilong Anir Ailan aninit long kampnai Nebingsak Entaprais Ltd we i gat 5-pela bikpela membas.

Ol pipel i bin tok strong long timba projek i mas kamap long ailan bilong ol long ol i ken yusim dispela rot long painim gutpela rot bilong sevis na developmen, Gavana Tohian i

tok. Mista Tohian i tok ron long bot na balus em bikpela hevi tru long sevis i no save go hariap long ol dispela ailan pipel na olsem wanwan lain tasol wantaim mani i save ron i go i kam.

Mista Tohian i tok i gat komiti i stap pinis wantaim Nu Ailan Provisnal Edministresen long lukim olsem foapela wokabaut somil i kamap long Tanir LLG, Konoagil LLG, wanpela long Nu Ailan LLG na

wanpela long Murat LLG.

Mista Tohian i tok dispela timba projek em wanpela rot bilong ol manmeri i ken mekim mani bikos ol i ken salim timba long ol pipel long wokim haus long ailan.

Mista Mili Kiage i tok taim dispela masin i kam kamap, bai Farmset i go het na givim trening ol pipel long we bilong yusim dispela masin.

Ol mausman bilong

Nebingsak Entaprais kampani Kenny Laima na arapela lida olsem pasto Chris Lukun na pastor Johnson Pilailo husat i go pas long dispela projek i tok amamas long Gavana Tohian long putim mani long kamapim dispela projek.

Ol i tok tu olsem menesmen i mas lukautim gut ol dispela projek bikos em i wanpela nupela projek long ailan na bai inap sevim gut ol pipel long komyuniti.

REWARD

FRI BULLBA NA WINDO TINT I KOS K2500


Long markim 50 krismas bilong Toyota Land Cruiser long olgeta hap long wol, Ela Motors bai putim Bullba na Windo Tint long 50 nupela Toyota Land Cruiser ol i salim long mun Oktober 2001.

Na tu... Wanwan baiya bai kisim wanpela 50 yias hamamas presen we i gat Spesel Belt na Bakol Set, presentesen Coaster na wanpela 50 Yias Toyota Land Cruiser Kep.

NOKEN ABRUSIM... DISPELA OFA I STAP LONG OLGETA HAP LONG PNG!

Ela Motors

101 BUNDOBI PI 222400 • LAE 472222 • KOROKA 333100 • GOROKA 822110 • GOROKA 732104 • MT HAGEN 542100 • WENAY 822255 • KUPENO 842270 • KONDIE 822585 • TABURAI 540000 • WANMO 822255 • POROGERA 542107 • BUKA 873015 • LIME 844400 • ALGOTAI 841010



Disney pilai graun i no pulim planti pipel moa

• Pilai graun bilong ol pikinini long Amerika ol i kolim Disney Land. Ol mamapapa bilong ol save yusim mani bai ol pikinini i ken pilai long hap. *Ol foto: The Weekend Australian*

Olpela Praim Minista Howard kisim bek sia

JOHN Howard, olpela Praim Minista bilong Australia i winim bek sia bilong em olsem Praim Minista las wik long ileksen.

Dispela em namba tri taim Mista Howard i kamap olsem praim minista na em i in stap olsem tupela taim pinis.

Mista Howard i winim oposisen lida Kim Beazley husat i traime na kempen strong tru long rausim Mista Howard na kisim sia bilong praim minista.

Mista Beazley husat save toktok planti i no mekim wanpela toktok tasol em i tingting long lusim lida bilong oposisen i go long han bilong narapela man.


Em i lusim sans bilong em longkamap praim minista long Sarere taim ol kaunim vot na tokaut olsem Mista Howard i winim ileksen.

Oposisen lida i wanpela man bilong toktok planti tasol em i no mekim wanpela toktok taim ol pipel askim em long Sarere.

Em i tokim ol olsem politiks em politiks na em inap long stap olsem lida bilong oposisen na laikim narapela long kisim ples bilong em.

Long wankain taim John Howard i amamas wantaim famili bilong em taim em harim olsem em i winim bek sia bilong em.

Ol pipel i les long Mista Beazley



• Mista Howard karim wanpela bebi taim i em i kempen raun long ol wanwan siti long Australia.

bikos em i bin laik kisim ol refuji i kam long Australia tasol John Howard i strong long kempen na salim ol i kam olsem long Papua Niugini na Nauru.

Ol pipel bilong Australia i les long kisim ol ausait lain i kam insait long kantri bilong olsem na ol les long tingting bilong Mista Beazley na i no votim em.



Mama bilong kuka ya!

Dispela kuka em ol i groim insait long wara teng bilong salim long ol kantri olsem Japan. Tupela saveman bilong kuka i lukluk long wanem samting i mekim na kuka kamap bikpela olsem.

Ol wol lida laik paitim teroris

LIDA bilong wol i bung na tokaut olsem olgeta mas bung wantaim long paitim teroris na i noken lukluk long teroris olsem birua bilong Amerika tasol.

Olgeta pasim tok gut tru olsem noken larim na mekim isi long ol man husat bagarapim planti laip pinis.

Olgeta kantri i mas

pasim tok olsem sapos ol i larim dispela ol man long kisim ol samting bilong bagarapim narapela manmeri, ol inap kilim olgeta manmeri bilong graun.

Ol i tok olgeta kantri i mas taitim sekyuriti sistem bilong ol na noken lairm ol manmeri nating i kam insait na raun subim nus nabaut.

Osama bin Laden na lain bilong em i tok pre-tim ol narapela kantri olsem ol gat kankain masin na marasin nogut bilong kilim na bagarapim tru dispela graun.

Sapos olgeta gavman na komyuniti lukaut gut, olgeta samting inap orait tasol.

Meri kisim laip yia kalabus

KOT i salim wanpela meri i go laip yia kalabus bihain long em i kilim na katim man bilong em i go liklik liklik tru.

Katherine Mary Knight, 44 i tok em i bin kilim man bilong em John Price, 44. Em i katim em i go olsem sup na kukim sampela long pot na sevim ol wantaim kumu long plet.

Ol plis painim het bilong Mista Price insait long wanpela kuking pot insait long ples bilong kuk

Jas i tok meri bai kamapim moa birua olsem na em i mas stap laip yia long kalabus. Meri ya i bin mekim dispela ol pipia pasin bikos man i les long skelim ol samting wantaim meri na rausim meri ya long haus bilong em.

Jas i ting olsem gupela meri i mas slip kalabus bikos em i stap bai belhat i mekim em kilim planti arapela man nating.

Surikim save go bikpela

• Wanpela man i tingting long kisim moa save long het bilong em. Em i askim ol dokta long sekim het bilong em sapos ol i kem stretim em.





Nevi bruk tupela hap

NEVI bilong Australia i bruk tupela taim ol lukim ol bot pipel na refuji i kam long Australia.

Sampela nevi i sori nogut tru long bot pipel na i no laikim polisi bilong gavman long rausim ol i go long narapela kantri olsem Papua Niugini na Nauru.

Planti i tok ol bot pipel husat i kam long Australia na i no gutpela long subim ol i go long narapela pipia kantri husat wok long painim hat.

Wanpela opisa bilogn nevi husat i kisim oda i no bihainim tok bilong

bikpela bos na gavman na ol i rausim namba bilong ol.

Wanpela man husat lukim ol pipel taim em opisa long wanpela bot i tok olsem ol pipel i kam na luk sori stret i stap na Australia i wok long tanim beksait na salim ol i go.

Em i tok dispela i no wanpela gutpela pasin na em yet i les logn bihainim pipia polisi bilong gavman.

Pianti i no wanbel long karim aut wok bilong ol tasol ol i pret long lusim wok bilong ol olsem na ol karim aut ol oda ol i no wanbel long en.

• Myfanwy Walker em wanpela bilong ol planti yangpela man na meri husat i laik save long tru tru papa bilong ol. *Poto na stori: The Weekend Australian.*

STAT long 1977 i kam, i bin gat sampela man husat saplaim wara bilong ol bai ol dokta i ken painim kiau na kamapim bebi.

Nau planti pikinini i bin kamap tasol ol dispela pikinini i no klia na save husat em papa tru bilong ol.

Ol dokta na nes long haus sik i gat rekot bilong w anem samting tru i kamap tasol ol i no laik tokim ol yangpela man-meri.

Planti bilong ol dispela pikinini i kamap bikpela na i gat 20, 21 o 23 krismas tasol ol i no save ol kamap olsem

wanem.

Ol dokta tu i bin pasim tok wantaim papa bilong ol taim em i givim bodi wara bilong em na ol dokta i les long tokaut.

Nau yet i gat 19-pela kain yangpela olsem husat bung pinis na i stap wantaim long

traim sekim na painim papa bilong ol.

Olgeta opisal bilong haus sik i tok papa yet i mas kam aut na tok klia olsem em i papa bilong ol.

Ol bai i no mekim olsem bikos long promis ol i givim man.



Taim bilong pre

• Ol Moslem mama bilong Indonesia i bung na pre long God. Ol i pre olsem susa bilong ol long Afghanistan i abrusim bom bilong ol Amerika.

Pop bungim ol paia man bilong Niu Yok, Amerika

POP John Paul i bungim sampela paiaman husat paitim paia long taim bilong teroris birua long Wol Tred Senta long New York.

Long wanpela spesol bung em holim bilong tingim bek dai bilong ol pipel long birua, em i tok ol famili husat lusim famili bilong ol i ken kisim bel isi.

Dispela lotu bung long Santu Peter Basilika long Rome, em bungim na givim blessing long 8-pela paiaman.

"Mi tok gutpela welkam tru i go long ol grup man husat kam long New York Paia Dipatmen.

"Ol i mak bilong strong na wari bilong man we save givim ol strong long wok taim birua i bikpela tu," Pop Paul husat nau i gat 81 krismas i tok.

Moa long 300 paiaman i bin dai long birua bihain long i hariap i go insait long wol Tred Senta i paia taim tupela balus pundaun insait long haus.

Em i pre long famili bilong ol man-meri husat lusim laip long birua. Planti tausen manmeri tru i kam pulap long dispela bung. Em i amamas long gutpela na strongpela man.

HITS & MEMORIES
FM 100

RADIO NETWORK

PORT MORESBY FM 100.3	MT. HAGEN FM 100.4	TABUBIL FM 100.3	ALOTAU FM 107
BOROKO FM 100.3	LAE FM 100.5	WEWAK FM 100.8	BOREGORO FM 107.7
GOROKA FM 100.2	POPONDETTA FM 100.5	MADANG FM 100.8	HOREALOA FM 107.5
KAVIENG FM 100.2	RAMU FM 101	KOKOPO FM 100.8	WATERHOLES FM 107.3
LORENGAU FM 100.3	KUNDIAWA FM 101	BUKA FM 100.3	KAINGUMA FM 107.1
KIMBE FM 100.3			DIMODIMO FM 107.7

When you advertise on FM 100, you can rest assured that your message is being heard in and around these locations on these frequencies right around PNG. Just call 300 4300, fax 300 4399 or email us at kalang@tiare.net.pg & we'll take care of all your advertising and promotion needs.

Ol bikhet lain i save bagarapim gutpela wiken

GUTPELA wiken i save kamap tasol sampela taim i save gat nois na hevi we i save bagarapim gutpela malolo, gutpela amamas na gutpela plen bilong famili na yumi wanwan.

Ol skul pikinini na papamama i save amamas bikos bihain long faivpela de bilong wok o skul, em i taim bilong malolo, sapos em i potnait wik, orait papa na mama i kisim potnait pe, bikos em i wiken em i taim bilong malolo na amamas long betde pati o raun lukim ol pren, lotu o pilai spot, planti pikinini i save amamas bikos ol i ken go waswas long nambis o stap long haus na lukim piksa o pilai wantaim ol pren bilong ol na ol arapela samting moa.

Fraide em i potnait bilong planti wok manmeri na ol i save amamas long pinis wok na go long haus bikos ol i gat plen bilong ol pinis long inapim. Plen long pinisim laik bilong ol pikinini, ol meri na gel-

pren long samting ol i promisim ol long en.

Wanpela potnait Fraide na ol pikinini i wet long haus i stap bikos mi tokim ol olsem bai mi baim ol sispop na aiskrim bilong ol.

Fraide ya na bas stop i pulap long ol man. Sampela i wetim bas na ol i redi long resis bilong kalap long wanem bas namba i go olsem long ples we ol i laik go long en. Tasol sampela yangpela man i sanap nating nating long bas stop. Lukim sampela long ol dispela bai yu pret bikos sampela em ol stil lain husat i sanap redi tasol long pulim bek o pulim hanpaus long trausis poket bilong ol manmeri.

Mi wantaim pikinini i go long maket long baim kumu.

Mi wok long baim poteto i stap na pikinini i pulim han bilong mi na tok yumi go hariap, pait ya".

Kwiktaim mi tanim na lukluk na klostu long mipela ol man i ron nabaut na mi tok tude ol

bai karamapim mipela long pait.

Tasol samting tru em ol i ronim wanpela man i laik stilim wanpela traipela melon na ronawe wantaim. Em i no baim.

Maski mitupela i no pinisim gut maket, mipela i hariap lusim maket i go. Ples i pas pas tru na wanpela manki i kam klostu long mi na i pilim sait poket long trausis tasol laki i nogat samting. Mitupela pikinini i pusim we bilong mipela long pas pas hap na go aut long maket banis.

Ausait tu ples i pas pas. Mipela i bihainim bas stop hap we i pulap long ol lain i wetim bas na ol manmeri i salim buai, smuk, dring na ol kuk kaikai long hap sait bilong bas stop na tu insait long ol haus we ol i salim ol seken hen klos.

Narapela samting i kamap gen long ausait. Ol manmeri i stat long ron nabaut. Klostu mipela i bam wantaim

sampela bilong ol. Mi pulim han bilong pikinini, karim bilum kaikai na mitupela ron wantaim ol manmeri. Insait long mi, lewa bilong mi i pairap krangi na mi tok tude stret bai mitupela pikinini bai kisim hevi. Na mi tingting planti long ol arapela pikinini long haus. Mipela i ron na wanpela meri husat i ron wantaim liklik tebol we em i wok long salim buai na smok long en klostu i bamim mitupela. Planti long ol lain i salim buai long sait bilong bas stop i kisim taim bikos taim ol man i ron nabaut na karamapim ples, ol i lusim buai bilong ol. Planti bilong ol em ol meri ya. Ol man i kisim nating buai na smuk bilong ol. Mi harim olsem ol plis i laik rausim ol manmeri i salim ol samting bikos em i taim pinis.

Taim samting ya i kamap, i no ol maket lain tasol i ron, nogat. Ol lain long bas stop tu i ron krangi na ol bas i laik hariap tekov long

dispela pas pas hap.

Mi pulim pikinini na mitupela i ron abrusim bas stop na go long narapela sait bilong go long stoa. Pret pasin i stap yet tasol mitupela i laki long nogat bikpela birua i kamap. Mitupela i kwiktaim go insait long stoa na hariap i go long haus.

Narapela taim gen long apinun, mi na narapela wantok wantaim liklik bebi bilong em i go long maket. Mipela i raun gut long maket na mipela i no tingting long ol arapela samting, susa ya i karim bebi bilong em i slip long bilum wantaim hanpaus long narapela sait. Mi wokabout long sait bilong bebi. Kirap nogut taim susa ya i singaut olsem wanpela man i kisim hanpaus bilong em.

Man i katim bilum wantaim wanpela naip o sisin na hanpaus i pun-daun. Ples i pas pas tu na nogat sans long pikim hanpaus hariap. Bipo em i kisim na ronawe, susa i singaut na planti lain i kam bung long hap na manki ya i sem na tekov. Mi kisim hanpaus bilong susa na givim em. Em bin gat K130 insait long en. Tasol sapos meri ya i no painimaut hariap, stilman ya bai ronawe wantaim olgeta mani long baim kaikai na ol arapela samting long famili bilong em na ol bai kisim taim. Mipela i baim ol kaikai samting hariap na lusim maket.

Orait, narapela potnait Fraide gen, mi go stret long haus bihain long wok na bikos bikpela taim i stap yet, mi pulim tripela pikinini i go long stoa. Ol manki i laik kaikai aiskrim long dispela Fraide apinun.

Hapwe taim mipela i wokabout i go daun long stoa, ol man i ron krangi. Olgeta lain long rot i painim ples bilong hait. Daunbilong long bas stop long Gordons maket, pait i bruk na ol plis i sut wantaim tiages long stapim trabel. Mi wantaim ol pikinini i painim ples bilong hait na ol pikinini kwiktaim i go insait long banis bilong ol pren bilong ol. Mi wari long narapela husat i bin wokabout longwe long fran bilong mipela. Taim samting i orait liklik, mi tokim tupela manki long stap long haus bilong poroman na wetim mi. Mi mas painim narapela pikinini na wokabout wantaim em i go long stoa sapos ol samting i orait.

Noken lus tingting long aiskrim bilong mipela mama," tupela i singaut.

Bel bilong mi i orait taim mi painim narapela pikinini. Em bin hait long haus bilong wanklas bilong em long hap sait bilong rot.

Sampela pren bilong mipela long rot i tokim mipela long wokim sop-ning kwiktaim na go bek long haus bikos em i no seif. Ol manmeri i wok long i go i kam na planti lain i lusim pinis bas stop we pait i bruk na ol plis i pairapim tiages na apinun i wok long surik i go na tudak i kamap isi isi.

Mitupela pikinini i kisim aiskrim bilong tupela na bihainim rot i go bek long haus. Haus i stap 15 minit samting long stoa na bas stop.

Fraide apinun na bikos wiken na nogat wok long neks de, planti manmeri i no wari. Olsem na planti pipel i raun long rot na planti i sanap o sindaun stori na kaikai buai wantaim ol pren, hauslain na wantok i stap. Sampela long arere bilong rot, sampela long sait banis long haus.

Wanpela meri wantok i lukim mi i kam na em i singautim mi. Mi tokim pikinini long givim aiskrim bilong tupela long haus bilong pren bilong ol na em i go het long haus bilong mipela. Mipela i sindaun ausait long banis bilong haus long meri wantok na stori i stap. Stori gut na i no wari long go hariap long haus bikos em i wiken ya. Nogat wari long kuk hariap bikos ol pikinini i no inap skul long Sarere. Na tu i nogat man bai komplem long kaikai i no redi na mi mekim wanem samting na i no go hariap long haus. Taim bilong malolo gut long stori wantaim ol hauslain ol pren na wantok.

Stori gut na neks minit, ol man long strit i ron nabaut na singaut holap. Wanpela holap pasin i kamap klostu long mipela tasol. Mipela i tanim na lukim ka i tekop na kwiktaim mi lusim meri wantok na go antap long painimaut wanem samting tru i kamap.

Plantu lain i bung ausait long geit we mi lusim tupela pikinini bilong mi i stap. Mi painimaut olsem papa bilong haus i laik go aut long geit wantaim ka na ol raskol i hensapim em na kisim ka i go. Ol i painim gan long en na kisim ka long en.

Mama i tok taim em i lukim dispela samting, em no wari long ol raskol, bikpela tingting i stap long liklik pikinini i

stap insait long ka. Em i kisim pikinini tasol ol raskol i kisim ka i go. Ol man i opim ai na maus tasol. Long ol ripot, ol raskol i bin sanap was yet long hap sait bilong rot na wetim man i laik draiv aut nau na ol i hensapim em long kisim ka na yusim long ol arapela stilpasin na kriminel wok long nait.

Dispela inap long mi long wanpela apinun. Klostu mi na ol pikinini bilong mi i bungim bikpela birua. Pastaim mipela i ronawe long pait long bas stop na nau em wanpela holap. Laki na ol pikinini bilong mi i bin pilai long baksait bilong haus tasol ol i lukim holap pasin i kamap na sapos ol raskol i bin pairapim gan, mi no laik tingim birua we i ken kamap.

Mi singautim tupela pikinini na mipela kwiktaim wokabout i go long haus, pasim geit na stap insait long banis olsem ol kalabus lain. Tasol bai yumi mekim wanem, Mosbi i kamap olsem dispela kain ples we pret pasin i stap na i luk olsem ol manmeri na pikinini i nogat fridom long raun long laik bilong ol bihain long tudak olgeta nait. Sefti em i wanpela bikpela samting long Mosbi maski ol manmeri na famili i laik stap amamas, wari long disepla samting em i stap pas long het na tingting bilong olgeta pipel long siti.

Pasin bilong pait, stilpasin long poket na pulim bek o bilum bilong ol mama, tiages na gan i pairap i no pinis tasol i stap yet long Gordons maket na bas stop na em i save go nogut long ol wiken, moa yet long Fraide na Sarere apinun. Tasol long ol arapela de tu, pait na tiages i save kamap yet na planti skul pikinini i save bungim hevi long dipepla taim ol i wokabout i go long haus na tu ol i laik kisim bas long Gordons maket mein bas stop.

Plantu papamama i wari long ol pikinini na i moabeta sapos ol atoriti i ken lukluk strong long dispela samting na wokim samting long en bikos sefti na laip bilong ol pikinini na pablik i stap long hevi.

Fraide apinun we mi laik wokabout raun wantaim ol pikinini, go long stoa na maket i no gutpela taim long Gordons eria. Ol stilpasin, pait, gan na tiages i pairap i save bagarapim gutpela wokabout raun long ol famili, mama na ol pikinini na pablik.



NATIONAL WEEKLY HIT PARADE

October 17/11/2001

SPONSOR: TRADEWINDS

W/B	L/W	T/W	SONG	ARTIST
18	7	1	WHY MY ANGEL	SLUMZ OF SIMBU
2	1	2	LAIKIM YU NATING TRU	NEW PAINIM WOK
8	2	3	WI SIMBO	RAIOT 08
3	3	4	OULAMAGI	DEMAS SAUL
1	4	5	KEKENI KEKENI	KRYMUS II
19	8	6	BETENISI	ZHON BOSCO/LOUIE WARUPI
7	5	7	PASIN BRATA	DEMAS SAUL
5	6	8	SMILE NATING	DUSTYS BAND
0	18	9	FRIENDS FOR A LIFETIME	SLUMZ OF SIMBU
0	20	10	REGGAE IS LAREVA	BASIL 'BLITZ' GREG
0	19	11	HAPOLASA	EDEN SOULS
4	9	12	O SINE	DEMAS SAUL
9	13	13	NGAU MALABONG	QUAKES
12	12	14	NONGA BASE	ANSLOM
11	11	15	JABON IBALA	STRUGGLERS BAND
6	10	16	JESTY MORI	FEKE YUTZ
16	17	17	PONDOPONDO	FELIX YAUSI
13	15	18	TALAIKU	QUAKES
10	14	19	TINGANA VUDU	NEW PAINIM WOK
0	0	20	MAMA	PATTI POTTS DOI

IN MAMA PATTI POTTS DOI
OUT SORI VADA LASI DEMAS SAUL

SOURCES: YUMI BELO SHOW
LAIK BILONG ANKOL E.T
COCA COLA GARAMUT
FLAME CULTURE & PHONE ENQUIRES

Taim bilong gavman long skelim mani

YAKAM KELO i raitim

GAVMAN bai pasim baset bilong Papua Niugini long dispela mun. Baset em bikpela samting long Papua Niugini bikos dispela em mani bilong gavman i mas givim i go long olgeta gavman dipatmen, ol provins na distrik na ol bikpela wok bilong givim sevis na developmen long kantri.

Baset bilong dispela ya i bin K3.2 bilien na long dispela ya bai yumi wet na harim gavman i tokaut long amas em i gat bilong lukautim ol wok, ol sevis na ol pipel long neks ya i go. K3. bilien em mak PNG gavman i save kamap long en olgeta ya long wokim baset bilong kantri.

Ol saveman i save tok, gupela baset i save kamap bihainim wanem kain gavman em kantri i gat. Sapos gavman i wok gut na pulim planti mani i kam long kantri, orait kantri bai i gat gupela baset bikos bai ol dipatmen na ol provins wantaim ol wok bilong gavman bai i gat gupela mani bilong mekim wok bilong ol. Na taim i gat inap mani, yumi ken lukim olsem ol wok na sevis i ron gut na ol pipel i ken kisim.

Tasol bikpela wari i save stap tu olsem, maski i gat gupela mani i kamap long ol gavman opis i mekim wok wantaim, ol pipel i no save kisim sevis na developmen ino save kamap bikos ol lain i go pas o menesa bilong dispela opis i no save brukim gut mani long wok. Sampela taim, ol wokman i no mekim gut wok na sampela taim ol i tromoi mani i go long ol arapela samting we i no kamapim gupela wok bilong pipel. Kantri i no inap kisim gupela developmen long dispela kain pasin. Ol plisman i no inap mekim gut patrol long stapim hevi bilong lo na oda long ol haiwe bikos ol i nogat petrol bilong ol plis ka i yusim long ron, ol plisman i nogat gupela haus bilong slip olsem na ol les long wok gut olsem na hevi bilong lo na oda bai i kamap bikpela yet. Sapos gavman i no givim gut mani long wok bilong plis, ol dispela kain hevi bai kamap. Sapos plis dipatmen i kisim bikpela baset tasol bos bilong plis i no yusim gut mani long ol wok tru bilong stapim lo na oda, orait hevi bilong lo na oda bai i stap bikpela yet.

Bikpela hevi bilong baset em long sait bilong menesim mani we i kam long baset taim gavman i brukim na skelim long ol wok bilong lukautim na developim kantri.

Takis i kamapim baset

Gavman i save pulim mani i kam long takis we olgeta kampani na ol wokmanmeri i save baim i go long opis bilong takis. Ol wokmanmeri i save baim takis olgeta potnait na ol kampani i save baim takis long mun o sampela mun bihain. Gavman i save kisim takis tu long ol pikinini na olgeta manmeri husat i no save wok. Ol i save baim takis taim ol i go long stua long baim kaikai o kolos na ol arapela samting yumi laik baim. I gat takis tu i karamap insait long ol dispela prais na yumi baim olsem wanpela wanpela kos tasol na bihain ol papa bilong stua yet bai brukim na salim takis bilong gavman i go. Ol dispela mani bilong takis em gavman i kisim na putim i go insai long baset we em bai brukim gen long olgeta ya long wok bilong skelim baset. Sampela taim mani i kam long takis i no save inap long

kampim baset bilong kantri bikos i gat planti projek na ol wok i kamap na mani ya i no inap. Olsem na gavman i mas painim sampela mani moa long pasim gut baset. Olsem na wanpela rot tasol em long gavman i mas kisim dinau long beng. Olsem na sampela taim yumi harim olsem gavman i save toktok long Wol Beng o sampela taim wantaim Sentrel Beng hia long PNG yet. Dispela em long kisim dinau mani. Gavman i bin kisim planti dinau pinis na ol dispela dinau i stap insait long mak bilong bilien we kantri bai bekim long planti krismas i kam bihain.

Praim Minista Sir Mekere Morauta i bin tokaut long las mun olsem dispela baset bilong neks ya bai wanpela hatpela baset tru.

Dispela kain nek i soim olsem mani bai i no inap kam ful stret o gavman bai katim sampela mani long namel o gavman bai i no inap putim mani long sampela wok na sevis samting. O ating baset bai i sot liklik.

Sapos baset bai i sot, gavman bai tingting long dinau o salim sampela samting long mekim mani bilong go inapim baset.

Baset bilong Edukesen

Sapos gavman i tok edukesen em nambawan na bikpela samting long kantri, orait gavman bai putim bikpela mani tru i go long wok bilong edukesen. Dispela i min olsem olgeta tisa bai kisim gupela alawens, ol skul bai i gat inap mani bilong baim ol buk na ol samting bilong skul, skul fi bai i kam daun na planti arapela eria bilong mekim

wok bilong edukesen bai kamap gut. Yumi pulap pinis long dispela kain stori bilong edukesen taim ol toktok bilong fri edukesen i kamap bikpela long kantri sampela taim i go pinis. Ol skul i save tok, baim olgeta skul fi pastaim inap gavman i salim mani bilong fri edukesen i kam orait mipela i bekim hap mani bilong yupela. Tasol yumi save wet i go na nogat. Ron bilong edukesen mani i no kam gut long ol skul na yumi ol papamama i save karim dispela hevi bilong lukautim skul.

Baset bilong Agrikalsa

Olgeta taim gavman i save toktok long agrikalsa em bun tru bilong ol pipel bilong Papua Niugini. Gavman i save tok maski gol, kopa na wel i pinis, agrikalsa bai i stap yet long sevim kantri na ol pipel bilong en. Dispela em ol switpela toktok bilong gavman long mekim bel bilong ol pipel i amamas na tok, gavman i tok tru ya. Olsem na sapos gavman i tok agrikalsa em bun tru bilong Papua Niugini, em i mas putim gut mani go long kirapim na strongim wok bilong agrikalsa. Sapos kopi i save helpim na sapotim planti tausen manmeri bilong ples, orait gavman i mas putim moa mani i go long wok bilong kopi long sapotim prais bilong kopi na apim prais bilong kopi taim ol manmeri i sajim kopi bilong ol, sapotim ol manmeri long planim moa kopi na givim ol gupela trening long gupela rot bilong kamapim gupela kopi plentesen, gupela menesmen bilong kopi na ol rot bilong lukautim gut mani bilong kopi. Wankain tu long ol arapela olsem kopra, welf pam, kakao,

na ol arapela plentesen bilong ples.

Em i tru olsem agrikalsa em samting we ol pipel bai planim na lukautim long graun bilong ol na bai i stap longpela taim yet. Ol pipel i ken brukim graun na planim na olsem tasol agrikalsa bai i stap yet taim gol na kopi na wel i pinis. Agrikalsa em rot tru bilong ol pipel bilong ples i ken gat mani long poket bilong ol long baim skul fi, kolos, ol samting long stua na wokim bisnis tu. Sapos gavman i bilip long dispela, em bai strongim agrikalsa long baset bilong em.

Baset bilong Bisnis

Wok bisnis em bun tru bilong gavman i gat mani olgeta ya. Ol bisnis i save baim takis na dispela takis mani tasol i save kamapim baset bilong kantri. Gavman i mas sapotim wok bilong ol bisnis we i karamapim ol praivet bisnis na ol kampani hia loing kantri. Gavman i ken mekim gut long ol long rot bilong daunim takis long ol samting ol i baim i kam long ovasis long mekim wok wantaim. Sapos gavman i bilip long wok bilong ol bisnis insait long kantri, orait em i mas soim sapot bilong em long ol pasin we i ken mekim ol bisnis i amamas long wok na kamapim moa wok bilong ol manmeri bilong PNG na ol i ken baim takis yet i go long gavman olgeta taim. Sapos gavman i daunim gut hevi bilong lo na oda, orait ol bisnis tu bai i gat amamas long wok gut.

Baset bilong Helt

Helt em bikpela samting maski

em i no save mekim wanpela wok bilong pulim mani i kam long kantri. Tasol em i bikpela samting bikos helt em laip bilong ol pipel bilong Papua Niugini. Taim olgeta pipel i stap laip na amamas na sindaun gut, kantri i ken mekim gut olgeta wok em i ken mekim long mekim mani, kisim save, wok agrikalsa, sindaun gut na amamas wantaim famili na ol pren. Taim yumi stap laip, arapela kantri i lukim na i tok, Papua Niugini i sindaun amamas i stap bikos nogat sik i daunim ol, nogat man i dai nating nating na ol wok i ron strong bikos olgeta manmeri i nogat hevi long bodi bilong ol. Hevi bilong sik malaria i stap yet, sik misel i hevi yet long ol liklik pikinini, sik taipoid i kilim ol pipel yet na sik AIDS i kilim ol manmeri yet. Olsem na gavman i mas skelim gut baset bilong em long wok bilong pait egensim ol dispela sik.

Ol lain i save lukautim wanwan wok olsem Woks na Trensport, Plis Dipatmen, Helt, Edukesen, Bisnis, Agrikalsa na arapela moa i save komplek olsem ol i no kisim gupela baset. Ol i gat planti wok bilong mekim tasol baset i no helpim wok bilong ol tumas. Dispela singaut i save kamap olgeta ya long taim bilong brukim baset. Ol Gavana bilong wanwan provins tu i save bikmaus na pairap olsem mani bilong provins bilong ol ino stret. Olsem na yumi olgeta bai redi long harim sampela nek olsem taim gavman i brukim baset bilong 2002 long tripela wik bihain. Sapos gavman i brukim gupela baset, bai i nogat planti nois na bikmaus tumas.



JICA skelim saveman bilong em wantaim PNG

PEKU PILIMBO i raitim

JAPAN Intenesenel Koporesen Ajenci (JICA) i kamap planti projek bilong helpim ol manmeri long kantri. I no long taim i go pinis JICA opis long Pot Mosbi i bin stretim wampela wokabaut i go long lsten Hailans na Morobe provins long lukluk long wanem projek i wok long kamap.

Ol bikpela projek we wok long kamap tude em long Goroka Taun Wara Saplai projek, Goroka Yunivesiti, Dipatmen bilong Agrikalsa na Laipstok na kamapim bilong pis fam long Hailans.

Long Hailans Haiwe tu Japan Gavman i putim mani bilong stretim bris olsem Bijita, Leron na Umi. JICA i putim tu wara saplai bilong



• Kamex viles ausait long Goroka. Dispela haus i soim wampela trening senta bilong skulim ol manmeri long lukautim na kamapim pis fam long Hailans. A1, husat givim skul long arapela pipel i kisim skul long saveman bilong JICA long Aiyura. A1 i tok em i nogat inap mani bilong kamapim gutpela skul.

"Mipela askim long K150,000 bilong ronim projek tasol gavman givim mipela K800,000 tasol. Dispela mani i no inap na planti wok manmeri i no save kisim pe bilong ol.

"Planti samting mipela laik mekim long kamapim pis fam olsem sanapim fektori bilong kamapim kaikai bijong pis i hat tru.

"Mipela i gat save na wok manmeri i stap tasol nogat helpim i kam long gavman olsem na mipela save painim hat tru.

"Planti taim mi stap na salim tingting olsem mi westim taim bilong mi nating na mi mas go bek tasol mi lukim ol wok manmeri bilong mi na mi save sori," Mista Kuma i bin tok.

Mista Kuma yet i save peim ol wok manmeri taim gavman i no peim ol.


"Planti provins salim (bikpela) masin bilong ol i kamhia bai mipela fiksism tasol nogat mani bilong baim spea pat," em i bin stori.

"Bilong baim nupela masin i bikpela mani tru. Tasol sapos mipela fiksism long hia, mipela inap yusim masin narapela faiv o siksipela krismas.

"Tasol olgeta taim gavman lusim bikpela mani long baim nupela," Mista Shmidt i tok.

I gat foapela sinia voluntia bilong Japan i stap long NRC. Ol man ya em long Kouzou Kuamura, Yasoji Takamura, Yasuo Tomoda na Hiroji Ono.

Ol dispela man i save na i bin wok longpela taim tru wantaim ol bikpela masin na



• Ol wok man bilong NRI i soim sampeal pikinini bilong diwai. Save man bilong diwai i save helpim ol saintis bilong PNG long lukautim na wok wantaim ol fores.



• Tisa bilong Yunitek i soim sampela samting ol i givim long skul. Wankain taim JICA i bin helpim long salim ol man i go skul long Japan.

ol pipel bilong Mutzing ste-sen long Markham.

I gat tripela saveman tu bilong JICA i stap wantaim Nesenel Ribild Senta (NRC) long Lae, Nesnel Fores Rises (NRI) tu i gat saveman bilong JICA i stap.

Long skul bilong Maining Enjiniaring long Yunitek tu i gat sampela i stap.

Ol bikpela save man bilong Japan i kam stap long wanwan projek na skelim save bilong ol wantaim ol wok manmeri bilong PNG.

JICA i gat bilip olsem olgeta projek na save bai helpim

na developim PNG.

Planti manmeri bilong PNG husat i gat gutpela sans long kam bek na skelim save bilong ol wantaim narapela manmeri i save go skul long kisim moa save long Japan na Malaysia tu.

Bikpela hevi tru we i stapim olsave man long skelim save bilong ol wantaim ol pipel bilong papua Niugini em long mani. Gavman i no save holim tok promis bilong em na givim sapot long JICA.

Namba wan taim PNG gavman i pasim tok wantaim

JICA olsem salim save man i kam na bai gavman givim mani bilong helpim wok bilong em.

JICA save baim ol saveman bilong Japan yet wantaim bikpela mani na salim ol i kam long ol pipia kantri olsem PNG bai ol i ken kamapim sampela senis na bringim developmen wantaim bikpela save bilong ol.

Taim ol kamap long PNG, gavmann save tok em nogat mani na i no save stretim rot bilong traim kisim save bilong ol na givim long ol pipel bilong PNG.

Olgeta taim gavman tok



• Tripela save man bilong Japan wantaim bos bilong NRC long Lae Herbert Shmidt wantaim namba tu bilong em. NRC i no kisim inap mani i kam long gavman na i painim hat long baim pat bilong ol bikpela masin we ol i save fiksism.

nogat mani na i no save helpim. Ol saveman i save kam stap, kisim pe bilong JICA na planti save go bek bihain long tupela yia kontrak bilong ol i pinis.

Saveman bilong JICA long long Hailans Aquaculture Projek long Aiyura, Chiaki Kuma i bin autim wari bilong em taim em i tok: "Gavman kamapim planti giaman promis na i no save sanapim wantaim promis bilong ol.

Wankain hevi bilong mani i stap long NRC. Bos man bilong NRC we save fiksism ol bikpela masin olsem dosa bilong wokim rot, Herbert Shmidt i tok: "Gavman i save giaman putim namba bilong mani long baset pepa i go bikpela tru tasol tru tru mani mipela i no save lukim.

"Mipela i gat save man pulap bilong mekim wok tasol nogat mani na mipela sindaun nating inap apinun na go bek long haus nating.

i tingting long skelim save bilong ol wantaim PNG.

Ating olgeta sapot bilong gavman i go beksait long helpim ol saveman i kam skelim save bilong ol wantaim ol manmeri bilong Papua Niugini bai gutpela tru.

Hia em ol sampela poto soim wanem kain projek ol i wok long eri.



• Ol raun wara bilong lukautim pis long Watabung viles ausait long Goroka. JICA i save helpim ol fama olsem kain long kamapim pis fam long Hailans.

Manufacturers Council bilong PNG i bin amamasim 9-pela PNG Med Tred Fea insait long Mosbi. Moa long ten tausen pipel i bin go long lukim so long tupela de. Dispela em i sampela samting i bin stap long so. *Ol poto: IVAN BAYAGAU*




• Ol pota o man bilong mekim graun sospen i pulim planti man tu ya.



• Ol kain kain graun sospen tu i bin stap long PNG Med Tred Fe.



• Tupela mangi painim gol long stol bilong Metol Rifaineri Operesen. Dispela em i soim we bilong painim gol long wara.



• Tupela meri lauro i soim we bilong kukim Aigir bilong Tolai. I bin gat ol arapela kuk bilong PNG tu.



• Ol Kerema i paitim saksak tu ya.



• Ol meri Kerema i soim stail bilong mekim mat bilong ol.



Sauten Kros



BIPO long wanpela ples ol i kolim long Maunten Bi i gat wanpela meri na man. Tupela i stap i go na i go na ol i kisim tupela pikinini na nem bilong ol em Gemo na Madua.

Ol i stap i go na i go na wanpela taim ol i nogat kaikai tru long haus. Nau meri i kirap na askim man bilong em olsem "Yumi nogat kaikai long haus tru na mitupela i mas go long bus na painim kaikai".

Man bilong em i kirap na i tok," yu kisim busnaip na bilum bilong yu na mitupela i go".

Na tupela i laik i go na ol i tokim tupela pikinini olsem, "Mipela i nogat kaikai long haus na mitupela i go painim sampela kaikai long bus.

Na yutupela i mas pasim dua gut tru na stap insait long haus tasol. Na noken go ausait".

Tupela i tok olsem tasol pikinini boi Gemo i no laik na tupela i wokabaut i go long wanpela maunten. Gemo i kisim liklik susa Madua na karim i go insait tru long bikpela solwara.

Na bihain tupela papamama i kam bek long bus na lukim olsem tupela pikinini i no stap long haus.

Hariap tru tupela i lusim ol kaikia long haus na tupela i raun bihainim lek bilong tupela pikinini i go na i go na i go insait long solwara.

Na tupela i bihainim tu na swim i go i go insait, tupela i painim tupela pikinini i stap.

Nau Gemo na Marua i amamas tru long stap wan-

taim papamama.

I no long taim bikpela win na solwara i kamap.

Si na win wantaim i stap nau na Gemo na Madua wantaim papamama i dai.

Nau samting nogut i kamap

na ol i senis i go long lait.

Foapela lait i kirap long solwara na ol i go antap long skai. Na olgeta taim ol i stap tasol.

Nau yumi lukim antap long skai long nait taim, yu bai

lukim foapela star i lait moa i stap long Saut.

Em ol Gemo, Marua wantaim papamama bilong tupela nau olgeta nait yumi lukim na kolim long Sauten Kros.

Mi wari long tupela lapun papamama bilong mi

Dia Laipain,
Tupela papamama bilong mi i lapun tru na ol i nogat strong moa long wok long gaden, planim ol kaikai, brukim paiawut o kisim kopi na salim. Tasol i nogat man i stap long helpim ol.

Mi na ol arapela brata bilong mi i lusim ples na mipela i save wok long ol arapela provins. Ol susa i marit na ol i bisi lukautim ol famili na ol man bilong ol. Ol no save lukluk moa long tupela lapun papamama.

Mi wok long sikspela krismas pinis na nau mi laik trense i go bek long ples na lukautim tupela lapun papamama bilong mi. Tasol bos bilong mi i no luk-save long askim bilong mi. Maski hamas taim mi raitim pas na pulumapim aplikesen long dispela samting, em no wokim wanpela samting tasol em i troimol ol pas samting we raitim long kisim tok orait long en. Mi no amamas long dispela kain pasin tasol mi no laik risain. Long wankain taim tu, mi pilim strong olsem em i wok bilong mi long lukautim tupela lapun papamama ya.

Loyal Son

Dia Pren,
Wari yu gat long tupela papamama bilong yu i soim olsem yu wanpela gut-pela pikinini man husat i lavim tupela

lapun bilong em. Bipo yu lukluk long rot we yu ken helpim tupela lapun long en, mipela i askim yu sapos i gat sampela samting we ol arapela famili mamba tu i ken wokim long helpim long dispela situesen. Inap wanpela long ol arapela brata i kisim trense na wok klostu long ples we tupela lapuin i stap long en na lukautim ol?

Namba tu em sampela susa bilong yu we i marit pinis i save stap klostu long tupela lapun ya? Inap yu askim ol sapos ol ken kisim sampela kaikai i go long tupela lapun long sampela taim? Na ol arapela hauslain bilong yu olsem ol amkel, ol kandere? Inap yu toktok wantaim ol na askim ol tu long helpim tupela lapun ya. I gutpela sapos yu helpim ol wantaim liklik mani insait long wanpela mun long wokim dispela wok.

Yu mas kisim hatpela taim long stap longwe long tupela lapun husat yu laik helpim tumas tasol wok bilong yu i pasim yu long mekim dispela. Sapos yu trense, yu ken helpim tupela gut.

Yu wok long kampani long sikspela krismas na mipela i ting olsem em bai isi long yu long kisim trense. Tasol noken givap. Sapos bos i no givim gutpela ansa long askim bilong yu, orait go long narapela man husat i stap antap long bos.

Long wankain taim, inap yu salim

mani i go long tupela lapun long helpim ol? Sapos yu singel man i moabeta long sevim sampela potnait pe na long wan wan mun na salim sekmani o postel oda i go long papa bilong yu.

Tuepal lapun i ken yusim dispela mani long baim rais na tinpis long stua na tu kaukau long ol ples lain. Dispela bai helpim ol na ol i no inap tingting long wok hat long gaden na ol arapela samting. Na tu yu no inap long wari tumas long ol.

Laipain.



Nem: Malon Balo
Krismas: 20 (man)
Adres: Haga SDA Sios, P.O. Box 1131, Goroka, EHP.
Save laikim: I go long lotu na autim gutnius. Na katim diwai, wokim haus, tok pilai wantaim ol pikinini.

Nem: A. Tama
Krismas: 18 (man)
Adres: P.O. Box 4681, Boroka, National Capital District, PNG.
Save laikim: Pilai soka, volibal, danis, laikim ol pren na go long lotu olgeta Sande.

Nem: Bal Telpam D.
Krismas: 21 (man)
Adres: Holy Trinity Teachers College, P.O. Box 274, Mt Hagen, WHP.
Save laikim: Pilai ragbi, tok pilai na go lotu.

Nem: Eddie Gegen
Krismas: 18 (man)
Adres: Nadzab Brother Farm, Niugini Table Birds, P.O. Box 962, Lae, Morobe Province.
Save laikim: Pilai soka, wokim fani, harim tumbuna stori na raitim pas i go i kam wantaim ol penpren na painim wanpela gla meri long maritim.

Nem: Barney Avako
Krismas: 18 (man)
Adres: Bena Adventist Top-Up School, P.O. Box 446, Goroka, EHP.
Save laikim: Pilai volibal, ragbi, drivim ka, raitim pas na senisim poto. Harim lotu musik, pilai ragbi tas, mekim pen pren.

Nem: Nancy Ragir
Krismas: 14 (meri)
Adres: C/o - Peter Ragir, P.O. Box 884, Wewak, ESP.
Save laikim: Harim musik, pilai soka, makim poro wantaim narapela moa o meri, makim fani, waswas long solwara na go long blu.

Nem: Osifa Meta
Krismas: 17 (man)
Adres: P.O. Box 819, Goroka, EHP.
Save laikim: Pilai gita, go lotu ritim pas long ol arapela, go skul salim pto i go i kam na harim toktok bilong God.

Nem: Iva Hare
Krismas: 25 (man)
Adres: P.O. Box 365, Boroko, NCD.
Save laikim: Tok pilai, senisim ol presen, mekim pren na raitim pas.

Nem: Arnold Wamex Yelme
Krismas: 19 (man)
Adres: Vanimo Provincial High School, P.O. Box, 132, Vanimo, Sandaun Province.
Save laikim: Pilai soka, volibal, ritim niuspepa na riatim pas bilong ol penpren na go long skul.

Nem: Joan Botikie Buds
Krismas: 25 (man)
Adres: Menyamy High School, P.O. Box 74, Menyamy, Morobe Province.
Save laikim: Watchim TV, pilai soka, ragbi, harim musik na gospel musik, pilai tas, go huk, piknik, tok pilai.

Nem: John Tep Dowa
Krismas: 20 (man)
Adres: C/o - Paulus M. Dowa Lawyers, P.O. Box 1265, Mt Hagen, Western Highlands Province.
Save laikim: Go long lotu, watchim TV na pilai ragbi tas.

Nem: Maya Livambe
Krismas: 19 (man)
Adres: Hornibrooks, NGI, P.O. Box 1812, Lae, Morobe Province.
Save laikim: Watchim TV, waswas long nambis, wokim gaden na kukim kaikai, serim kaikai na pren wantaim ol meri long narapela provins.

Lukluk gut na makim gutpela lida

Dia Edita,
Mi wanpela manki Morobe. Na mi kam i stap long Pom siti. Planti yia tumas na mi lukim long EMTV. Na harim long redio na lidim long niuspepa olsem kaikai bilong yumi i bagarap pinis.

Long wanem as? Yumi nogat mani long raunim kantri bilong yumi i go het. Mi sori tru long yumi olgeta manmeri bilong Papua Niugini. Long wanem prats bilong olgeta samting long stoa na maket tu i go antap tru.

Na liklik pot rais pe mipela i save kisim ya em i no inap. Moa tasol mipela i kisim pe na mipela

i go traim long tupela samting em pinis nau?

Olsem na mi laik askim olgeta manmeri na pikinini bilong PNG. Olsem yumi gat ai na tingting na save. We God papa i givim long yumi. Yumi mas lukluk gut long man na meri na makim long kamap gutpela lida bilong yumi long bihain taim. Nau em yumi luksave pinis long ol tasol bilong yumi. Olsem ol stil lain. Olsem na lo i mas mekim save long ol samting ol i haitim tasol papa God bai kisim na putim long ples klia.

Na bai yumi olgeta save olsem

ol stil lain. Mi laik askim wanpela kwesten olsem. Ating ol momba long palamen i no ken vot long ol yet na makim Prais Ministra. Ol i mas givim vot i kam bek long ol pipel bilong Papua Niugini. Long ol i laik votim husat em laik bilong ol yet. long kamap Prais Ministra.

Na em tasol liklik wari bilong mi na yu husat brata o susa i laik sapotim mi em yu welkam tasol mi bai amamas tasol long lukim.

**Michere Stephan
8 Mile, Tapiok Kantri.**

Plis i kilim nating ol man

Dia Edita,

Mi-yet mi wanpela gras-rut manki na mi stap long ples hia long Westen Hailans provins na mi save ritim Wantok Niuspepa olgeta wik.

Taim mi ritim ol nius, mi lukim ripot bilong plis, planti man i dai long han bilong plis na mi save tingting planti bilong wanem na ol dispela man i dai long han bilong plis? Bikos ol i nogat wok, taim ol i pinisim skul long gret 1 o 12 i go yunivesiti, ol i nogat wok na ol i go stap na mekim hambak pasin tasol i gat banis kalabus bilong gavman i stap bilong kalabusim man, na bilong wanem gavman i givim moa pawa long plis na ol plis

i pinisim laip bilong planti man insait long kantri?

Na nau tu tupela yunivesiti sumatin bilong Westen Hailans provins i bin dai long han bilong plis tu. Sapos gavman i laik mekim save long ol trabel man long kantri orait rausim olgeta banis kalabus long kantri na rausim olgeta woda long wanem nogat man bai kam long kalabus.

Olgeta trabel man bai dai tasol long han bilong plis. Na tu gavman mi mas rausim olgeta haus kot long wanem nogat man bai kamap long kot. Olsem na taim man i mekim trabel em bai dai long gan bilong ol plis taim ol i mekim trabel long sem de.

Nogat man bai sanap long kot na go kalabus olsem na mi tok rausim

olgeta kot haus na banis kalabus.

Mi gat tupela askim i go long ol 109 momba i stap long palamen tude olsem:

1) Gavman em bilong holim gan na bainet bilong kisim na sutim man o em bilong lukautim na givim sevis long ol man long kantri?

2) God i givim yu gan o em i givim yu save long ronim kantri?

Mi singaut i go long gavman bilong tude long rausim bainet long han bilong plis na traim yusim save bilong ol na stretim dispela kantri. I luk olsem yu popara pinis long wokmak bilong yu olsem na mi tok tasol. I no long taim bai God i rausim pawa na save bilong yu.

**Peter Bakly
Mt Hagen, Westen
Hailans provins.**

Makim ol Kumul bilong las yia gen

Dia Edita,
Mi manki kol ples, Goroka tasol nau mi wok long stap long Pom siti.

Mi laik autim tingting na wari bilong mi i go olsem long Kumul selekta olsem kisim olgeta pilaia husat i bin pilai long wol kap long las yia long Inglan.

Em ol wanpela na gutpela tim we ol i bin i no pilai. Papua Niugini i

amamas long ol i win na go lus long leta fainel las yia.

Dispela yia tim husat bai pilaim Australia Kangaroos bai kisim zero bikos nogat gutpela ekspirians man olsem Adrian Lam, Bruce Mamando, David Buko, Michael Mondo, Andrew Norman, Elias Paiyo, Leo Kondai na Alfred Songoro.

Ol dispela lain tru i

stap insait long Kumul tim.

PNGRFL bosmas rausim ol Kumul selektas na makim ol nupela lain gen.

Kangaroos bai givim kiau long ol Kumul bikos Kumuls ol i no gat weit o hevi ekspirians na spit.

Sampela em pestaim long ol long pilai long Kumul. Dispela kain pasin na Kumul olsem Bruce Mamando i pul

aut. Kumul selektas mas sem long dispela.

**Asi Vireso
Pot Mosbi, NCD**

Sapos yu laik salim ol pas bilong yu i kam long dispela niuspepa, Salim i kam long dispela adres:

**THE EDITOR
WANTOK NEWSPAPER
PO BOX 1982
BOROKO, NCD.**

Makim gutpela man bilong Kabwum

Dia Edita,
Mi wanpela pikinini Kembra long Kabwum distrik long Morobe provins. Nau mi kam long Lae siti na bai mi go bek long ples bilong mi. Tok na lukluk bilong mi wantaim papamama na pikinini bilong Kabwum. Insait long Kabwum olgeta taim bilong nesanel lieksen i save kamap nau tu long 2002 bai nesanel lieksen bai kamap.

Panti saveman i save wok long taun ol i save i gokontes long lieksen na taim lieksen i pinis, ol i save i go long taun bilong ol na ol i no save tingim bek ol ples o distrik bilong ol Kabwum.

Mi laik tok save long brata susa na papamama bilong mi Kabwum distrik olsem. Yumi save kolim developmen i senis bilong kirapim ples i no kamap tumas long Kabwum distrik. I gat liklik hap developmen i kamap em wokim rot i go liklik hap na sanap, skul wokim 1 o 2 klasur na 3 o 5 haus bilong tisa na haus sik long givim haus marasin na wokman haus 1 o 2-pela na sampela em bus meterel, dispela em i no inapim developmen o senis long Kabwum distrik.

Bikpela hevi em long rot, ol papa tumbuna ol save karim rokrok na holim stik na wokabaut long wok misin o patrol long mekim wok bilong sios o gavman wantaim husat hevi em i stap yet long Kabwum distrik.

Indipendens long 1975 i kam inap nau 2001 dispela hevi em i stap yet.

Olsem na mi toksave long yupela papamama, brata susa yumi mas maldim wanpela man long ples stret long sanap long 2002 nesanel lieksen. Ol saveman mekim wok na mi kam hevi na i no inap tok pait long hevi bilong ol manmeri long Kabwum distrik.

Man i gat save na eksperians bilong karim hevi bilong ol manmeri long ples em inap tok pait na bringim sevis long tupela sait wantaim bodi na spirit developmen na piskol developmen. Em tingting bilong mi na luksave bilong mi raitim.

2002 Nesanel lieksen yu papamama, brata susa na tumbuna bilong mi. Yupela mas lukluk gut na sekim pasin bilong ol.

Toktok bilong man wokabaut bilong man na sindaun bilong man na ilektoret o autim em long 2002 Nesanel lieksen.

**Diwa Hemas
Kabwum, Morobe provins.**

Pait long fil bagarapim gem

Dia Edita,
Em i taim nau Papua Niugini i ken tok tenkyu long Kumul kosa Bob Benett. Rausim han na tok nogat long ol waitman kosa. Mi krai long soka provins Morobe tasol mi laikim ragbi moa long soka.

Mi stap planti taim bihain long TV pasim ia long redio baim niuspepa. Lukluk hariap long spots seksen em tasol planti taim mi stap insait long ragbi fil amamas long paitim han long Kumul ron i go insait long fil tasol kamaut wantaim belsori.

Belhat, wari long wanem Papua Niugini i lus. Husat i asua? Selekta o kosa ating trena i no trenim ol gut o ol pilaias i pret na i no takol gut. Mi sori tru wanem taim bai amamas .

Bob Bennett i wari planti taim inap olsem na yumi tok tenkyu na larim PNG kosa tekova. Ating em bai orait. Bikpela samting yumi stretim asua

bilong yumi we seleksen komiti. I mas i no ken wansait i mas selektim Papua pilaias na Niugini pilaias olsem Sentrel, Galp, Hailans, Niugini Ailan, Sepik na ovasis.

Pait na winim gem i mas pinis olsem ol Hailans tim pait long fil long winim gem em i kilim ragbi lig. Yu pait wantaim PNG brata, okey yu traim pait tu long waitskin na winim gem. Sapota i save pait na yu save win ya. Yu lus ol tu i lus yu mas sem.

Ragbi em mein gem, arapela sentas i ken kamapim top Kumul pilaias tasol. Hailans pilaias pait long fil i mekim ol i pret na lusim gem o planti yumi Hailans yumi larim PNG daun, bikos yumi pait long fil.

**John Rozi
Pot Mosbi, Nesanel Kapitol
Distrik.**

Mosbi kisim olgeta sevis winim arapela provins

Dia Edita,

Mi wanpela man mi stap long ples bilong mi Ali ailan long Aitape distrik, Sandaun provins. Mi kam raun long bikpela taun bilong kantri bilong yumi Pot Mosbi.

Long 1990, i kam inap long nau. Sori mi lukim Mosbi em narakain olgeta. Mi lukim Mosbi em i kamap olsem ovasis kantri, Kens o Brisbane o Kwinnslen Ostrelia. Olsem na ol manmeri bilong olgeta provins bilong Papua Niugini olgeta i stap long Pot Mosbi.

Long wanem ol i agris na mangalim ol kainkain samting i stap long siti. Olsem na ol manmeri i pulap tru long Pot Mosbi. Na ol i nogat wok ol i stap nating nogat wok tru tru. Em ol i nogat mani, no gat kaikai tru, ol i kamapim raskol, stilim mani, kaikai, brukim ol

stoa, kilim manmeri na holim ol meri pasin.

Nau mi lukluk mi skelim olsem bilong wanem ol manmeri kam pulap long Pot Mosbi siti? Ol manmeri ol i save ol i lukim Cavan i putim. Ol kainakin samting i stap long Mosbi provins bilong mipela i no ken kamap na i kirap olsem Mosbi.

Nau mi lukim mi wari long provins bilong mipela Sandaun provins. Ating Gavman na ol momba bilong yumi Sandaun ol i kisim bagarap tru long Sandaun provins?

Sandaun provins em olsem lapun manmeri i dai pinis na i nogat ol pikinini bilong tupela olsem meri sindaun i ukim san i go daun ret na em i ting bai mi gat man.

Olsem em i stap na slip

wantaim wari long indipendens inap nau 2001. Turangu lapun meri em i gat 5-pela pikinini na wanpela was papa na 5-pela was pikinini. Na em i no save long ol i lusim em long taim na ol i go aut long lusim em i slip sindaun wantaim wari, sori na krai long san i go daun na i ret long solwara.

Mi lukim Mosbi na mi ting ol dispela kain samting hia olsem wanem na i kamap long Mosbi tasol, na i no wankain long narapela provins. Olsem nogat papamama pikinini. Ol momba bilong Sandaun i no luksave long sindaun bilong ol turangu papamama long Sandaun, nogat tru. Ol i tingting long gutpela sindaun bilong ol tasol.

Mi laik tokim yupela ol momba bilong Sandaun olsem bikpela Jisas kraiss em i tok

olsem yu husat manmeri yu laik kamap lida long lukautim ol sipsip bilong yu long graun. Yu mas karim diwai kros bilong yu na bihainim mi Jisas kraiss sapos yu no bihainim em na yu givim bagarap long em, em yu nogat kingdom long heven.

Olgeta pasin yu wok long em bai yu kisim pe bilong yu. Yu lida yu save olsem bikpela mani yu kisim em papa God givim yu long givim kaikai long olgeta sipsip bilong em. Tasol yu no bihainim olgeta tok bilong bikpela Jisas Kraiss.

Yes, yu husat manmeri long Sandaun o arapela provins yu lukim stori bilong mi rait i kam long Wantok na mi ken lukim.

**John Pitau
Sandaun, Wes Sepik
provins.**

Distrik sapot mani bilong Kabwum we?

Dia Edita,
Momba bilong Kabwum Ginson Saonu em i save mekim olsem wanem long dispela mani polisman. Olgeta yia na total mani olsem K10 milien long tupela tem bilong em.

Mi wanpela man mi save stap tasol long ples na mi yet tu mi maus pas man bilong ples. Mi no lukim wanpela liklik wok bilong em long eria bilong Deyamos LLG Kaunsil i nogat na i nogat tru. Na mi bilip olsem ating i wankain olsem tupela arapela LLG Kaunsil eria tu.

Plis mi askim long yupela 2000 manmeri komiti na sapotas bilong momba Ginson Saonu olsem inap yupela tingim mipela ol arapela Kabwum manmeri na givim sans long ol arapela nupela kendidat na wanpela bilong ol i ken win kisim ples bilong em na yumi lukim.

Em bai mekim wankain olsem em o em bai mekim gut. Kain ples olsem Ongakei Paris, ol save givim bikpela namba tasol skul na edpos bilong ol em i stap olsem bipo i nogat senis na bai ol lusim o nogat.

**Dick B. Semo
Kabwum, Morobe provins.**

Kimbe plis save paitim gutpela man olsem man nogut

Dia Edita,

Mi wanpela Sauten Hailans manki tasol nau mi i stap long Bialla, Wes Nu Briten provins. Nau mi laik autim wari bilong mi long yupela ol plis. Man i gat liklik rong tasol na yupela save paitim olsem bikpela rong.

Man i wokim bikpela rong yupela i no save paitim ol gut na save salim hariap long sel. Dispela i luk olsem yupela i no wokim gut wok na yupela so op tasol long yunifom.

Dispela em mi tokim yu stret na yupela mas go antap long Hailans na lukim ol Hailans Plis long we ol save wok. Kisim skul long Hailans na bihain kam wok long Kimbe.

Orait husat laik bekim em mas wanpela plis i ken bekim na i no man nating.

Iso Waki L.
Bialla, Wes Nu Briten provins.

Memba i stilim bikpela mani i kamap friman

Dia Edita,

Belhevi bilong mi i go olsem taim Sir Michael Somare i stap Praim Minista na Paias Wingti i stap memba tu Praim Minista long dispela taim mi lukim planti ol provinsel memba na sampela nesenel memba tu i bin stilim mani bilong pipel na lo i mekim save long ol na

ol i go kalabus long Baisu haus kalabus long Westen Hailans provins.

Tasol nau taim gavman bilong Sir Rabbie Namaliu, bihain Bill Skate na moa gavman bilong Sir Mekere Morauta ol dispela gavman i kamap mi no lukim wanpela memba i go kalabus. Taim ol memba i stilim bikpela mani bilong ol pipel insait long Kantri, lo i kamap long dua bilong opis bilong memba na i tok yu rong na lo i putim em long lidasip kot na taim lidasip kot i kamap long dua orait memba i

hait tasol kalap long wanem na i go ausait na raun long spesel ka olsem Eriman slip long hotel olsem friman, go long ovasis olsem friman.

Tasol taim ol grasrut man long ples i stilim wanpela masis boks long taun hariap tasol ol plis i holim gan na sutim na kilim em olsem wanpela-wel pik na em i dai olsem em i mekim bikpela rong insait long kantri.

Yupela ol memba i kamap olsem ol king na mipela ol pipel i kamap olsem ol animol gutpela

long yupela i abrasim lidasip traibunel kot na raun olsem friman, tasol wanpela taim bai i kamap na long dispela taim bai yupela ol memba bai kamaut na tokaut long wanem kain pasin yupela i mekim bilong rulim dispela kantri wantaim mipela ol pipel.

No ken putim wanpela olsem ol animol na yupela yet i raun olsem friman na kamap olsem King.

Peter Bakly
Mt Hagen, Westen Hailans provins.

Rausim Kaintiba LLG Kaunsil

Dia Edita,

Kaintiba LLG em ol i nogat Jenerol Miting i bin kamap 1997 inap 2001 nau. Ogenik Lo bilong LLG i tok 4-pela taim long wanpela yia.

Mi singaut i go long Galp Gavana na Edministreta na Oditas long ol i lukim dispela samting o nogut? Ol i save kisim minit long miting

bilang ol tu o nogat.

Na tu ol i mas sekim mani bilong Kaintiba LLG long 1997 i kam nau 2001. Bikos planti rong i stap nau mi yusim fans bilong kaunsil. Na em i nogat wok i go kamap long wanwan kaunsil.

Long las yia opis bilong Odita i bin salim Esera Borebo i go long kisim ripot long Kaintiba

LLG Kaunsil na mipela i no bin kisim wanpela toksave yet.

Planti taim mani i save lus long Provins Hetkwata long Kerema na mani i save lus long distrik menesa na kaunsil presiden.

Mipela ol pipel bilong Kaintiba singaut i go long minista bilong Provinsel na LLG

Kaunsil na Galp Gavana na edministreta long givim ful ripot stat long 1997 na 2001 baset mani bilong Kaintiba LLG.

Sapos nogat em i mas saspndim dispela kaunsil.

Esoke Yaki
Kaintiba, Galp provins.

Sapota bilong Wantok

Dia Edita,

Hia em mi wanpela manki we i save laikim tru long ritim dispela lokol niuspepa bilong mipela Wantok Niuspepa long olgeta de na mi i save ol Kastomas i ken baim na ritim.

Hia mi rait long yu Edita bilong Wantok long inap long yupela putim mi o nem bilong mi insait long Wantok Niuspepa long seksen bilong arapela. Hia mi laik tokaut long mi yet long yupela na mi ting bai hapim yupela. Mi go aut long tokaut long mi

yet nau, nem bilong mi Girokon B. Noke, krismas bilong mi 23. Ol samting na mi save laik long mekim pilai.

Dispela em pestaim bilong mi long rait long yupela long Wantok nius wok. So mi laik olsem olgeta samting bai orait stret aninit long lukaut bilong yupela.

Mi laik tok bikpela tenkyu tru long kain helpim bilong yupela long mi.

Gedeon B. Meke
Wewak, Is Sepik provins.

POSF mas baim famili bilong dai man

Dia Edita,

Mi laikim maus bilong mipela ol kareta husat i gat mani wantaim POSF.

Mipela harim olsem publik kareta i kisim POSF long kot. Publik kareta i tok POSF i nogat rait long baim mipela ol Decease kontribua.

Plis ol wokman bilong publik Kontributa harim dispela ol stil lain tasol. Tupela save paulim planti mani bilong

mipela Decease kareta. Tu yupela save kisim longpela taim na kisim mipela Decease kareta.

Aninit long mama lo yupela publik kareta i gat 50 pesen rait long baim Decease kareta. Na POSF tu i gat rait long baim mipela. Mi makim maus bilong mipela Decease kontributa. Mipela i no laikim publik kontributa long baim mipela.

POSF mas baim

stret long akaun bilong mipela.

Mipela lukim olsem POSF ol i makim gutpela wok long helpim mipela na wok bilong ol em i kam isi long mipela.

Yu husat wok man bilong POSF lukim dispela pas. Plis tokim loa long tingting bilong mipela Decease kontributa long dispela.

Decease C Taimus
Lae, Morobe provins.

Tok pisin stret long FM Morobe

Dia Edita,

Mi yet bilong narapela hap tasol nau mi i stap long papagraun bilong mi Morobe.

Olgeta taim long moning i go inap apinun mi save harim FM Morobe tasol ol anaunsa bilong stesin no gutpela tumas long toktok long tok pisin. Ol save bagarapim stesin bilong wanem ol save miksim tokpisin wantaim tokples bilong ol waitman.

Mi yet mi save kisim krangi liklik. Sapos ol laik kamapim narapela 93 Nau FM ol mas toktok long tokples bilong ol waitman. Nogat, yumi stap ong papagraun, Morobe so plis traim na pairapim ol tok pisin stret o tokples Morobe.

Wayne Jkay Kodepo
Lae, Morobe provins.

Senisim opisal bilong Kimbe lig

Dia Edita,

Mipela planti manmeri husat i save bihainim ragbi long Kimbe. Mipela i no amamas tru long stap long Kimbe lig inap yutupela bai risain na nupela man bai i kisim opis.


Yutupela save lig graun em olgeta han wok bilong Jerry Lulu stap inap nau haus em wokim long em yu tupela sindaun long em na yutupela mekim nating stret so klia.

Long Kimbe i gat planti gutpela man stap bilong lukautim lig na mani bilong lig na tu i gat planti man i gat ragbi lig bek raun i stap long Kimbe tu.

Neks yia bai i gat Kimbe Bulls olsem na yu tupela mas risain bipo long Kimbe Bulls bai karim nem long

nek yia 2002.

John Mamai
Hoskins, Wes Nu Briten provins.



Rais tinpis bilong ol mani man

Dia Edita,

Mi wanpela pua femili insait long Wes Nu Briten provins hia long Kimbe Oil Pam provins.

As tingting bilong mi i go olsem bihain long 1981 i go inap 1990 mi i save wok gaden planim kaukau taro i go maket na kisim liklik mani na baim ol kaikai long stua olsem rais, kari, tinpis, suga na kofi na nau yet mipela ol pua femili mipela i no

moa lukim ol dispela ol kaikai we mi bin raitim antap pinis.

Mipela ol pua femili nau yet mipela i ting long gaden kaikai tasol.

Mipela i no save long ol rais, tinpis.

Long wanem rais tinpis em samting bilong mani man.

Femili man
Kimbe, Wes Nu Briten provins.

Birua i no man, em i husat?

Dia Edita,

Dispela birua nogut i no wanpela man i karim akis o naip samting. Dispela birua i no kam wantaim bom, o katris, o baiset samting nogat.

Dispela birua i no gat lek han na i no inap wokabout i go long haus. Planti moa manmeri bilong Papua Niugini i singaut strong long dispela birua i mas i kam insait long graun bilong yumi.

Ol yet i holim dispela birua long han. Ol yet i bringim dispela birua i kam insait long haus bilong ol

Dispela birua mipela i tok-tok long em, em husat dispela birua i no hait. Em husat? Em i no hatwok long painim dispela birua.

Dispela birua i gat nem bia, wisiki, ram, bakadi, jin, wain na ol kain strongpela dring. Em birua bilong haus na femili.

Ol botol na tin na skin katen i stap long ol haus na rot na ples na nambis.

Ol manmeri i no tingim dispela em i birua bilong ol. Ol i tok dispela i pren bilong ol. Ol i tok strongpela dring i givim amamas long ol na is strongim ol. Na olgeta dring i gat wanpela strongpela

marasin nogut i stap insait long en.

Taim manmeri i dring, orait dispela marasin nogut i go insait long bel na i go gen insait long blut bilong ol.

Olsem na dispela strongpela marasin nogut i raun insait long blut na i wok long paulim olgeta hap bodi bilong yumi olgeta manmeri pikinini long bus na nambis. Holim na tingim gen long dispela-stori.

Ben Kenosi
Pot Mosbi, Nesenel Kapitoll Distrik.

Givim rait senis long kastomas

Dia Edita,

Mi wanpela manki Morobe tasol nau mi i stap long Kimbe, Wes Nu Briten provins. Na mi laik autim komplem bilong mi long Wantok Nius olsem. Taim mi sve i go baim ol samting long stoa o Holsel tasol ol i no save givim mi rait senis.

Sapos mi baim wanpela klina katsop long 571 na mi givim K5.00 long ol.

Em bai ol givim mi K4.50 tasol ol i no inap givim mi 3t. Dispela kain pasin i no stret. Sapos yu go long ol Saina

stua nabaut olsem Seeto-Kui na yu laik odarim wanpela beil rais na dispela beil rais i kostim K29.51.

Na yu givim K29.50 tasol long em. Em bai papa bilong stua tok nogat moabeta paitim wanpela 2t na kam baim wantaim.

Olsem na plis givim rait senis long kastomas.

Dencan F. Gomtech
Kimbe, Wes Nu Briten provins.

KANAGE



Kanage em wanpela man bilong ples Lihara insait long Henganofi distrik long Goroka, Isten Hailans provins long hap ples Lihara. Long olgeta wik long Trinde em bikipela de bilong maket, salim kopi, pilai kas, dat, o pilai basketbal, ragbi, volibal na ol narapela kain pilai tu. Paps Kanage long taim em manki inap em lapun, em i no save pren wantaim meri. So long wanpela Trinde em go raun long maket. Em raun long maket inap apinun. nau em sanap long sait lukluk long ol manmeri pilai basketbal. Na Paps Kanage kirap nogut long wanpela meri em salim tok long narapela meri. Meri tokim poromeri olsem "plis yu go na tokim Kanage okay." "Mi gat bikipela laik long em." So taim poromeri tokim Kanage. Paps Kanage i kirap nogut na em bekim tok na i tok olsem. A! A! Oh yes so Mis na meri go tokim Kanage long musik bilong em i kirap tasol semtaim lewa bilong em kalap, kalap, na em i no inap tru long sanap gut na lukim pilai. Long apinun stret nau na tudak i kam na sem taim bikipela ren tu i pundan. Na meri em i laik tekov long haus na em tokim Paps Kanage, bai yu tupela mas kam long haus. So taim Kanage i go long haus, em i wok long tingting plani stret. Sapos em pren wantaim dispela meri ya, em bai tok wanem. Tingting kilim em na semtaim tu lewa bilong em tu i kalap kalap na em i no sindaun gut long haus. Em wok long go insait i kam insait long haus klostu, klostu.

Jeffrey Saive Tony
Kokopo

Kanage bilong Madang. Kanage i no manki nating em wanpela elementri tisa tru ya. Wanpela taim Kanage go raun long Pokamon Hai Skul. Kanage i go tasol kisim wanpela buk bilong ol gret 10 na putim pen long sait sait poket. na Kanage isi isi i go na bungim tupela skul meri. Kanage kirap tok olsem, "Good afternoon girls, na tisa meri tok Good afternoon long Kanage na tokim Kanage yu kam olsem wanem? Kanage tok em elimentri tisa. Tupela skul meri tokim Kanage, Good em yu linlin i no tisa mekim. Kanage longlong olgeta na Kanage tokim tupela skul meri weit weit weit, I think it, I think it, I think it sem taim wanpela save pes i kam. Kanage lukim olsem na Kanage katim long Flower gaden na go pinis.

Geoff Oxford
Lae

Kanage em i bilong Vanagagau long Rabaul na i kam stap wantaim kandre bilong em Sogi long liklik ples Venaiting long Napapar viles long Kerevat. Orait holidie taim na kandre bilong Kanage Sogi i laik salim em i go holidie liklik wantaim nem sek bilong em sinia Kanage husat i wok long Goodman Fielders long Mosbi. Orait Kanage kisim skul long lusim slipa long aidua taim em go insait long haus. Olsem na taim em redi long kalap long balus Kanage i lusim nupela slipa bilong em long step bilong balus na kalap i go insait long balus. Tasim ol i kamap long Mosbi Kanage kalap i kam daun na askim hostes. Hey yu. Slipas bilong mi we? Na hostes i askim em. "Na yu lusim we?" Ema, yu sanap i stap mi lusim klostu long yu hia. Bihain taim mi kalap i kam in sait na na lusim long step na kam insait bihain sekuriti i kam na askim em. Long wanem hap yu kalap long balus. Na em bekim long bikmaus. Hey sekuriti mi kalap i kam insait long balus long Rabaul mi lusim ausait. Nau mi laik go daun long Mosbi slipas i lus pinis. Sekuriti hia i paul gut tru long trangu. Hey yu go nau yu mas lusim het long Rabaul hia. Em i no Rabaul hia em Mosbi hia. Trangu sekuriti kilim skin stret long lap.

Minio Rolat Pilie
Rabaul

Kanage bilong Wes Komibe long ples Pol long Wes Nu Briten provins. Em manki bilong ples na em maritim wanpela meri wantaok yet. Tupela i gat namba wan Junia. Junia em bikipela manki inap long wokim ol wok. Olsem na wanpela taim long nait. Paps Kanage Misis bilong em na Junia blong tupela ol slip long haus bilong ol. Lapun mama bilong Kanage na sampela ol yangpela meri ol slip long haus gut. Junia ai bilong em i no slip na ol op i stap. Paps Kanage hariap go slip ausait na kabubu stap.

Sam K. Tiel
Kimbe

Kanage bilong kolpies long Westen Hailans provins. Em wanpela embulens draiva bilong Kusip Jenerol Haus sik. Wanpela taim Kanage benefim ambulens arere long haus sik na i stap. Na ol sista long haus sik tokim Kanage olsem wanpela mama i laik karim pikinini na laik. So Kanage hariap tru kirapim ambulens na ron nating i go long ples. Wanpela hap kona namel long rot. Kanage lukim wanpela lapun mama slip. Krangi arere long rot i stap. Kanage hariap tanim ambulens na apim lapun mama i go antap na lusim i go bek. Na ol sista askim Kanage long sik mama na em tokim ol sista long kisim wilsia i kam ol sistem klostu wilsia i kam na Kanage apim lapun mama i go aninit long wilsia. Taim ol sista lukim olsem paia bilong ol dai long toktok. Tasol ol sikman i kilim skin long sait.

Sam K. Tiri
Kimbe

Papa Kanage bilong ples Kunai long Kimbiru long Fugwa Koroba long Sauten Hailans provins. Manki Kunai i gat wanpela bilong ples Kunai yet. Tupela bin pren taim tupela manki yet. na tupela promis tru long marit, tasol taim tupela i redi long marit papa na mama bilong meri kisim em i go i stap longwe hap long narapela ples. Tasol manki kunai i no lus tingting long gut pren bilong em. Na meri ya tu i no lus tingting long manki Kunai tasol hat tupela lukim pes i go kam. Manki Kunai stap bilong em na gel

pren i stap bilong em. Inap tupela i lapun. manki Kunai tingting bilong yangpela i stap yet tasol em lapun pinis. Wanpela taim lapun Kanage wokabaut i go long wanpela liklik maket ol kolim Pagwa. Lapun bilong Kiburu Kunai sindaun wantaim woking stik long sait i stap na i no long taim wanpela lapun meri karim stik na ai wara wantaim i kam lapun kirap holim hevi bilong em na tupela mekim save long krai. Paps Kanage kirap tokim ol manmeri olsem lapun meri ya em susa bilong em na em i no lukim em inap em lapun. Tasol samting tupela tingim promis bilong tupela long gut taim bilong tupela taim tupela yangpela yet.

Sam K. Tiri
Kimbe

Kanage i go antap long haus win long wanem taim bilong san. Taim em i go antap em i malolo na slip sem taim liklik bubu bilong em tu i bihainim em i go antap. Taim em lukim bubu bilong em Kanage i laik traim long slip tasol ol long i wok long flai i kam sindaun antap long bodi bilong em bihain flai i go nabaut, olsem na liklik bubu i belhat na kirap painim liklik raba ben i go sindaun klostu long lapun Kanage na askim em olsem, bubu mi sutim? Na Kanage i slip na pilim isi tasol na tok sutim bubu. Orait liklik bubu i pulim taitim raba na sutim lang. Tupela i wokim i go na wanpela bikipela bilu lang i flai long antap i go daun sait sindaun antap long tupela bek wil bilong balus we Kanage i lendim pinis long graun. Na liklik taim liklik bubu isi tasol lusim raba bilong wanem nogut em i bagarapim sindaun bilong Kanage olsem na em traim rausim lang long win bilong maus tasol lang i no go. Em i traim raunim gen lang long han bilong em tasol lang i no muv liklik. Bubu wail kirap isi tasol pulim taitim pinis olgeta mak bilong raba na askim lapun Kanage, baga mi sutim a? Kanage i les pinis long harim tasol toktok bilong liklik bubu, long wanem sait bilong slip tu kisim em, olsem na em i pasim ai, nus na pes tasol. Sem taim bubu slekim raba. Olo man Kanage i kirapim bubu bilong em tupela karim pos bilong haus win i go daun.


Thomas Seru
Lae



WANTOK KLASIFAIID

SAPOS YU LAIK PUTIM LIKLIK TOKSAVE BILONG YU. RINGIM OL SEILS TIM BILONG MIPELA LONG 325 2500 NA ASKIM LONG EBORE VANI. PUGANESE KINI O MIRIAM WANINARA BAI OL I HELPIM YU.

ANSA BILONG PAINIM BAL RESIS NAMBA 9



Wina bilong resis namba 9 em SIWA KUPE C/o Tina Kupe, Kimbe Urban Local Level Gavman. Krismas 23. P.o. Box 127, Kimbe WNBP

Don't forget your **Independent**

copy today!

Right mind,

Think Independent!

Of all the coverage we

bring to you,

you have nothing to miss!

WORLD NEWS
SPORTS NEWS
RELIGION NEWS
INTERNATIONAL NEWS
PACIFIC NEWS
REGIONAL NEWS
BRIEFS
MAMOSE NEWS
SOUTHERN NEWS
ISLANDS NEWS
HIGHLANDS NEWS
FAITH NEWS

LOCAL NEWS
COMMENTARY
REVIEW
OPINION
LETTERS
EDUCATION
ENTERTAINMENT
WOMENS NEWS
HEALTH NEWS
BUSINESS NEWS
INFORMATION TECHNOLOGY



K100




PAINIM BAL RESIS NAMBA 10

RUL BILONG PILAI:

1. Makim X long boks long poto yu ting bal i stap
2. Makim X long pen tasol
3. Katim poto long sisos na salim long: *PAINIM BAL RESIS NAMBA 9, Wantok Niuspepa, P.O. Box 1982, Boroko, NCD.*
4. Nambawan entri i makim stretpela hap bal i stap, em bai win.
5. Las de bilong kisim ol entri em Fraide 30 Novemba, 2001
6. Long Wantok bilongdesemba 6, 2001 bai gat nupela K100 prais mani resis. Bai gat resis bilong olgeta mun i go inap mun Desemba, 2001.
7. Disisen bilong komiti i makim wanpela wina em i fainel.
8. Wina bai kisim sek mani, na i no long kes.
9. Sapos nogat wina bai skruim win moni i go antap long narapela resis.
10. Yu ken salim moa long wanpela entri, tasol noken yusim poto kopi.
11. Ol wokman meri na pikinini bilong Wantok niuspepa i no inap stap long dispela resisi.

Raitim nem na adres bilong yu:

Nem.....Address.....
.....Krismas.....




• Tupela pilaia (15) bilong yunivesiti i laik kisim bal long pilaia bilong Sobou bilong Lahi. Tupela tim i bin pilal long grenfainel bilong 2001 PNGFA Club taitel. Sobou win 3-0.



• IOC maketing man Jeff Gerwitz (namba tu lephan) i sanap wantaim Kevin Murphy (lephan) Stan Joyce na Sir John Dawanincura (raithan) long Spot Maketing Woksop.




• Susa lukaut long han bilong yu. Pilaia bilong Bullet i ran i kam hom long wimen's sofbol long Goroka.



• Pitsa bilong PTC i slekim bal long taim bilong gem egensim Bullet long Goroka Wimen's Sofbol.



• Kila Dick (lephan) i toktok wantaim kodineta bilong yut netbal long Oceania. Em i stap long Pot Mosbl.



• Of yangpela i amamas bilain long Goroka Setakmen spot presentesen.

Ol Spot Dro

Toksave
 Salim ol dro, realis na poin lada i kam long Wantok Niuspepa long Tunde olgeta wik. Salim i kam long Spots Edita:
 Fax: 325 2579 o ringim em long telepon no: 325 2500

PORT MORESBY MEN'S SOFTBALL ASSOCIATION

DIAMOND ONE
 Sunday, November 18, 2001

0900	C	Admiralty	vs	N/Hawks
1030	B	Manalos	vs	N/Hawks
1200	A	Elcom	vs	B/Eagles
1330	A	AB Bears	vs	Manalos
1500	A	N/Hawks	vs	Gazelle

DIAMOND TWO

0900	C	Samurai	vs	Manalos
1030	B	AB Bears	vs	Elcom
1200	B	Gazelle	vs	Dolphins
1330	B	Kopex	vs	B/Eagles

BYE A grade Kopex
 C Dolphins

PORT MORESBY WOMEN'S SOFTBALL ASSOCIATION DRAW



Saturday November 17, 2001
DIAMOND ONE

0900	B	Dolphins	vs	Wantoks
1030	A	Norths	vs	Admiralty
1200	A	Chebu	vs	Wantoks
1330	A	Mazda	vs	Gazelle
1500	A	AB Bears	vs	SP

DIAMOND TWO

0900	B	Mazda	vs	Chebu
1030	B	AB Bears	vs	Manalos
1330	C	**Manlos	vs	Dolphins
1500	B	All Stars	vs	Admiralty

FootnoteThis is a washout game from Week One**



EXPORT LAGER CHAMPIONSHIPS

SEMI FINALS
 Saturday, November 17, 2001

Game One
 Port Moresby Port Moresby Boromas vs Port Moresby Gaigais

Game Two
 Lae Morobe Hammerheads vs Rabaul Kaias

NCD PUBLIC SERVANTS SOCCER DRAW

ROUND ONE
 Saturday, November 17, 2001

BISINI ONE - Pool One

0800	Nat. Parl	vs	Education	men
0920	Nat. Parl	vs	Education	women
10.40	Teachers	vs	NBC	men
1200	Teachers	vs	NBC	women
0120	Nat. Plan/Fin	vs	IRC	women
0240	Nat. Plan/Fin	vs	IRC	men
0400	NAQIA	vs	Pacific Towing	men

BISINI TWO - Pool Two

0800	Diwai	vs	Works	men
0920	Diwai	vs	Works	women
1040	BPNG	vs	NCC	men
1200	BPNG	vs	NCC	women
0120	Pangtel	vs	NCDC	women
0240	Pangtel	vs	NCDC	men
0400	Elcom	vs	NJSS	men

Sunday, November 18, 2001
BISINI ONE - Pool One

0800	Pacific Towing	vs	NAQIA	women
0920	Telikom	vs	Air Niugini	men
1040	Telikom	vs	Air Niugini	women
1200	Att General	vs	PNGBC	women
0120	Att General	vs	PNGBC	men
20240	Post PNG	vs	Petrol	women

0800	NJSS	vs	Elcom	women
0920	Cellnet	vs	Consort Express	men
1040	Cellnet	vs	Consort Express	women
1200	Health	vs	DLPP	women
0120	Health	vs	DLPP	men
20240	Min & Petrol	vs	Post PNG	men

BYE: 1PIR - Taurama (Both Male & Female)

WANTOK NIUSPEPA | laikim ol part-time niusman long salim nius na poto bilong sofbol stori i kam long bikpela senta olsem Mt Hagen, Lae, Goroka, Madang, Wewak na Wes Nu Briten. Sapos yu ting oleam yu ken helpim Wantok Nius long dispela wok, plis ring na toksave long Spot Edita long dispela telepon namba 325 2500 o fax long 325 2579. Nogat yu rail long dispela adres: Spots Edita, Wantok Niuspepa, P.O Box 1983, Boroko, NCD. Email adres em: word@global.net.pg: Attention: HENRY MORABANG. Sapos yu laik salim stori o piksa, dispela i mas kamap long Spots Desk.

Kokopo i statim sisen

KOKOPO Sofbal Asoisiesen bai statim sisen bilong 2001-2001 long dispela wiken.

Olgeta gem bilong KSA bai kamap long Jack Emmanuel Park.

Oi klab olsem NGI, Tigers, Wantok, PNGBC, Clubs na ol nupela klab olsem Nomads, Ralax na Fireballs bai soim pes bilong ol long strongpela kompetisen bilong.

olsem ples bai luk kala long wanem ol klab bai wokabaut wantaim nupela yunifom long opim dispela sisen.

Kompetisen long Kokopo bai paia long wanem ol lokal level gavman i putim tim long kompetisen ya.

Oi tim olsem Fireballs em Balanataman, Ralax i kam long Raluana na Cubs em bilong Kombiu LLG. Dispela tripela klab bai pulim moa sapota



• Rana bilong Bullets i kam hom long wanpela wimen sofbal gem i bin kamap long Goroka sofbal asosiesen ong Nesenel Spot Institut las wiken. Foto: SAPE METTA

Erima Setelmen i pinisim basketbal sisen

HENRY MORABANG i raitim

ERIMA Wimens Basketbal kompetisen i pinisim olgeta pilai bilong em long 2001 las wik Sande.

Dispela kompetisen i ran 8-pela mun olgeta we i pulim moa long 44 tim insait long ol setelmen klostu long Erima.

Foapela tim i bin pilai long gren fainel bilong divisen wan na divisen tu. Insait long divisen wan, Bomai Ganes i wilwilim birua tim, Blue Ties, 20-12 long gren fainel we i klostu kamapim paia long setelmen.

Oi susa long Bomai i winim tropi wantaim K1,500 prais mani. Na lusa long dispela gem, Blue Ties i kisim tropi wantaim K1000.

Na long divisen tu, KDO meri bagarapim tru sindaun bilong ol

lain Loose Particles 11-5 long winim tropi. Oi meri KDO i kisim K900 na Loose Particles i kisim tasol K600 wantaim tropi.

Oi wanwan tim husat i pilai long Erima Wimens Basketbal resis i kisim K400 long soim amamas long stap insait long tonamen.

Sponsa bilong dispela Erima Basketbal kompetisen Casper Wollom i bin stap long witnessim dispela tupela gren fainel.

Maski bilong san bilong Pot Mosbi, Mista Wollom i stap na sindaun long fainel. Em i tokaut long taim bilong fainel olsem em i amamas tru long lukim ol lain long setelmen i ken pilai basketbal.

Mista Wollom i tok olsem em i laik sapotim ol spot long setelmen sapos ol i ken lukautim ol yet.

Wanpela komyuniti lida long Erima i tok amamas long Mista Wollom long sapotim kain ol setelmen program long spot. Em i tok hevi bilong lo na oda i bikpela tru insait long setelmen na em i amamas long pasin Mista Wollom i mekim.

Em i tok dispela basketbal long Erima setelmen em ples stret bilong ol ka, ol yangpela i save stilim na go lusim long hap.

Oi lain long setelmen i tokaut olsem ol bai sapotim Mista Wollom yet sapos em i go het long sponsarim ol dispela kain setelmen program.

Mista Wollom i tromoi moa long K25,000 long sapotim dispela Erima Setelmen na tu ol arapela spot long setelmen. Dispela Erima Basketbal kompetisen i stap bihain long Pot Mosbi Golf klab we planti man i save pret long go raun.

Taim bilong soim tropi

LONG olgeta spot i save i gat gren fainel. Na long bihain long fainel, ol i save gat presentesen long luksave long wanem ol tim i win.

Na long lsten hailens tu i wankain long wanem setelmen spot insait long Goroka taun i planti tumas.

Wanpela bikpela setelmen spot em long Genoka setelmen. I no longtaim i go pinis, ol i bin holim bikpela pait na amamas long givim sil long ol tim i winim.

Hia long poto (raitim), yu ken lukim sampela sapota i amamas na soim tropi bilong ol.

Oi i mas winim long kamap namba wan sapota o mipela i no save.

Man i kisim poto ya, SAPE METTA tasol i save ol i winim tropi tru o nogat.



Telikom i strong long Lae sofbal

SOFBAL sisen long Lae i wok long kirap isi.

Las wiken, Lae Mens Sofbal Asosiesen i holim ol gem bilong namba 6 raun.

Gem bilong wik i stap namel long Brown Eagles Telikom na Burmah Raiders.

Brown Eagles Telikom i winim Raiders long wanpela poin tasol 5-4.

Skoa bilong ol arapela gem i sanap olsem City Tigers autim Admiralty Marlins 3-1, Karanas autim Manalos 6-2 na Bismarck Sharks wilwilim stretim Aviat Jets 12-6.

Telikom i stat long skorim poin insait long namba wan ining. Oi lain i kam hom em Tagaga Ngaungau, John Tume, Steven Garona na John Davai.

Ngaungau i kam hom taim birua tim i no tromoi gut bal.

Narapela beta Morris Lauia i paitim wanpela gutpela bal tasol ol i autim em.

Tume i wokabaut i go long namba wan bes. Garona tu i kisim fri bes bihain long pitsa i tromoi bal long taim bilong pits na paitimem. Aninit long lo, em i kisim fri wok.

Orait Davai tu i kisim wanpela fri wok i go long bes long mekim ful bes.

Thompson Kavu i paitim wanpela gutpel bal namel long autfil na sotstop long bringim tripela pilaia i kam hom na em yet i sanap long namba tu bes.

Dispela i apim skoa bilong ol lain Telikom i go long 4 na Raiders i stap yet long 0.

Narapela tupela beta em papa na pikinini, Pidil na Mesulam Pakar na ol i aut.

Raiders i no skoa insait long

namba wan na namba tu ining long wanem ol i painim hat long paitim bal bilong pitsa James Pinia.

Telikom i skorim wanpela ran tasol long namba tu ining i kam long Thomas Dokta.

Raiders i pasim toktok na skorim tripela ran long namba tri ining. Oi lain i skorim ran em Peniel Lamei, Tony Karani na Gabriel Pamel (jnr).

Telikom i autim arapela tripela pilaia em Samson Kaia, Charlie Kakotba na David Kauke.

Oi boi Telikom i painim hat tru long rekotim ran long arapela ol ining.

Raiders i skorim las ran i kam long Karani yet.

I bin gat sampela senis long Telikom tasol Raiders i strong tru na blokim olgeta rot bilong ol long kisim poin.

Tigers autim Rebels long Gasel sofbal

BURMAH Tigers i mekim strongpela gem long kambihain na winim Rebel tim 12-4 long Gasel Amatsa Sofbal Asosiesen (GASA) las wiken.

Pitsa bilong Tigers Benedicta Giau i kamapim strongpela gem long pits na mekim save long ol lain Rebels. Em tasol i strong long kamapim gutpela pitsing na Tigers i win.

Tigers i no westim taim. Em i skorim 7-pela ran long namba wan ining. Rebels i traum long bekim tasol ol pilaia bilong en i no strong tumas long traum winim ol bes na skorim poin.

Oi meri Rakunai olsem Jenny Pite, Theresa, Martina Bite, Lawrence Wabola na Takunia Dinau i strong long mekim Tigers long winim dispela gem.

Oi Rebels bilong Vunadirid i kamap bung long pilai na blokim Tigers long skorim moa poin. Orait ol yet i skorim foapela poin i kam long Sophie, Josephine, Laun na Minal.

Insait long arapela ol gem, Unicats i pilai strong tru long autim Sen Theresa 15-14. Las wiken ol lain Unicats i kisim bikpela ba garap tru long han bilong ol lain Tigers.

Sen Theresa i go pas long skoa 14-13. Tasol Kurai Malip Tigers i paitim wanpela gutpela bal na kam bringim ol i go hom.

Black Python i soim olgeta strong bilong em long winim Burmah Raiders. Ol snek nogut ya i winim Raiders 6-4. Raiders inap long winim gem tasol ol i mekim planti asua tumas we Pythons i luksave na winim ol.

Na long gem bilong ol man, Strivers i lus long Rebers 4-2. Oi Strivers i mas krosim ol yet long wanem ol i no pilai gut tumas.

Oi boi Strivers inap long winim gem. Oi i skorim tupela poin tasol ol i no strong tumas na Rebels i kam long namba foa ining long winim ol 4-2.

Black Python Tim One i lus long Burmah Raiders 7-3. Em i namba wan lus bilong ol lain Tim One. Pitsa Kennelly Kiritia i stap tasol dispela i no mekim wanpela senis liklik long tim.

Skoa bilong ol arapela gem i sanapa olsem Sen Theresa bagarapim tru Sen Mary's 18-0, Black Pythons Tim Two autim Burmah Raiders 9-6.

Poin lata i sanap olsem (man) Black Pythons Two 12, Rebels 11, Black Pythons One 10, Burmah Tigers 9, Burmah Raiders 8, St Theresa 6, Strivers 5 and St Mary's 4

Na poin lata bilong ol meri em Black Pythons 12, Rebels 10, Burmah Tigers 10, Royals 8, Burmah Raiders 7, Unicats 6 and St Theresa 3.

Pot Mosbi Men Sofbal singaut long miting

POT Mosbi Mens Sofbal Asosiesen (POMMSA) i singaut i go long olgeta klab long kamap long wanpela spesel eksekutiv miting long dispela wik Sarere.

Dispela miting bai kamap long Daimond One long 9 kilok.

Mausman bilong POMSA Francis Dakenny i tok dispela miting em i bikpela miting bilong ol klab.

Miting ya bai toktok long painim aut hamas klab tru bai resis long dispela 2001-2002 sofbal sisen.

I lus olsem nau yet

planti klab i lus lain long wanem ol i laik joinim besbal.

POMSA em wanpela bikpela na strongpela sofbal asosiesen insait long kantri.

Oi tim i givim nem pinis long dispela sisen em A gret: Brown Eagles, Elcom, AB

Bears, Manalos, Northern Hawks na Gasel.

Northern Hawks em nupela klab we ol pilaia bilong Norths na Hawks i kam bung na fomim tim long dispela ya.

Dispela klab i kamap long wanem planti taim ol i save fofitim ol gem.

Angasa paia long ol Momase Gavana

MOMASE Rijonel Soka Federesen i kamap olsem piksa (model) we PNG Futbol Asosiesen i laik yusim long developim ol soka program bilong em.

Presiden bilong MRSF Peter Angasa i mekim dispela toktok taim em i tok tenk yu long PNGFA long luk-save na givim K10,000 long sapotim MRSF soka tonamen we i kamap las wiken long Madang.

Em i tok hetkwata bilong soka i stap long Momase, na ol i laik traim yusim rijen long karim aut program bilong ol.

Tasol Mista Angasa i tokaut olsem Momase i nap kamap strongpela soka rijen sapos ol wanwan Gavana insait long rijen i helpim long sampela mani.

Presiden i mekim dispela toktok bihain em i painim aut olsem olgeta askim pas long

helpim long ol 4-pela Gavana i no kisim wanpela gutpela bekim.

Mista Angasa i tok em i no wanbel tru long kain pasin. Em i tok ol i bin tokaut long maus olsem ol bai sapotim, na long sapotim tru long mani, nogat wanpela kaikai i kamap ya.

Semtaim tu i tok amamas long Sir Michael husat i save sapotim MRSF long olgeta yia i kam inap nau.



• Goklipa bilong Yuni i (lephan) holim bal na pilaia bilong Sobou i redi tasol long atek sapos bal i lus long han. Sobou win 3-0.
Foto: JOE IVAHARIA

Kaindi winim Wau pri-sisen taitel

WAU Soka Asosiesen insait long Morobe provins i pinisim soka pri-sisen kompetisen bilong las wik.

Insait long pri-sisen fainel, Kaindi i bin salensim United we ol i wilwilim ol stret wantaim tupela gol olgeta. Ol United i karim kiau. Dispela em i namba tri yia, tupela tim Kaindi na United i pilai long gren fainel.

Insait long namba wan hap bilong pilai, nogat wanpela gol i bin kamap. Tasol long namba tu hap, ol boi Kaindi i sakim strongpela san bilong Wau na pilai strong tru long skorim gol.

Namba wan gol bilong Kaindi i

kamap taim Latent Tomang na Moses Kovei i wokim bung na skorim. Tomang i kisim bal i go na paitim krosba na Kovei i redi tasol long gol eria na taim bal i kamap long em, umben i seksek.

United i stretim asua bilong ol na putim strongpela difens. Gem i wok long go i kam na nogat skoa i kamap.

Tripela minit i stap long fultaim, fulbek Allan Tera i katim wanpela gutpela bal i go insait long pos na Tomang i redi tasol long skorim namba tu gol. Taim Tomang i kikim bal ol fulbek bilong United i holim bal.

Madang em i nupela sempion bilong Momase

HENRY MORABANG i raitim

MADANG i kamap olsem nupela sempion bilong Momase Rijonel Soka Federesen (MRSF) bihain long em i autim Lae Futbol Asosiesen (LFA) 1-0 long gren fainel las wiken. Dispela namba 22 Momase Rijonel Soka sempionsip i kamap long Madang taun.

Presiden bilong MRSF Peter Angasa i tokim Wantok Nius olsem Madang em i sempion bilong 2001.

Mista Angasa i tokaut olsem em yet bilong Madang na em i amamas tru long lukim Madang i winim taitel.

Em i tok olgeta tim i givim nem i soim pes. Sir Michael Somare husat i patron bilong Momase Rijonel soka tonamen i opim dispela tonamen long Fonde i go pinis.

Mista Angasa i amamas tru long lukim sapot ol pipel bilong Madang i givim i go long developim na strongim rijonel soka resis.

Presiden i tok olgeta gem i pinis gut na nogat wanpela trabel i kamap. Las yia, Gum i winim

taitel tasol nau Kap ya i go sindaun long Madang.

Em i tok amamas long PNGFA long gutpela sapot. Em i amamas tru long lukim sekretari bilong PNGFA Gabriel Pise i stap wantaim ol long dispela tonamen.

Na long gem bilong wimen, LFA i rausim sket bilong ol susa long Ramu Sugar 2-0.

Ripot i kam long Madang i tokaut olsem gren fainel ya i wanpela strongpela pilai tru. Tupela tim wantaim i pilai strong long banisim mak na tu i no givim wanpela sans long brukim umben.

Gem ya i strong i go long namba wan hap, nogat wanpela gol i kamap. Orait insait long namba tu hap i wankain. Olsem na ol i go long ekstra taim, lapun straika bilong Madang Steven Mark i mailim gut kona kik i kam abrusim golkipa bilong LFA na go insait.

Dispela gol bilong Madang i kamap ol ekstra taim we Madang i winim dispela taitel bilong 2001.

Tupela tim wantaim, Madang na LFA i pait strong tru long

winim bal.

Straika bilong LFA olsem Murray Wasi, Bobby Tara, midfilda Esa Nasa na Jack Jonathan i traim hat long senisim plen long winim gem tasol nogat ya.

Long sait bilong Madang, Ondo Bart i soim stail bilong em i olsem wanpela strongpela pilaia yet. Em i kisim sapota long olpela pilaia bilong Pot Mosbi Guria George Yambra na Desmond Kusunan long winim gem.

Kosa bilong Madang Bob Morris i tok ol i bihainim tasol gem plen long winim pilai.

"Long taim bilong presa futbol, noken guria. Stap isi na pilai tasol na kaikai bai kamap long fultaim wisel," Morris i tok.

Kosa bilong LFA Max Foster i tok olsem Madang i gutpela tim long dispela de long winim gem. Em i amamas tru long ol boi bilong em i putim gutpela salens engensim asples, Madang.

Foster i tok amamas long ol gutpela samting ol ogenaisa bilong MRSF i mekim long pulim ol sponsa olsem PNGFA i kam sapotim soka tonamen.

Socceroos i dro wantaim France

AUSTRALIA i kamapim wanpela strongpela gem tru long dro wantaim Wol sempion, Frens, 1-1.


Moa long 53,000 pipel i bin kamap long lukim dispela intanesenel pren gem namel long tupela kantri ya.

Ol Socceroos i soim olsem dispela win bilong ol long Jun i no giaman. Ol i strong long winim Frens 1-0.

Craig Moore i hetim namba wan gol tasol Frens i kamap strong long namba tu hap na bekim.

Gol bilong Frens i kamap long David Trezeguet.

Sobou i winim PNGFA klab taitel



• Pilaia bilong Yunivesiti (15) i laik trikim pilaia bilong Sobou long PNGFA nesenel klab grenfainel las wiken long Pot Mosbi.

SOBOU bilong Lahi Soka Asosiesen i kamap nupela sempion klab long kantri bihain long em i autim ANZ University 3-0 long gren fainel bilong PNG nesenel klab soka sempionsip las wik.

Dispela gren fainel i no kamap long Kimbe bihain long PNGFA i stapim long wanem taim i sot na tu i gat sampela hevi bilong trabel namel long Bugandi (Lahi) na University i bin kamap.

Sobou i kisim K1,500 prais mani wantaim sil. University bilong Pot Mosbi i kisim namba tu prais.

Sobou i soim tru laik long winim taitel. Olsem na insait long namba wan hap, ol i skorim namba wan gol. Dispela gol ya i kirapim tru skin bilong ol lain Lahi long soim Pot Mosbi long pilai soka.

Straika bilong Sobou Andrew Kassam yet i skorim dispela namba wan gol. Na long namba tu em i kisim

arapela sans gen long skorim bihain midfilda Ludwig Tianua i i givim em gutpela bal.

Planti ol glasman bilong soka i ting University i lus long wanem tupela biknem pilaia Joe Aisa na Reg Davani i no pilai.

Yangpela Davani i luk olsembai kamap namba wan straika bilong PNG tim.

Aisa husat i save strongim beklain i no stap na ol straika bilong Sobou isi tru long brukim difens na skoa.

Long Sobou, tupela pilaia i holim ki bilong tim em kepten yet, Richard Daniel na golkipa bilong em, David Aua.

Daniel i soim tru olsem em i top pilaia na Aua husat i namba wan golkipa insait long kantri na Saut Pasifik.

Tupela tim wantaim i gat planti ol gutpela pilaia tasol ol i no strong tumas.

Kaiten winim Suburten Soka Kap

LONG las wiken, tupela primia divisen soka tim bilong Suburten Soka Asosiesen (SSA) long Malala eria insait long Bogia Distrik i bin pilai long pinisim sisen bilong dispela yia.

Tupela tim ya em Kaiten bilong ples Tobenam na ol mangi Gaddz bilong Busip ples.

Planti manmeri tru i bin kamap long witnessim dispela grenfainel we i soim tru stail na gutpela spirit bilong pilai soka.

Ol sapotas husat i bin kamap long lukim dispela pilaia i amamas tru long givim taim bilong ol long sapotim tupela tims bikos ol tim ya i bin putim aut na soim tru kala na stail bilong pilai soka.

Wanpela olpela referi tru bilong PNG em John Zoromotta i bin lukluk long dispela pilai na pinisim long penalti sut aut. Pilai

i bin pini long dispela mak long wanem tupela tim wantaim i bin strong tru long sait bilong ranim bal na banisim mak.

Kaiten em wanpela olpela tim ru long sait bilong Malala na tu Bogia distrik i bin kamap strong tru long dispela pilai.

Insait long dispela tim i gat ol sampela olpela pilaia tru olsem Solo Luke, Majo Zoromotta na Elijah Kevin husat i bin soim eksperiens bilong ol long winim dispela gren fainel. Ol yangpela pilaia olsem Robert Kup, Peter Boki na Kenneth Makis i bin wok bung gut tru wantaim ol olpela pilaia long pinisim dispela pilai wantaim gutpela kala.

Golkipa bilong Kaiten Francis Gaulat tu i soim gen olsem wok bilong pasim maki em i no nupela samting team em i siviem

dispela kik bilong Gaddz long penalti sut aut long mekim skoa i sanap olsem Kaiten 4 golas na Gaddz 3 gol.

Kaiten nau i sanap olsem sempion bilong suburten Soka Asosiesen long dispela yia.

Long pinisim dispela sisen, presiden bilong SSA Luke Akeke i autim bel amamas bilong em long kain pilaia na sapot bilong olgeta manmeri husat i bin kamap long pilai. Em i salensim tu ol pilaia na sapota bilong olgeta klab long pilai soka long amamas na soim wanem kain stail bilong soka em ol wanwan tims i gat.

Na i no bilong kros na pait. Soka fil em ples bilong pilai soka na amamas wantaim narapela na i no bilong kamapim hevi.

LUKAUT long POISIN SNEK

WELKAM long nupela kolum bilong *Wantok Niuspepa* spot, **Lukaut long Poisin Snek.**

Dispela em nupela kolum we bai kamapim sampela tok pait long developmen i kamap long spot. Na tu i givim sampela helpim tingting long we spot i ken ran insait long kantri.

Long opim dispela kolum, mipela bai toktok long soka. Bikipela tok amamas i mas go long nesenel bodi, Papua Niugini Futbol Federesen long bringim US\$580,000 i kam long kantri aninit long gol projek.

Olgeta man husat i mekim wok long bringim mani i mas kisim bikipela tok amamas. Namba wan man em olupela sekretari jenerel, Ivan Ngahan.

Nau mipela olgeta i save mani bai kam orait, toktok i mas stap na wok i mas bigin.

Olgeta sapota bilong soka em ol memba asosiesen na bisnis insait long kantri i mas senisim tingting na sapotim soka.

Dispela seksen bilong *Wantok Nius* tu i amamas tru long tingting bilong strongim yut soka insait long kantri. Yut soka em i no long ol mangi tasol. Nogat, em bilong ol yangpela meri tu.

Gutpela piksa em Australia i givim olgeta mani i go long developim yut soka. Nau Australia em wanpela strongpela kantri long wol long yut soka. Planti ol pilaia i stap long nesenel tim i kam aninit long yut soka program na nau ol i winim ol bikipela kontrak long pilai soka long Inglan.

Sapos PNG FA i gat dispela kain tingting na kisim sapos long olgeta bisnis, gavman na ol memba asosiesen, PNG tu i ken kisim dispela kain helpim.

PNGFA i kisim pinis wanpela kosing dairekta (teknikel menesa) pinis. Nem em Canes bilong Inglan tasol em i save wok long Nu Silan. Em i gat gutpela program long yut long Nu Silan.

Mi gat bilip long nupela sekretari Gabriel Pise long mekim wok. Tasol em wanpela tasol i no inap mekim wok. Em bai nidim sapot bilong olgeta lain i kam wok bungwantaim em long developim spot.

Poisen Snek i sapotim tingting long salim Anda 15 i go long Sydney, Australia. Tasol, mi laik mekim wanpela askim, inap PNGFA larim dispela wok i go long PNG Skul Soka Asosiesen. Lukim yu neks wik.

Wau painim hat long salim tim

EGAREKA GREG NOINE i raitim

WAU Karate klab i painim hat long salim 5-pela paitman bilong em long nesenel sempionsip long Pot Mosbi, Dispela sempionsip bai kamap long pinis bilong dispela mun, Novemba.

Planti bilong ol dispela paitman bilong karate i no save wok, na ol i painim hat tru long mekim mani long baim balus tiket na haus slip.

Grup lida Gesa Misk i tok nau yet ol i gat tupela rot tasol long painim mani. Namba wan em long sponsasip pepa we i gat 50t mak na arapela em long tromoi dat long sait bilong rot.

Mista Misk i tok sampela bisnis haus i laik helpim. Tasol nau hev: bilong mani i mekim na planti i no helpim olsem ol i save mekim bipo.

Insait long arapela stori, Wau Karate klab i bringim bek sampela trop bihain long Momase Karate na Kickboksing sempionsip we i bin kamap tupela wik i go pinis.

Mista Noah Ariga, wanpela junia instrakta bilong kal i tok olsem dispela em wanpela bikipela samting tru long klab. Em i tok 7-pela paitman (karate) i go pait na tupela i lus long teknikel graun.

Instrakta i tok ol boi bilong em i redi tasol long sempionsip. Tasol hev bilong mani tasol i bai stapim ol ya.

Dispela sempionsip long Mosbi i op long olgeta arapela karate skul tu.

* Mista Stanley Nandex i tokaut olsem em i sempion bilong wol insait long divisen bilong em.

Em i mekim dispela toktok bihain sampela paul toktok i askim sapos wol taitel bilong em i tru o nogat.

Madang bai holim Noten Zon Volibal Federesen miting

HENRY MORABANG i raitim

LILIKLIK ples Bilbil klostu long Madang taun bai paia long wiken taim Noten Zon Volibal Federesen i holim namba wan miting bilong ol.

Noten Zon Volibal Federesen i no nupela asosiesen. Bipo ol i save kolim Momase Volibal Federesen.

Miting bilong ol eksekutiv bilong volibal ya long Momase rijen bai stat long Fraide na pinis long Sande.

Presiden bilong Noten Zon Volibal Federesen Willie Bagore na tresera Steven

Kadam i go pas long oge-naisim dispela miting. Miting ya i pulim ol opisel bilong ol volibal asosiesen insait long Vanimo, Wewak, Manus, Lae na Markham.

Mista Kadam i tokim *Wantok Nius* olsem ol bikipela toktok bai kamap insait long tripela de em NZVF Bai-lo na konstitusen, 3-ya plen na 2002 NZVF sempionsip.

Em i tok olsem dispela miting em i bikipela samting tru long developim volibal insait long rijen. I gat planti samting long mekim na sapos olgeta lain i bung, givim taim na komitim ol yet long mekim wok

long promotim volibal, em bai kamap gut long nau na bihain taim.

Mista Bagore i sapotim tok-tok bilong Mista Kadam na tokaut olsem ol i kisim dispela tripela de miting i go long Bilbil long soim olsem komuniti tu i mas sapotim kain spot long eria bilong ol.

Kain ol miting i kamap long viles level, dispela em long pulim ol i kam sindaun na tok-tok long sapotim volibal.

Presiden i tok ol i bin askim Rijonel Memba bilong Sandaun John Tekwie long opim dispela miting. Ol oge-naisa tu i singautim Memba

bilong Madang Jacob Wama na tu presiden bilong PNG Volibal Federesen Reatau Rau.

Tupela bikman, Bagore na Kadam i tokaut olsem olgeta bikman long wanwan asosiesen insait long rijen i tokaut pinis olsem ol bai kamap long dispela miting. Na miting ya i bikipela tru long rijen.

Ol oge-naisa i singautim tu sampela ol bikman long Madang long kamap stap long dispela miting.

I gat tokwin olsem John Tekwie i laik pulim 2002 NZVF sempionsip i go long Vanimo.

Yusim wanem samting yu lainim: Kila

PRESIDEN bilong PNG Spots Federesen Henry Kila i askim ol spot edministreta husat i sindaun long kos long yusim wanem ol save ol i lainim long ol kain kos.

Mista Kila i mekim dispela ol toktok taim em i pasim wan-wik spot edministresen kos we i bin kamap long Holide Inn long Pot Mosbi.

Em i tok olgeta i mas wok wantaim long spot i ken kamap gut.

"Nau planti mani i no laik mekim wok spot edministreta. Tasol taim nogat man long sutim tok, em mipela ol voluntia spot edministreta bai kisim taim," Mista Kila i tokim *Wantok Nius*.

Em i tok olsem olgeta spot edministreta i wok hat. Na olgeta i kisim setifiket long gutpela skul bilong ol.

Mista Kila i tok tenk yu long Ron Burns bilong Australia long mekim wok olsem instrakta long spot edministresen kos.

Sekretari Jenerel bilong PNGSF Sir John Dawanincura i tokaut olsem "yupela bai kisim planti tok baksait we i gutpela na nogut wantaim. Tasol yusim gut ol dispela kain toktok long

strongim wok bilong yu."

Mista Burns i tok em i amamas long holim dispela kos. Em i tok planti ol edministreta i laik lainim moa toktok ya.

"Yupela bai kisim gutpela bekim sapos yupela i wok hat," Mista Burns i tok.


Planti ol edministreta i tokaut olsem ol i amamas tru long dispela kos. Presiden bilong Volibal Reatau Rau i tokaut olsem dispela kos bai helpim em tru long mekim gut wok bilong em.

Reatau i kisim wok-presiden i no longtaim i go pinis.

Presiden bilong PNG Netbal Federesen Janet Sape i tokaut olsem dispela kos i helpim em long mekim wok long wanem em i save mekim kain wok long lukautim netbal long kantri.

"Dispela kos i soim we mipela i no strong na long traim strongim wok bilong mipela ya."

Joe Godfrey bilong PNG Kickboxing Asosiesen i tok em i lainim planti samting tru. Em i hop olsem em bai yusim dispela skul na save long traim strongim kik boxing insait long kantri.



• Midfilda bilong Sobou i banisim gut bal long birua bilong em long Yunivesitilong gren fanel bilong PNG klab sempionsip las wiken long Pot Mosbi. Sobou win 3-0. Poto JOE IVAHARIA

PNG Mosquito i redi Kap

WOK redi i wok long kamap nau long salim wanpela nesenel tim bilong aussie ruls, PNG Mosquitoes, long stap insait long AFL Intanesenel Cup long Melbourne, Australia. Dispela resis bai kamap long mun Ogas 15-23.

Wanpela komiti i bin holim miting bilong ol long Novemba 7 long Pot Mosbi. Namba wan wok bilong dispela komiti em long painim K200,000 long salim dispela tim we bai i gat 30 pilaia na 6-pela opisel.

Wanwan pilaia bai tromoi K2000 levi fi.

Seleksen komiti em Pearce Michael, Scott Reid, Thomas Gori, Stanley Tavul na Ekonia Peni husat bai makim fanel

skwat.

Ol pilaia long Mosquito tim bai kam long Momase, Hailens, Niugini Ailan na Sauten rijen.

Gori husat i presiden bilong PNG Rules Council i siaman bilong ARL Intanesenel Kap oge-naisim komiti.

Em i tok em i laik olgeta lain i mas wokbung long traim helpim PNG Mosquitoes i mas winim namba wan tonamen. Ol arapela kantri long dispela Intanesenel Kap em Nauru, Samoa, New Zealand, Ireland, Denmark, England, Japan, USA na Kanada.

PNG Mosquitoes i kamap namba wan bikos em i save winim planti intanesenel tona-

men ovasis. Ol i winim tripela gol medal long Australia long taim bilong Arapura Gems long Darwin (1995, 1997 na 1999).

Gori i tok PNG Mosquitoes i gat nem. Olsem na planti ol sapota bai strong tru long lukim PNG i mas winim dispela taitel.

Ol i makim komiti em: Richard Kassman na Peter Wandmaker (fundraising), Ken Lifu (uniforms), Joe Turia na Scott Reid (sponsasip), Nick Rancevic, Tony Smare na Ken Reid (tour), Peter Lyman (finances) na Ekonia Peni (media).

Ol lain bilong lukautim kos-ing em Andrew Cadzow, Ludwig Gambi, Joe Batari na

Peter Bailey.

Mista Gori i tok Tavul bai wok namel long PNG Spots Federesen na tu PNG Government long kisim sapot.

Nau yet, ARL PNG Pikinini Pilai Rules i stat pinis las wiken.

Ol sumatin i bin go pulap long tripela eria em Colts graun, Sir Hubert Murray stadium na University oval.

Ol sumatin long Coronation, Bavaro, Hohola Demo na Ted Diro (Colts), Hagara, Badili (St Therese), Koki and Baruni (Sir Hubert Murray) na Jun Valley, Sacred Heart (Hohola), Waigani na Wardstrip (University oval).

WANTOK SPOTS

Spot Aid program bilong PNG volibal

PAPUA Niugini Volibal Federesen (PNGVF) i kisim wanpela namba wan yut volibal kos we Fedeseren ov Intanesenel Volibal Federesen (FIVA) i ranim.

Aninit long program bilong FIVA husat i mama bodi bilong volibal insait long wol, ol wok long karim aut ol yut kos aninit long program bilong Spot Aid Faundesen (SAP 2001).

Presiden bilong PNGVF Reatau Rau i tok olsem dispela em i namba wan taim ol i kisim kain helpim i kam long FIVA.

"FIVA i salim wanpela kosa long ranim kosing klinik bilong ol yangpela. Nau yet ol i laik holim kos bilong ol Anda 21," Mista Rau i tok.

Em i tok dispela kosing klinik bai karamapim teknik, ruls we i save pilai long intanesenel tonamen.

FIVA i salim Johann Huber bilong Jemani long holim dispela kos. Mista Huber i bin raun pinis long ol sampela arapela Saut Pasifik kantri long holim dispela kos. Em i kam long Pot Mosbi na bihain em i go long Australia na gobek.

Mista Rau i tok PNGVF i no inap kisim ol yangpela bilong arapela senta long kam long Pot Mosbi long hevi bilong mani. Tasol ol i amamas olsem NCD na ol asosiesen insait long Sentral provins i salim ol pilaia bilong ol i kam.

"Long stat, mipela i laikim wanwan pilaia

bilong ol wanwan asosiesen long kam sindaun long kos. Mipela laikim 22 lain olgeta - 11-pela boi na 11-pela meri. Tasol hevi bilong mani i mekim na ol i no inap kisim ol pilaia long arapela senta.

Presiden Rau i tok sapos nogat ol lain tru, ol bai kisim 4-pela ol yangpela long wanwan asosiesen insait long Pot Mosbi.

Dispela ol lain pilaia kamap long kos em ol pilaia ol i bin makim asosiesen bilong ol long Anda 21 nesene sempionsip long Ista.

Mista Rau i bilip olsem dispela klinik em bai helpim PNGVF long makim ol gutpela pilaia long 2003 Saut Pasifik Gems long Suva, Fiji.

Rabaul Kaias i traim tasol long ragbi

RAGBI yunion tim bilong Is Nu Briten, Rabaul Kaias bai strongim nem bilong em taim em i pilai long semi fainel bilong Export Lager Nesene Provincial sempionsip long dispela wiken.

Rabaul Kaias bai bungimol lain Morobe Hammerheads Sharks long SCRUM oval long Lae.

Kaia o tewel nogut long tok ples Kuanua i wanpela bilip we i kirapim paia long tupela maunten paia long Rabaul long 1994.

Kaias i mas tok amamas bihain long ol i wilwilim tru ol brata long Nu Ailan 34-3 Is wiek.

Hammerhead em seken bes tim bihain long Pot Mosbi Boromas na Pot Mosbi Gaigais.

Kaia na arapela nupela tim, Seagulls, i no tingting long pilai insait long fainel. Tasol ol i amamas tru long Pot Mosbi Gaigais i nekim Seagulls 36-0.

Ol lain Rabaul Kaias i sem olsem Goroka Kilituas tasol ol i winim ol long gol average na go insait long fainel.

ARapela tupela tim, Mt Hagen Heemers na Tigers Sharks i no laki tumas. Daru Stingrays i kisim wan poin na Seagulls bilong Kavieng i no kisim wanpela poin liklik.

Tigers Sharks i no laki stret. Ol i winim Hammerheads tasol ol Goroka Kilituas i nekim olsem na ol i aut.

Long Pot Mosbi long dispela wiken, tupela brata tim, Boromas na Gaigais bai brukim bun.

Wina bilong dispela tupela fainel bai pilai long gren fainel.

Kosa na pilaia bilong Rabaul Kaia Donald Tokunai i guria stret long harim olsem tim bilong em i go insait long fainel.

Em i tok dispela em i gutpela nius long ragbi yunion long Goroka. Maski ragbi yunion i nupela long Is Nu Briten, ol Kaias i soim olsem ol tu i ken pilaia arapela spot na i no sofbal tasol.

Mista Tokunai i tok nau dispela semi fainel bai givim sans long ol pilaia bilong em long pilai long hai level kompetisen bilong yunion.

"Taim mipela lus long Gaigais, mipela save mipela mas apim standad bilong gem. Tasol mipela i pilai gut-tru.

"Mipela bai go olsem tim i nogat nem egensim Morobe Hammerheads.

"Ol Gaigais i soim tru olsem ol i ken pilai gut tru long loose fowat.

Kepten bilong Kaia Ramond Romulas i guria stret olsem tim bilong em bai go insait long fainel.

Presiden bilong PNG Ragbi Yunion Graham Osborne long dispela wik i tok olsem ol liklik senta i wok long salensim nau ol bikipela senta long fainel.


Na dispela em i ting em i soim olsem ol bikipela senta i mas was gut long ol yia i kam bihain taim.

Em i mekim sampela spesel toktok long Daru, Mt Hagen na Goroka husat i bin pilai gut tru na i soim ol i ken pilai long bikipela kompetisen. Ol i stap nau long fainel em i bikipela samting tru long ol eksekutiv bilong Is Nu Briten Ragbi Yunion.

Soka kisim K1m long Gol Projek

• Vice presiden bilong PNGFA Seth Daniel (lephan), sekretari bilong PNGFA Gabriel Pise (namel) na Operesen menesa bilong PNGFA Paul Pondo i soim sampela pepa we mani bilong Gol Projek i kam aninit long en.

Foto: IVAN BAYAGAU



PAPUA Niugini Futbol Asosiesen i kisim \$US 589,000 (K1.4 milien) long kirapim wok bilong soka aninit long gol projek.

Namba tu sinia vais presiden Seth Daniel i tokaut long dispela helpim mani i kam long FIFA, wol bodi bilong soka i go long ol niusman long dispela wik.

Mista Daniel i tokaut olsem dispela em bikipela samting tru long developmen bilong soka

insait long kantri. Dispela mani em long wokim soka akemi (koles), soka fil, hetkwata bilong soka na haus kaikai.

Em i tok dispela em i bikipela helpim tru na em i tok tenk yu long Osenia Futbol Konfederesen na FIFA long pait strong long givim helpim long PNG.

Operesen menesa Paul Pondo i mekim wankain toktok tasol i givim bikipela tenk yu moa long ol lain

eksekutiv bilong PNGFA long taim bilong ol kisim dispela gol projek mani.

Mista Pondo i mekim bikipela tenk yu i go long olpela sekretari jenerel Ivan Ngahan long taim em i save wok nait na de stretim askim bilong gol projek.

Em i tok presiden Madiu Andrew tu i mekim bikipela wok. PNG i stap las tasol long gutpela wok pren namel long Madiu na presiden bilong

FIFA Sepp Blatter na PNG i kisim mani hariap.

PNG i kisim toksave long helpim mani long Oktoba 29.

Sekretari bilong PNGFA Gabriel Pise i tok PNGFA i kisim pinis graun long 10 Mile long Lae long kirapim stadium na soka koles. Ol wokman bai muv i go long nupela eria long hap taim olgeta samting i stret.

Dispela soka koles bai opim rot bilong ol soka bilong ol yangpela insait

long Morobe na Madang.

Mista Pise i tok dispela em Stej Wan bilong Gol Projek. Na namba tu Steg em bai kosim samting olsem \$US 400,000.

Wantaim nupela teknikel menesa husat bai kam long kantri long we ol i tingting long salim Anda 15 i go long Sidni, Australia Januari 15, 2002.

PNGFA i tingting strong long developim yut soka program long bihain taim.

INSAIT LONG WANTOK LONG DISPELA WIK

Bibil holim Noten Zon Volibal miting -pes 31

Telikom i strong yet long Lae sofbal - pes 29



Ol Bogia i soim pasin bilong pilai soka - pes 30

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.